

ПЕТӖ 1926 ВОСЯНЬ

ЛЭДЗӖНЫ: КОМИ ГИЖЫСЬ КОТЫР, ПЕЧАТЬ ДА ЮӖР СЕТАН КОМИ
РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

7

СОРА (ИЮЛЬ)
2005

ТАЙӖ НОМЕРЫН:

Иван НОГИЕВ. «А менам туйыс кузь на...» Висьт	3
Александр СУВОРОВ. ГижтӖм кывбурьясӖй. Кывбурьяс	9
Эдуард ТИМУШЕВ. СъӖд кокура. Висьт	12
Владимир ТИМИН. Ме тӖӖн сӖмын ола... Кывбурьяс.....	18
Алексей ПОПОВ. ЧелядьдыртӖ он бергӖд. Висьтьяс	20

ШОЙНАТЫСЯНЬ

Зоя ШИЛИКОВА, Наталья ГЕВЕЙЛЕР, Виктория ТИМУ- ШЕВА. Кывбурьяс	33
Георгий ТОРЛОПОВ. Коми му кузя ме муна... ..	37
Галина ПОПОВА. А кызди нӖ эскытӖгыс. КазьтылӖмъяс ..	53
Алексей РАССЫХАЕВ. «МалтӖм кӖлдум гӖлбӖч вылын» ..	67
Иван ТАРАБУКИН. Шарик-Тузик. Висьт	71

ПУБЛИЦИСТИКА

Никон ХАТАНЗЕЙСКИЙ. ВӖр-ва вӖсна тӖждӖн	73
Валерий МАРТЫНОВ. ОлӖмас петкӖдӖсны... и вӖвъяс	78
Виль небӖгъяс	80

Обложка вылын снимокыс ФӖдор МакаровлӖн.

© «Войвыв кодзув» («Северная звезда»), 2005 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



РЕДАКЦИОННАЯ КОЛЛЕГИЯ:

Главный редактор

Михаил
ЕЛЬКИН

Геннадий
БЕЛЯЕВ

Зам. гл. редактора

Евгений
КОЗЛОВ

Ответственный
секретарь

Алексей
ПОЛУГРУДОВ

Владимир
ТИМИН

Александр
УЛЬЯНОВ



«А менам туйыс кузь на...»

В И С Ъ Т

«Пакөститчөмыслы нө помыс волас оз? Колө кызкө дугөдны йөзлысь лэч ректөмсө...», — вөрө мөдөдчиг вомгорулас моз мөв-паліс Кирө Микол Миш.

— Мый нө сәні ас кежад ропкөдчан? — гөтырыслөн серамыс весиг петіс.

— Быдлаө жө бабаясыдлы делө... Мый колө, сійөс и шуала. Тэ ассыд төд — кыйдөслы места лөсьөд, бара өд ноп тыр вая, — Миш видліс шуткаө бергөдны «йөзасьөмсө».

— Да, тыра нопнад тай гежөда мөдін воливлыны, веқджык сөмын пыдөсас и голлялө.

— Мый сәсся вөчан, вөрыс кушмыны кутіс да... Лунтыр келалан да ловъя лов он аддзыв. Важсө сөмын казътывны и коли.

Варовитігмозыс Миш пасьталіс кыйсян пинжаксө, кокас сүйис резина сапөг, картузасис, шыбитіс мыш саяс нопсө да шыасьлы-төг нин и петіс.

Ывлаас ыджыда кыскыштіс арся ыркыд сынөдсө, видзөдліс кымөра енэжө да мөдөдчис автобус сувтланінө, медым воөдчыны Слудайылө нуөдан туйөдз. Войнас зэрыштөма, көтөдыштөма мусө. Но өні шуровтіс, төвру пөльышталө, вермас на и разөдны кы-мөръяссө.

...Асъя автобусыс кайө пөшти тыртөм, морт-мөд сөмын и эм, а бөрсө упкө-лэччө дзик тырөн, өтарө-мөдарө сьөкыда катла-сьөмөн. Прамөя лолыштнытө он вермы, сы мында йөзыс төрөдчас. Тадзи воөдчөны лун кежлас райцентрад. Быдөн мога: кодкө боль-ничаө, кодкө нөшта кыгчөкө. Рытъя автобусыс бара сідзи кайө, катөдө волөм йөзөс. Мишлы буретш мөдарө и колө: асывнас ка-йө, а лэччө рытнас. Водзті, Слудайылын олігөн, вөрыд орччөн вөлі, карта саяс. Но быри ичөт грездыс. Оз көсийыны том йөз вөр шөрад овны, та вөсна и ковмис Миш гозъялы тшөтш лэччыны Слудабөжө, пөрысьладорыд өд ас кежад он кольччы. Пока вермө на, лэптис виль керка да и овмөдчисны гозъя виль местаын. А слу-дайывса керкасө, кодөс ачыс жө том дырйиыс кыпөдліс, Миш разис, подйыс сісьмалөма нин вөлі да. Керсө чинталіс, колис сө-мын пыді вежөссө да сійөс и лэптис выльысь. Вот и лои вөр керка кодь ичөтик дача. Тырмас, нинөм ыджыдсьыс.

Бур морт Мишыс. Көть тушанас латшкөсіник, но мукөдторсө батъ-мамыс лөсьөдлөмабсь ыджыда, мичаа да ёна. Гөгрөс чужөм шөрас картупель кодь крепыд ныр, гырысь лөз синъясас дзебся-сьө кокныд нюм. Кыз вом доръясыс пыр дасьсьө серөктыны, мед петкөддыны сакар кодь мича еджыд пиньяссө. Ёнісө тай эськө на йылысь сөмын казътывны коли да. Со и ковмис лөсьөдны «виль пинь», но новлө сөмын улыс черлысө, вылыссаыс вильвывсьыс

нин эз ошйив, пыр усыны кыйөдіс... Да и бөрө сыналөм юрсиыс коркө смоль сьод вөвлі, а өні арлыд-арыс кыза пужъялөма. Сідзсө мортыс зэв лабутнөй, быдтор вөчө тэрмасьтөг, мөвпалөмөн. Зэв пельк, мунө да кокъяссө вылө лэпталө, көмсө оз няйтчөд. Сапөгсө бура мыскавтөг керкаад некор оз пыр. Армияыс локтөм бөрас өтлаасисны Рөдь Машөкөд. Зэв на и лөсьыд гозъя лоины: кыкнан-ныс зэв бурөсь сөян-юан вылад, гөсьтъяссьыд некор эз повзывылыны и. Зільөсь, нинөмысь эз лэдзчысылыны. Синсьыс би петмөн лои мырсыны Мишлы, мед вердны ыджыд семьясө, өд вит пиөс да кык нылөс налы сетіс Енмыс. Гожөмнас видз да му удж, а төвнас — кер дорын. Уджалас-уджалас Миш, да и сетлас жө аслыс шойччөг. Лым вывті кө көмтөг тапъялө, сідзкө, дзибыртны сюрөма мужиклы. Этшаник на кор юрас, өна и гажөдас йөзсө, мича частушкаяс нюркйөдлө гөлөссө вөсньөдөмөн. И кажитчө өд кывзысьяслы тадзикөн сьылөмыс. А содтөд кө сюрас ырситыштны, сәки нин ошйысьө аслас вынөн да мичөн: «А ённадтө ме ён! ...твою мать, ок кутшөм ён!— гөлөссө лэптөмөн нин чабыртас нөш кодь кулаксө да лэптыштлас вывлань, быттьө грөзитас кодлыкө. — Ёд-вакө сюрас вольнөй светас меысь ёнджыкыс! Да өд ме зэв на и мича! Ёна мича!— гонькнитас том өш моз юрсө да видзөдлас гөгөрбок.— Кысь нөшта татшөм мичлунсө адзылан? Некусь он!» Лун-мөд-коймөдөдз юас: кодлыськө пув юмсө лэдзас либө сылы син дорас лөз пөнар кодкө ломзьөдас... Эм мый казтыштны палялөм бөрас.

Коркө сэсса пөтас. Овлө, төвнас лэччас көмтөг шор дорө, водас юкмөс дорас, сюас юрсө ваас, недыр видзыштас, кыпөдас да пыркнитчас көтасьөм пон моз, резыштас гөгөрбок йи көдзыд ва войтъясөн. Бара лэдзчысас да вөв моз дыр юкмөссьыс көдзыд васө дуньгас. Шойчыштас, лолыштас да бара, кытчөдз рушкуыс оз польды. Пальөдчас да водзө удж бертө. И эз висьмыв некор, шензьи көть эн.

Тадзи и оліс: уджаліс, кыйсис, быдтысис... Эз и казавлы, кыдзи пөрысьыс суис. Пөрысьлуныд өд кортөм гөсьт кодь: первой порог дорад ладмөдчас, мен пө и тані бур, а недыр мысти, видзөдан да, пызан саяд нин медся ыджыд пыддиыс пукалө. И висьөмгъяс аскөдыс ваяс. Окота на быттьө корсюрө юыштылыны, да повны лоө. То пос кузяыд кайигөн усян да дойман, то гырк пытшкөсыд висьмас да больничаө вежон-мөд кежлө водтөдласны. Пыр гежөд-джыка нин кывлөны гортсаяс Мишлысь гажа частушкаяссьө, гежөдика нин и ошйысьлө аслас мичөн да вынөн.

А пиян помсьыс, көть надея кутіс, шудыс эз ло Мишлы. Быдмисны эськө ас кодъыс жө топыд челядь. Кык ыджыд пиыс, Руслан да Пете, служитісны нин, Слудабөжын вөлі уджалөны. Праздник лунө клуб стрөитысь сьод йөзкөд том войтырыд тышкө воөмаөсь... Мишлысь куим ыджыд писө пуксьөдісны. Нельөдыс, Толя — лыйсис школа помалан воас. Кык ружье пыкөма гөбөч пристук дорас, пуксьөма воча, диван вылө, ствольяссө топөдөма морөс бердас да кыкнан куруксө өтпырйө пезьдөдөма. Нель пи өтпырйөн моз быри. А буретш пияныс вылө лачаөн Миш и керка керсө пөрөдліс. Машө витөд пинас вөлі рушкау, аслыс эм мыйыс шогсьыны. Сөткөмыс сюрлі, өд бокөвөй войтырөс ковмис горөдны, мед керсө лэччөдны. Да и лэптысигас сюрліс: өтар пельөс лөсьөдас, а ладитігкостіыс мөдарыс торксьөма. Отсыштны

некодды. Синваөдз забеднө вөлі. Но тіліс кызкө, эз лэдзчысь, пöрысьмигкежлас зэв на и бур коромина зымөбтіс.

Гырысь пияныс коркө эськө и бөр воалісны, а Толейсө мөдар югыдсьыс он нин бергөд.

Руслан медся олөм олысьөн вөлөма. Зэв ыджыд керка лэптис Слудабөжын, катыдпомас. Кык ыджыд верандаөн. Орччөн кухня, дзик керка коддыс жө, крестьянскöй пач и, гөбөч выв и — ставыс эм. Йöрас пывсян, гид. Струба кодйис, чөскыд ва воис. Уна и удж пуктіс. Ёна лөсьыда овмөдчыліс, но лөка помаліс. Ветлөма орчча сиктө тьоткаыслы отсасыны, рытнас, дерт, гажа юрөн, вөлөм локтө бөр, и мыйкө туй вылас лоөма, бөрыннас шойыс и сюрис. Кутшөм ускөттө суөма, сідзи эз и кывсьы ни югды.

Мукөд пиыс юөмө сетчисны, прамөя некөн оз уджавны, сөмын бать-мамыслы дөсадитчөны. Пете эськө и гөтрасьліс, куим челядь сьöрсьөн-бөрсьөн чужтісны, но овнысө эз жө куж. Кыйсьыны петаліс, лөсьөдліс ылі вөрө көкъямыс вөр керка, а колөкө, и унджыкөс на. Уна порсь видзны босьтчыліс и. Йöра яйтө, тулан да ур куястө лыдтөм сдайтіс госпромхозлы. Мудзыд да кынмөмыд кыза, дерт, сюрліс. Но эз озырмы, сөмын висьөмъяс көвъяліс. Кузякодь больничаясын туплясис, сюрса лысьыс грыжа вундісны. Недыр жежлө быттө и кокньөдыштліс. Чинтіс кыйсян уджъяс, сөмын нель керкаын нин мөдіс узылыны, а медбөрти воис и өтиөдз. Öні каитчө, мыйла пө тадзисө и дури, ачымөс жалиттөг сы мында жугөдчи да кынтыси. Бурджык эськө пө вөлі, ас окотаысь кө не-уна вөралышти. Горшасьөмыд пө тай бурө оз вайөд, горшад тасасьө. Та вөсна ли мый ли, но другасис Пете «вина гагкөд». Сюсь йөз тайө добратө, майбыр, быд пельөсын öні вузалөны, нажөвитчөны жө. Оз бара ков коскөдзыд лым пиын келавны. Юөм вөснаыс гөтырыс Петелөн пышйис, мөдлаын олө... Матысса лэч туйсө таво Пете сиавліс эськө, но та бөрын быдса төлысь вöрас эз кайлы, «тройнөй» көлеяд шыбөлитіс да дыр петны эз вермы. Мый шедлөма, ставыс воши. Мыйла и сиасьліс?

Коймөд пиыс — Мирон, Руслан вокыс кулөм бөрын овмөдчыліс сылөн гөтыркөд. Мый эськө не овны вөлі: көзяйство тырбур, ставыс дась. Но төлкыс эз ло. Бара жө сійө змейыд торкис. Эз дыр видзөд көзяйкаыд выль көзяинлысь кодалөмсө — вөтліс. Мун пө кытчө гажыд. А кытчө? Бать-мам дорас и локтіс... Дөсадитчыны.

Медся дзоляыс, Сергей, сэтшөм жө. Пыралас вөрө уджавны, первой авансөдз кутчысяс, а сэсся и удж вылас оз пет. А коді öні татшөм уджалысьтө видзас? Сітанас бротькасны, и ов кызз гажыд.

Нывъяс верөс сайө петалісны, олөны торйөн. Мед көть нин налөн олөмыс оз торксьы...

Сідзи и бергалөны Миш юрын челядь йывсьыс гудыр мөвпъяс. Мыйла тадзи артмис? Öд ичөтсянныс ставнысө уджө пыртліс, эз жалитлы. Төдіс, дышөдчөмнад мортөн он ло. А со тай, кызди ставыс бергөдчис. Чайтіс, пöрысьладорыс уна пи помсьыд отсөг век нин лоө, а мөдарө на ставыс: бать-мамыссысь пыр мыйкө пычкыны кыйөдөны. Кыськө нажөвитышталсны кө, ваясны да сетөны жө эськө сьөмтортө, но бөрыннас кык пөвстөн пөкмелитчан вылад дзайгасны. Он кө сет, киасьöны на өд. Со мыйөдз олөмыс воис.

Миш петіс автобусысь, тэрмасьтөг шавксьөдіс Слудайывлань.

Абу ылын, кык верст и эм. Туйсö вöчлісны, кор сплав контораыс Слудайылö лöсьöдліс подсобной овмöс. Битö нюжöдлісны и. Бур вира мöсьясöс кыскö вайлісны, ёна көсийсны паськөдчыны, но олöмыс вежсис да ставсö бырöдісны.

Со и тыдовтчис нин сикт эрдыс. Сэні и Мишлөн дачаыс. Бура чышкаліс сапөгсö, пырис керкаас да пуксьöмөн куритчис. Нопсьыс лишнöйсö, мый оз ковмы лэч туй вылас, перьяліс да колис керкаас. Кокньыдика кышаліс рекмöм нопсö да вöляникысь мөдіс вөрлань. Ружьетөг и вөралö. Кыкнансö Толя лыйсьöм бöрын милиция мырддыліс. Кольліс эськö öти гуся ружье, сійöс во-мөдсö кыскаліс на вöрас, но Мирон пиыс юöма кодлыкö. Сы пондась... Лыйнысö прамöя некодöс жö нин-а, ветлынытö кокньыдджык и.

Но унаысь нин казавліс Миш: кык кока «кöин» пакöститчö лэч туй вылас. Босьталö кодкö кыйдöссö, пыр этшаджык и этшаджык сюрö аслыс. Бөр эськö сиалас «кöиныд» лэчтö, но пöрысь кыйсьысьыдлөн моз оз артмы. Сэссия и кок туйыс сёнъясад кольö, сапөг серыс мөд. И зэв наян: тöдö, буракö, кор көзяиныс кыйö лэч туйсö. Миш весиг мунанногсö вежлавліс: öтчыд кыйö öтар помсяныс, а мөдысь — мөдарсянь. Öтчыд кыяс нель лун мысти, мөдысь — витöс лунйöдас. Ветліс видзчысьöмөн, кывзисигтыр, но «кöин» ньöтчыд эз паныдасьлы... Тайö шыш вылас Миш и лöсьöдіс нальксö. Вöсньыдик нюдз тросөн да лебөдка отсөгөн, ки помсьыс эз вермы да, кусыньтіс томиник кыз пу, көрталіс мөд пуö. Троссьыс жö вöчис пекля, лöсьöдіс туй вылас — на-росьнö корсис сэтшöм места, мед кыкнан кокнад öтпырийö веськалан. Нюжöдіс туй вывсяныс зіб: мыйөн сувтан зіб помас, сылөн мөд помыс пезьдöдö кусыньтöм кыз пу. Со кутшöм нальк вöчис Миш! И мед эськö пекляыс эз кокöдыс качöд шышсö... Увлань юрнад öшаліг öдийö и мөдар югыдö веськалас. Мортöс вины Мишлөн мөвп эз вöv: нинöмла пöрысьö-нэмö та ыджада грек ас вылас босьтны. А мед коскöдыс либö киняулöдыс лöсьыда нярснитас-топöдас да мед ды-ы-ыр муа-енэжа костас блонъялö, любуйтчö вөр-ва мичнас.

...Кыкысь та бöрын кайліс Миш, но «кöин» абу волöма. Лэч туйö петігөн быд пöрийö тэрмасьöмөн воліс коланаинас: окота öд аддзывны, шедіс эз кодкö сылы, а шедіс кө, коді. Со и пуыс. «Лыйöма», но абу дзикöдз веськалöма... Трос йылас öшалö и эм кодкö. Ылісяньыд сьöд ёкмыльöн тыдалö, но Миш гөгөрвоё, мый абу ныв кепысь. Надзмöдіс воськовъяссö олöма вöралысь — век жö колö видзчысьны. Друг шышкыдлөн киас ружьеыс коли да вермас и лöсыштны öтка пуляөн, көть эськö и пикö воöма. Надзöникөн, пуысь пуö сайöдчышталöмөн... Воис дзик нин матöдз да бура аддзис: збыль пищала вöлöма, но öні ружьеыс муас. Сэки Миш повтөг нин петіс. И тöдіс: Викул Петыр вöлöма. Кыз он тöд суседтö. Ёна томджык Мишысь, ветымын вит гөгөр на и эм. Оз ылын и ов, некымын керка кост. Быд паныдасиг тай чолöмасьö Мишкөд. Пекляыс кватитöма буретш киняувтіыс, кызди и көсийс Миш. Кокыс метраён-джынийөн кымын муöдзыс оз судз. Век жö кузьджык лöма Мишлөн тросыс, көнкö, эз ёна и повззы суседыс. Дерт, метра вит вылнаын кө тоньяліс, сэки гажаджык вöлі-а.

— Чолөм, сусед! Тэ нö мый тані вöчан? Джагөдчыны али

мый локтін? Абу голяёдыд пысасьёмыд да... Тадзитё өд зэв дыр тэныд мучитчыны лоё,— шыасис Миш.

Петыр көсөйтліс гырдемөм синсё да ружөктіс:

— Чолөм, мый сэсся верма шуны татчө.

— Дыр нин тадзи лётчикалан?— чигарка өзтігмоз водзё юасис олөма вөралысь.

— Мөдөд лун. Морөсөс дзикөдз орөдны кутіс.

Миш пөрччис нопсё, пуктіс кызд пу бердө, кыскис тасма кост-сьыс чер да сэтчө жө чөвтис, ачыс пуксис пөрөм колода вылө да Петыр вылө видзөдігмоз азыма кыскаліс табак тшынсө.

— Мөдөд лун, шуан? А кымынөд во нин менсьым кыйдөсөс новлан?

— Гоз-мөдысь на и кытшовтлі! Абу өд ме кутшөмкө мыйкө... Лэдз, Михайлө дядь,— нор гөлөсөн корис Петыр,— зэв өд деливө.

— Лэдз, шуан?..— Миш лэптис Петырлысь кык ствола «тул-касө» да орччөн туплясьысь патронташсө, видлаліс патронъяссө.— Отка пулясыд тай нө абуйөсь?

— Кыддзас лыйлі, гашкө, мися, пөрас.

— Сэсся? Эз пөр?

— Он на тай веськав тадзи блонъялігад. Трос йылад бергөдлө, пуыс лайкъялө...

— Да, абу кокни тэныд, пиө.

— Абу-абу! Лэдз, Михайлө дядь, дзик өд ог нин вермы. Войся зэр улас скөнх изөймитлі... Ёна и каитчи, мый йөз лэч туй вылө сөлі.

— Нинөм, ёнджыка на кутан каитчыны. Ме өд тэнө, Петыр, тадзи и коля. Мед сэсся кырнышъяс кокаласны. Гусясьысьастө мөд ногөн оз велөдлыны.

Миш сувтөдіс ружьесө пу бердө, восьтіс нопсө, кыскис вугъя-лөм жөч банка, көні пузьөдывліс чай, ветліс орччөн сьялыгысь ёль дорө да гумовтіс ва. Керыштіс мөтыр вылө бедьтор, матын быд-мысь дзор козийысь чегъялыштис кос резювсө, чиркнитис истөг тув. Биыс пыр и кутчысис, гажаа пондіс чалөдчыны кос увъяс костас. Миш пукаліс да лөсьөдышталіс бипурсө, быттё вунөдіс Петыр йылысь. Пузис ваыс, да жөч банкасө вештіс би весьтысь, чөвтис пань тыр чай и бара кутыштіс би весьтас — мед выльысь пузы-лас. Лөсьөдчис нуръясьны.

— Тэ нө мый, Петыр, мөдарө бергөдчөмыд? Сөйыштны он и көйы?

— Кытчө тай бергөдас, сідзи и лоө ьшавны,— сьөкыда ышлов-зис мөдыс.

— Сідзи, сідзи, пиө. А вай висьтась, повзин эн шедөм бөрад?

— Кыдзи нө он повззы!

— Небыдыд гач пиад эз пет?

— Петыштіс...

— Мися, кысянькө лёк дукөн өвтышталө. Көть эськө ме өні дукъястө омөля нин куті кывны. Пөрысьөй, гашкө, локтө да... Но, мый сэсся тэкөд вөчны? А?— Пөсь чайсө ырсьөдігмоз шуаліс Миш.— Дзик эськө колыны и көйылі ме тэнө, мед, мися, ьшалас кувтөдзис... Сэтшөма дөзмылі пакөститчөм вылад. Но пөрысьө-нэмө абу нин окота сы ыджада грек ас вылө босьтны.

Вөралысь тэрмасьтөг чаюйтис, нуръясьыштіс да выльысь өзтіс чигарка. Синсө тшын водзас читкыралөмөн видзөдіс Петыр вылө.

— Ружьеыд тай бур. Инмө?
— Инмө, Михайлө дядь. Лэдзан кө, сета тэныд. Кыйссы, колө-кө... А милицияад шуа, мый юө вөйис.
— Юасьтөг на верма босьтны. Сөмын меным өні ружьеясыд оз нин ковны. А тэныд кольны сьөлөмөй оз лэпты.
Миш тэчис кыскавлөм көлуйсө, көрталіс ноп вомсө, чеччис колода вылысь. Босьтіс киас Петырлысь пищальсө да став вын-ссыс швачкөбтіс пуө.
— Вот тадз, пиө!
Миш шыбитіс кусыньтчөм стволя ружьесө кигут, а Петыр көсөйтчыліс сэтчань да сөмын ышловзис.
— Лэдз менө, Михайлө дядь, нэм чөж ог вунөд. Некор сэсса некодлөн лэч туй вылө ог веськөдчы, ыліті кытшлавны кута. Сөмын лэдз.— Петыр бөрддзис, чышкалыштіс синвасө няйт сос вом дорнас да пыскыльтіс:— А тэнө медся ёна пөчитайтны кута.
— Зэв эськө лөсьыда сьылан да... Тадзи кө олін и... Но да ладнө, лэдза, жальөй быдсөн петіс.
Миш матыстчис кусыньтлөм кыз дорө, сөтыштіс гоз-мөдысь чернас, видзөдліс пу вылас да нөшта өтчыд керыштіс. Кыддзыс гораа нязгөмөн, неокотаысь быттьө, нөрис увлань. Петырлөн кыс судзис муас, но эз кут тушасө, и мортыд сьөкыд мешөк моз brutкысис кок ув нитш вылас.
Олөма кыйссысь матыстчис да мездіс сійөс.
— Бур на, мый купайкаа вөлөмыд. Пинжак кежысь кө, вермис и яйтө орөдны,— троссө чукөртигмоз шуышталіс Миш. Мөдыс сөмын сьөкыда ружтіс.
— Но мый, ачыд верман муннытө? Али отсыштны?
— Час, куйлышта да кызкө ачым нин вермөдча.
— Но, сідзкө, аддзысьлытөдз, кыйссысь,— Миш ладмөдіс черсө тасма костас да воськовтіс водзлань.— А менам туйыс кузь на...



Гижтөм кывбуръясöй

* * *

Зоя баблы

Быттьö Кодкö воліс биа лолөн —
Енэж шөрöд муніс төдтөм гор,
Югыд вичко вежöсын кыз колö
Мудзöм бабöс сьылöдісны кор.

Матіылын шызис рака чукөр,
Жыннйан налы вочавидзис: «Бов-в-в!»
Дойыс синва сорнам петіс чукйөн,
Образ водзын сись моз небзис лов.

Кöдзыд енэж шöрас дзирыд шонді
Ломзис, быттьö лöдсалісны пач.
Гашкö, йöзлөн кевмөм воны пондіс,
Бур юöрсö төдчöдісны тадз.

Воис, воис. Кылісны и водзö
Вежа айяс вуджöдöны лов,
Енкöлаас медым öзтны кодзув.
Сідзкö, эскöй — весьшөрö эз ло

Биа нюръяс вомөн нуысь сылан:
«Енмöй, аслад зарни садйö босьт!»
Медбөръяысь тайöс бабö кылас
Сэсянь, кытчö ловъялы оз позь.

Мыйкö ру кодь вöлі да и сыліс.
Тыдалігас аддзылі на тшук —
Нюмөн ойдіс лик кодь чужöм вылыс,
Быттьö Ачыс Енмыс му выв нывлы
Вом доръяснас инмöдчыліс здук.

* * *

Сир пуана адас, көн мыччасны ва,
Но горштö он веськöд, а сотан,
Көн ми воклы дасьтöма пыдöстөм вад,
Ми асьным на-й мунам — кöть подөн!

И луныс оз югдыв, и помасьтөм вой,
И юр весьтад йирмöга пляча.

И некод оз дорйы, но чинтыштас дой
Лөз кодзулөн мыччасьысь лача.

Кузь туй вуджиг пагалас медбөръя вöv,
Сьод вөр шöрын мутикöд тэсан*.
И нинöм оз отсав — ёсь шыпурт ни ньöv,
Но мездас на сьölöмсянь эскöм.

И кольö нин воськов — му вылас он төр,
Ад öдзöсö-й вöйысьö олöм.
Но воас да югыдас петкöдас бөр
Кык морт костын
радейтны колöм.

* * *

Гажтöм олöмыс дай ньöти абу шань...
Бывла вылас ветлö йирмög — кöдзыд кань.
Öшинь сайын мир туй — вöртасöдзыс сьод,
Да и сйö быттьö гугöн аддзöм вöt.
Унзиль шондi öдва мыччасьö, оз пет.
Весиг вина олöм көрсö оз нин сет.
Петан кар уличö-й сәні абу ин,
Гажтöм аньяс гажтög чöвталöны син.
Коркö мөвп кö волö юрö — төлк ни лад —
Сöмын кувсьöм, сöмын весяс воштöм кад...
Лолыд путкыльтчас да чегас, кылö — каж-ж-ж...
Быттьö дöзмöм вынөн личкöм карандаш.

Унтöм гожся вой

Мыйкö гажтöм сьölöм вылын.
Пета кильчö помö тшук —
Войся ыркыд руас кылö
Свалка дук да бензин дук.

Карыс узытöм войсö каттьö,
Пуö-жуö, юö сур,
Гигзьö-сералö да матькö.
Видзчысь, жугöдасны юр.

Биясылöн яндзим абу —
Улич пölөн помтöм визь.
...Но и тырмас. Но и ладу,
Век кöть шог пöжöмнад вись.

...Пыра керкаö да вода.
Но оз узьсьы — гожся вой...

* Тэсны (уд.) — столкнуться, встретиться на узком пути.

Песан мӧвпыд содӧ, содӧ.
Сёысь ышловзъылан: «Ой!»

Гижтӧм кывбуръясӧй

Вичмис кад сэтшӧм — мый и вена?
Песся-бергӧда ковтӧмтор.
Гижтӧм кывбуръясӧй тӧ менам,
Мый и локтанныд, эг ӧд кор.

Энӧ дивитӧй — збыльысь мудзи...
Некор кокныда ме эг ов,
Гашкӧ, сы понда матысь судзи,
Эз и кыпӧдчыв бордтӧм лов.

Нем оз гижсьы. Кӧть лунтыр доли —
Рифма, мӧвп... чиніс налӧн дон.
Нӧшта лун кызкӧ ылӧсас коли,
Муніс, быттьӧкӧ горттӧм пон.

Гашкӧ, прозаӧн гижны мӧдла,
Гашкӧ, морӧс выв крестала ки.
Гашкӧ, Музаӧс гортысь вӧтла,
Ачым пета да чутка би.

Тырмас, тырмас. Ме абу мыжа,
Мый ог куж тӧян сетны дон.
Вешӧй. Тӧянӧс коркӧ гижас
Ылі сиктысь енбиа зон.

Комиӧдіс Е.Козлов.





Сьод кокора

ВИСЬТ

Мыйлакө сылы пыр унджык шедліс, гырысджык и. Кымынысь аддзылі: лэптас кушенча кодь ляпа, мыйкө броткыштас вомгорулас, чөвтас черисö орччөн öшалысь саккө, пысалас выль сам да сьöлыштöм бöрын бара вöйтас пожöм пуйысь перйöм кузь да кадысла нюкыльтчöм нин шатинсö. Меным

кельчи-ёкыш ёнджыка пысасьліс. Пыр вöлі окота видзöдлыны да тöдмавны, мый выlö кыйсьö, но эг лысьт матыстчывнысьö.

Водзті тайö местаас крут кыр вöлöма, но Эжваыс вочасөн буждöдöма сійöс да лыа көсатор артмыштöма. Зэв на и кивыв вöлі вожкаяс выlö öшöдöм шатинөн вуграсьны тані. А мясянь муртса вылынджык кыськө кылаlöма ыджыд пулөн вужйыс да сибдöма воськов кык-куим ылаö берегсянныс. Абу этша сэсся сэтчö лөпөгсö суйöма, ичөтик дітор весиг артмыштöма.

Кокорасянныс и кыйсис тöдтöм мужичöйыс. Векныдык чужöма, сьод ус-тошка, пеля шапкаа да купайкаа, сійö пыр пукавліс вужлаяс саяс да лöня лэпталіс ляпаяс. Казявлі: кадысь кадö мыйкө шыблавлывліс юö, медым ылöдлыны черисö, но весиг юавны сылысь эг лысьтлы, непöштö корыштны чери велöгсö.

Ёртъяскöд ми тшöкыда чия-виялыкым лыа вылас, дерт, көнкö, дöзмöдчим мужичöйыдлы, но сійö миянлань некор весиг эз бергöдчыв, пукаліс лöня кокора вылас, быттö вужъясьöма ськöд. Шензöдліс мöдтор: кор көть огö локтöй, сійö вуграсьö нин; мунам гортö — кольö на. Эз кө и лöньлы кыйсьöмсьыс-а? Чайта вöлі, берег дорас и узыlö, оз кө веськыда кокора вылас. Дöбелькиöдз кыскис кайлыны вужля вылас да видлыны сэсянь кыйсьыны, но сьод тошка мужичöй пыр сы вылын пукавліс.

Но öтчыд, буракö, татшöм здукыс тшукис. Зэра арся лун вöлі. Шуласны тай, бур көзяин пö татшöм лунас весиг понсö ывлаö оз лэдз. А ме öтнам веськöдчи Эжва дорö, тöдса местаö. Енэжыс шылясьöма, кымöръясыс быттö копытчöмаöсь юö да ру сора васö чурскöны, а сэсся вочасөн бөр резöны посныдык зэр тусьясөн му выlö. Ог тöд мыйла, но меным кажитчывліс татшöм кадыс. Оз нин дöсадитчы некод вуграсигад.

Кокоралань медводз и матыстчи видзöдлыны: тані-ö пырся тöдсай. Эз тыдав. Сэки и шуи нюжöдöм векныдык пöv кузьта вуджны кокора вылас да видлыны вуграсьыштны сэсянь. Гашкö, кутшöма на шедас! Кельшті ваас, сэсся шатин дінөн пыксигмоз и босьтчи вуджны. Шөрöдзыс нин вои, кор кылі кызöктыштöм;

видзодлі водзё: кокора сайсянь мыччысис тошка дядьёлөн юрыс, а сэсся и ачыс. Вужля саяс и пукалё вёлём! А ме, йойыд, эг казав. Кынми быттьё вуджанін шёрас. Водзё мунны — абу лосьыд, кыкнас некөні сэні вуграсьнысё. Бурджык бөр бергөдчыны. Но васөд пөв вылас кокъясөс лосьөдігөн вильді да эг и төдлы, кыдзи бызгыси-уси Эжваас. Пёшти голяөдз на тані вёлёма, да повзёмпырсьыд пөвъяс шашаритчөмөн и воөдчи берегөдзыс. Сулик ва петі. Нидзув банкаой кийн вөлі да, дерт, вөйис. Нопйөй дзик жө ва. Уль лыа вылас и пукси да пөрччи сапөгъясөс, кисьті на пытшкысь васө чепниысь моз. Пөрччысьны эськө да косьтысьны, но көні? Кисьтөмөн кисьтө енэжсянь. Ичөтик төвру на петіс, да ёна и ыркыд лои.

— Ак тэ, детина, колө жө буткылясьны ваын,— кылі орччөн пөдөм гөлөс да лэпті юрөс.

Ме бокын сулаліс сьөд тошка вуграсьысьөй. Сійө надзөник пөрччысис.

— Ак тэ, детина жө да,— бара нурбыльтіс вомгорулас.

Дзикөдз пөрччысис, дөрөм кежсьыс колис. Ме мыйлакө пыр сійөс чайтлі ыджыдөн да ёнөн, туша-мыгөрсө өд эг и аддзыв матысянь, а ме водзын сулаліс ичөтик тушаяса, кокора вуж моз жө кусыньтчөм мужичөй. Дөрөм кежсьыс сійө кажитчис нөшта на ичөтөн да косөн. Голядорса яйыс вөлі дзик лым еджыд, шонді югөрыс, буракө, некор абу веськавлөма сэтчө.

— На, пасьтав,— мыччис сэсся ассъыс бонзём да петук сорс моз өшалысь сойяса свитерсө,— плащөс тшөтш вылад шыбит.

— А тэ?— юалі.

— Мый ме? Гортлань сэсся каям, вуграссис талун. Аскиыс бара на воас,— сьөд тошкаыд дөрөм кежсьыс и вуджаліс аслас кокора вьлө, босьтіс шатинсө, мыйкө нускигтыр ноксьыштіс, а сэсся бөр матыстчис мелань.— На, босьт,— да мыччис кык ляпа.

— Мен оз ков,— бөрыньтчи.

— Босьт, эн яндысь, Ёгор дядьыслы мөд кык ляпа на коли.

«Ёгорөн, сідзкө, сійөс шүөны. Черисө на сетө и. Мый ме мамы висьтала, йөз көлуйнад локта гортө да?»

— Көлуйтө...,— көсийи юавны.

— Аски ме тані лоа, ваян дай,— гарыштіс Ёгор дядь да нюкыльтчөм шатинсө пельпом вылас пуктөмөн веськөдчис сиктлань. Ме тэрыба сюялі ва көлуйөс нопйө да вөтчи бөрсяньыс...

* * *

Енэжыс шылясьөма да ывлаыс весиг руд. Но меным коліс мунны вуграсьны, да и Ёгор дядь, чайта, виччысьө көлуйсө. Мам эськө пинявны босьтчыліс, но медбөрти лэдзис жө. Ёнджыка, мися, пасьтася дай.

Эжва дорө матыстчигөн нин казялі тшын. А берег дорө сибөдчөм мысти аддзи кыр бокысь Ёгор дядьөс, коді медводдзаысь эз пукав аслас радейтана кокора вылас, а мыйкө ноксис бипур дорын.

— Воин?— медводз юаліс.

— Да,— мыйлакө нюмдышті.— Со, косьтөма и пом,— перъялі нопйысь сылысь свитерсө да плащсө.

— Эн кынмы?— кыйкнитліс мелань, да вөлисти медводдзаысь

видзӧдлі сылы синмас. Наын тыдаліс кутшӧмкӧ пыдӧ дзебӧм шаньлун.

— Эг,— таркниті.

— Лок, чай юам первой, а сэсса вуграсьыштам,— Ёгор дядь перйис сьӧд сумкасыс кадысла нин сьӧдасьӧм кык кружка, босьтіс би вылысь банкаын пуысь ва, крепыда заваритіс да виччысьыштӧм бӧрын, кор чай колясыс пуксяс, кисьталіс кружкаясӧ.

Ме матыстчи жӧ.

— Сакарыс абу,— быттӧ эз меным, а кытчӧкӧ енэжас, шуис сьӧд тошка дядьӧ.

— Менам кампет эм,— рад лои, мый тӧрыт на нопйӧс дасьтігӧн шыбиті кулӧкӧ, нянькӧд тшӧтш, душ-мӧд кампет. Со тай, сгӧдитчис, гӧститӧдны весиг верма Ёгор дядьӧс.

— Ог, ме сакартӧг чайтӧ юлывла,— шуис сійӧ да вӧсни парьяснас душ-мӧдысь ырситіс пӧсь чайсӧ.

— Сакартӧг?— шензьышті.

— Чӧскыджык тадзсӧ чайыс, Эжва-матушкаыслысь быттӧ небыд васӧ нӧнялан. Юмолыс сӧмын торкӧ кӧрсӧ.

Ме сэсса кампеттӧг жӧ и босьтчи чурскыны чайсӧ. Первойсӧ эськӧ эдждык кажитчы, сідз кийӧ и нюжӧдчис юмовторлань, но куті ачымӧс да бӧръяпомыс став кружкасӧ на дзимбырті.

— Лок, вуджалам кокура вылас,— друг корис Ёгор дядь.— Ме ӧнтай нин чери велӧгсӧ мешӧкторйын юас лэдзлі да, чайта, матыстчис гырысьыс,— медводз и веськӧдчис вуграсяннланьыс.

Менам весиг сьӧлӧмӧй кутіс ӧнджыка дӱшкыны, кымынысь кӧсйылі вуджавны кокура вылас, видлыны вуграсьны сэсянь, но некор стрӧкаыс эз сюрлы.

Ёгор дядь, мегыр моз кусынтчӧмӧн, водзын вуджис пӧв кузяыс, сэсса лӧсьӧдчис места вылас да менӧ кутіс виччысьны.

— Эн пов,— корис.— Видзӧд водзӧ да вӧляныкысь вудж дай.

Кор нин вои, кисӧ сетіс. Кутшӧмкӧ сарӧгӧсь вӧлі став ки пыдӧсыс.

Вӧлисти гӧгӧрбок видзӧдлі кокура вывсянь кыйсянінсӧ. Вужля саяс Ёгор дядь вӧчыштӧма пӧвъясысь пукаланін. Медым эз мудз мышкуыд, позьӧ пыксьыны кокоралӧн чурвидзысь кыз вужйӧ. А пуклӧссянь орччӧн ваӧ вӧйтӧма саксӧ да нӧшта мыйкӧ кӧв йылын, чери велӧгсӧ, буракӧ. Ок эськӧ, петкӧдлас кӧ, мый вылӧ вуграсьӧ!

— Тасянь вӧйт шатинтӧ дай,— индіс меным ассъыс местасӧ.

— А...,— эз шед кывйӧй.

— Ме орччӧн пуклӧстор вӧчышта,— нурбыльтіс да нӧжйӧник босьтчис нускыны мыйкӧ ассъыс.

Полігтыр пукси Ёгор дядьлӧн местаӧ да вӧйті шатинӧс кузь табйӧн. Эг на удит прамӧя лӧсьӧдчыны, табйӧй дзум пырис ва пытшқас. Нетшышті шатинӧс: вутыр йылын ӧшаліс ичӧтик йӧрш.

— Э-э,— нюмдыштіс Ёгор дядь да сумкаас лукйысьыштӧм бӧрын юалис:— Мый вылӧ кыйсян?

— Нидзув вылӧ.

— Нидзув вылад посниыс ӧна нетшкӧ. На, тайӧн видлы,— да мытчис меным еджыд кӧкыляс.— Тайӧс ме ачым вӧчалі рысь сора пызысь. А рысь кодь коляссӧ босьтывла вый вӧчан заводьсь, этшаниктӧ пыр сетыштасны. Ляпаыд да сыныд ок бура босьтӧ. Видлы.

Ме сатшки ичотик кёкыльсö вутыр йылö да выльысь вöйтi шатинöс. Эз и ковмы дыр виччысьны: кийн тiркöдчис ыджыд пань кузьта мича ляпа.

— Аддзан,— ме вöсна тшöтш радлыштiс Ёгор дядь, а ачыс мачыштiс мича сынпиöс. Öта-мöд бöрся сэсся и лэпталiм еджыд сьöмъя черисö.

— Пöддязыд горшджык,— бутльöс черисö сакас чöвтигмоз буркнитiс Ёгор дядь.— Ляпаыд кö вöляникысь босьтö, пöддязыд горша кватитö, да эн вунöд воча нетшыштны, медем оз мынтöдчы.

Сэсся бара лөнис.

Казялi, мый надзöник кöтасьны кутi да ыркыд босьтiс, зэрыс сiдз эз и дугды.

— Лок, пыр менам плащ улö, öтлаын дзебсям шыбöля зэрсыйс, кынмыны жö, буракö, кутiн-а,— корис тошка морт.

Ме повтöг нин тюркнитi Ёгор дядьлөн сьöкыд да кыз брезентысь вурöм плащ улас. Сэтшöм лöсьыд лои, шоныд и. Вуграсьнысö сöмын деливöджык-а. Унакодь на и кыйöма лои, эг и казаяв, мый пемдö нин.

— Кай сэсся гортад,— друг шуис сийö.

— А тэ, Ёгор дядь?— медводдзаысь шыöдчи нимнас.

— Ме кыйсьышта на, некытчö тэрмасьнысö,— сюркнялiс да бара гөрбыльтчис шатин весьтас.— Кöлуйыд ва, да кынмыны верман. Аски ме ог ло кокора вылас, эн пов, метöг кай да кыйсьы. Самсö со татчö, вужля улас коля пакетын. Саймовтчы, мед некод эз казаяв, да эн ёна öвтчы шатиннад, эн нетшкысь да. Кодкö кö орччөн вуграсьны кутас, мед нинöм эз казаяв. А вöзйысьны кö кутасны, шу, мый местаыс абу, ёртъясыдлы эн жö больöдчы, черисö сöмын полошитасны.

— Но,— шуи да лэптi шатинöс, босьтi чери нопйöс, кöнi кыккуим кило надейнö вöлi, да ньöжйöник петi кокора вылысь.

Зэрыс шлявгöмөн шлявгис, чав лыаыс весиг бура топалöма. Бергöдчылi бөрвыв: сьöд кокора сайын тыдыштiс сöмын Ёгор дядьлөн шатин йылыс...

* * *

Но мöд лунас вуграсьöмыс эз и ло. Збыльысь кынмысьсöма да висьмылi, а сэсся ветлi видлыны ыджыд мамöс, кодi мöд районын олiс. Сэни жö уджалiс чожой да быд письмöын корис во-лыны: вуграсьны пö ветлам, öти ты пö эм, ёкышыс куш вутырсö кватлалö. Ме и ылалi да тшöтш кыссьывлi сэтчö. Но вуграсьöмыс эз и ло. Чож первойсö öтарö юис, а сэсся кор палялiс, нуöдлiс менö эжөрөн нин тырöм кутшöмкö тыö, кöнi чериыс весиг самсö эз видлы. Öдва верми виччысьны гортö бөр мунöмсö.

Мед көть и рыгнас воим, вежси да пыр жö мöдöдчи тöдса местаö.

— Кытчö нин вой кежлас,— мам дивитны пондылiс.

— Муртса көть ветла,— кыв сетi.

— Эн дыр сöмын,— öлöдiс.

Öдйö и вои кокора дорад. Ёгор дядьлөн шатин йылыс эз тыдав, ни вуджан пöвйыс эз вöв.

— Ёгор дядь!— кöсийтöг горöдсис.

— Тять-тять-тять,— мöдлапöвсянь нерыштiс йölöгаыс.

Синмөн кытшовті, абу-ө көнкө матігөгөрын пөвйыс, медым вуджавны кокора вылас. Нинөм ки улө эз сюр да матысса вөрысь кос керпом кыски, ваас лэдзөмөн вомөналі, но эз судз некыдзи, бергалө сөмын, ог вермы лөсьөдны. Бара вөрас котөртлі да өдва аддзи сісьмыны нин заводитөм вөсньыдик тьөс. Кыдзкө-мыйкө потшси, лыа көса вылас и кокураас помъясыс инмөны. Пөсялі весиг. Но вуджигөн пөвйыд кусыньтчис да кыкнан сапөгөс вомөналіс. Өдва кавшаси кокора вылас.

Важ моз тані вөлі Ёгор дядьлөн пуклөсыс. Матыстчи. Дум вылө уси самыд. Видзөдлі вуж улө: збыльысь, кутшөмкө тубрас тыдаліс. Босьті киө да рази: сэні вөліны рыськысь вөчөм көкыльяс. Но дыр каднад косьмөмаөсь нин да вуграсьны эз шогмыны. Бөр важ местаас и пукті.

Но мыйла Ёгор дядь абу? Сійө жө век тані, быд лун?

Нидзулөн и ковмис вуграсьны. Пемдытөдзыс көть пукалі, прамөя нинөм эз и шед, душ-мөд кельчи да йөрш кө он лыдды. Думысь Ёгор дядьөс на виччыси, но эз и лок...

Мөд лунас эз лок, и коймөдас. Школаө мунтөдз на воыввлі татчө, но меным сэсся эз нин и шедлы прамөясө. Эк эськө, Ёгор дядь кө вөлі!

Вунөдны нин куті сы йылысь, эг кө өтчыд лавкаын няньла сулалігөн кыв пөчөяслысь больгөмсө:

— Кипруш Ёгорыд тай юрнас торксьылөма,— тельгис өти.

— Аминь, мыйысь нө?— чуймөм синъясөн кывзіс мөдыс.

— Сөйтөгьд, дерт,— суйсис коймөд,— пыр вуграсьөм вылын и оліс да. Гортас пө керкаыс дзик куш, пызан вылас көть мачөн ворс.

— Аминь-аминь. Мый нө эськө сөйө вөлөм?

— Черисө пө. А сэсся өтчыд и аддзөмаөсь: кильчө вывсянныс шатинсө чөвтөма да вуграсьө. Сусед Миколайыс и юалас: мый нө пө, Ёгорей, вөчан, да чери пө кыя. Миколайыд и висьталөма больничаад, лэччөдөмаөсь сэсся карад, йөй керкаад. Воча чойыс ветлөма видлыны да пыр пө кутшөмкө кокура висьталө, юасьө, местаын-ө. Босьтчөма рисуйтчыны да сөмын пө вужляяс и серпасалө.

— Аминь-аминь,— бара кайтыштис ме бокын сулалысь пөчө да содтис на:— Йөймытөдзыс вуграсьөмыс лоөма.

— Некутшөм абу йөй сійө!— друг горөдсис менам, да ачим весиг весьөпөрлі.

Ставныс ме вылө видзөдлісны. Сэтшөм забеднө лои, мый ог вермы висьтавын Ёгор дядь йылысь, сылөн кокура йылысь, синваөй доршасьны кутіс. Эг вермы терпитны да петі лавкасыс, няньтөг и муні гортө.

* * *

А сэсся воис төв. Ёгор дядь йылысь ме нинөм нин эг кывлы да и юасьнысө эг төд кодлысь. Но тулыснас, кор ямыштіс Эжва да позис нин вуграсьны шатинөн, бара лэччи төдсаинө. Нидзув кындзи босьті и рысь сора пызысь вөчөм көкыльяс. Ёртолөн мамыс уджаліс вый вөчан заводас, да сылысь корышті.

— Мыйла нө тэд сійө?— юаліс сөмын.

— Каньлы,— пөръялі.

— А-а,— нюзодіс да кулёкө гартыштөм бөрын содтыштіс:— Кутшөмкө сьод тошка мужичөй рысь коляссө менсьым пыр кор-
лывліс, каньлы жө шулывліс. Но кольөм वोсянь эз нин воы...

Ме эськө төді, мыйла эз воы, и мыйла шыөдчывліс рыськыс-
ла, төді, но нинөм эг шу.

Өні, чайта, меным шедас жө Ёгор дядьлөн чуйдөм самнас.
Но берег дорас матыстчигөн на ёкнитіс морөсын: сэні эз вөв не-
кутшөм кокора. Лэччи нин кор лыа вылас, сэки сөмын казялі, мый
ыджыд да сьод кокорасө ытваыс ли кывтысь йиыс петкөдөма ви-
зыв шөрланыыс. Өні сэтчө ни вуджны он вермы, ни вужля сайся-
нныс вуграсьны.

Пукті шатинөс бокө, пукси лыа вылас да килутшгъяс вылө
мыджсьөмөн дыр видзөді ю шөрын сулалысь өтка кокора вылө.
Вомөн ногөн сійөс бергөдөма, да өні тешкодьөн весиг кажитчис.
Оти вуж дзик кусыньтчөм шатин йыв моз чурвидзис.

...Воясөн сэссия кокора бердө сы мында лыасө лясчис, мый ю
шөрас ичөтик дітор весиг артмис. Гөгөрыс косьмис. А берег выв-
сянь дзоргигөн кажитчө, быттьө вужля саяс кодкө йөжгыльтчөма
да мыгөрыс сөмын и тыдыштө...





Владимир ТИМИН

Ме тэон сөмын ола...

* * *

«Войдөр, гашкө, мыйсюрө и вичмыліс,—
Коркө лунө висътаси ме тэд.—
Талун тэнад коддзөдана мичлуныд
Меным лөня овнысö оз сет.

Быттьөкө ме воддзаяссьыс мынтыся,
Мед и торъя казътылөм эз коль».
Артмөм мыжссьыс, аддза да, он мын сэсса,
Помтөг дорйысянасö көть доль.

Лои уна кывзыны да соссьыны,
Кытчөдз тэнад вильыш нюм эз чуж.
Шуин: «Ошйысяна вөлөм «восьсьөмыд» —
Со нө, весиг окасьны он кууж».

* * *

Тэнад мывкыдлун
Скөрлунөс кусөдіс,
Мыйта во нин тэ меным
Век мусаник.
Ойдысь ютө он кут
Гожся берегын,
Сөмын ме, мый көть ло,
Эска-верита.

Тэнад мывкыдлун
Олан туй югдөдіс,
Дөзмыд вежөктөм
Сьөлөмын дугөдіс.
Позьö ышмыны син водзын,
Син сайын,

Ловъя вирбинымös
Оз нин вий тайö.
Тэнад мывкыдлун —
Мездан сөдз йөлöга,
Корсьны отсалö туй
Парма вөлöкын,
Медым петны ас мирысь,
Ас йөртöдысь,
Аслам киясөн зэлöдöм
Көртöдысь.

* * *

Ме тэнад — аслад.
Вөдитчы, кызд көсьян.
Эм тэ,
И мукöд вылö веж оз пет.
Дзик майшасьтöг
Ме ачымös со вöзъя,
Öд водзö вылö
Эска сöмын тэд.

Тадз лунысь-лун
Ме тэөн сöмын ола,
Тэ — вежöрын и сьölöмын,
Кöть кор...
И ме кө нöшта
Тадз жö тэныд кола,
Сэк аддза:
Енмыс збыльысь
Миян дор.

Библия серти

Вежоннас öтчид, а гашкö, и унджыкысь
Идралам, пелькöдам ми олан жыр,
Медым и овсис тан кыпыда, бурджыка,
Мед и нелючкиыс синмад эз пыр.

Лöсьыд, кор ми гөгöр сöстöм да мича,
Но эм и мортыслөн пытшкөсса мич...
Кызди ми асьнымös пелькöдам-видзам,
Ёна-ö сöстömöсь Ен водзас ми?..

❖ ❖ ❖



Алексей ПОПОВ

Челядьдыртö он бергöд

Ас кежö кольöм бöрын унаысь казътивла челядьдырöс. Сэтшöм телепит кöть нин мöвпъясöн бөр бергöдчывны сійö кагас, кор кöмтöг ризъялим. Ставыс тöд вылаг усьлö: дурöмыс да бөргöмыс, котралöмыс да Висер юын бузыкасьöмыс... Казътыштан ылö кольöм воястö, и сьöлöм вылаг кокньыдджык лоö. Со тай пукси да сэкся каг йывсьыс весиг пасйыштали. Нейджыг висьтъяс кодъ артмисны.

Кöч кыйöм

Быд нывкалöн да зонкалöн эм медся бур ёрт. Дерт, ичöt дыр-йиыд унакöд котралан да ворсан. Но он тай на быдöнкöд ставтор-нас юксы. Менам тшöтш жö вöли татшöм ёртыс. Орчча керкаын олис. Ар дас гөгöръясын нин ми мöвпалим вöралöм йылысь. Окота вöли судзöдны пищаль, медем котөрөн кайны пармаö да кыйны став зверь-пöткасö. Но кодi муртса на мусьыс чепöсйöм зонкалы ружьетö сетас? Лэчкөн кыйны сямлуныд эз на жö вöв дай. Сöмын дзугйөн уркайяс кыйлим.

Арладорö кадыс исковтiс. Верстьöяс быд асыв котөртöны вөрö кöч да ур лыйны. Миян эськö вежным петö жö да. Окота гортсаясöс кöч яйөн чöсмöдлыны. Аслыным кузь пелятö да тэрыб кокатö кыйны.

Пукалам öтчыд ёрткöд да гораа варовитам, кыдзи коркö быд-мам да ружье ньöбам. Сэсся вöравны мунам. Сёрнианым воим сэтчöдз, мый быттö кыкнанным нин сьöкыд нопйөн гортöдз лэччам. Миян дортi мунiс суседным, Анна Ёгор. Кывзыштiс варовитöмнымöс да суйсис.

- Кöч кыянный?
- Öгö öнi. Кор быдмам, сэки кутам,— вочавидзим ми.
- Öнi öд позьö жö.
- Пищальыс абу да,— ышловзим кыкнанным.
- Кöчтö кыйны пищаль оз на ков,— ыззьöдö Анна Ёгор.

— Кыдзи оз? Лэчкөн али мый? Сійөс сиавнысö ог кужой.
— Лэчтөг да пищальтөг на позыö. Ме тай кольöм во натөг быдса кызь көч гортö вайи.

Ми вомнымöс паськөдiм. Збыль öд, сылөн ружьеыс эз вöv. Да и лэч пуктавыны мөдөдчөм эг жö адзылөй ни.

— Кыдзи нö кыйин?— юасыны босытчим.

— Перечөн. Кайли вөрö да корсылi көч кок туй. Öтчид кө сийö кыткө мунас, то мөдысь сэтi жö котөртны видзөдö. Со и пуктi кок туй дорас из. Сэтчö коли китыр кымын переч. Көчид котөртi-гас адзö сийöс да джөм сувтö. Мый морыс пö сэнi из вылас куйлö. Матыстчас да азыма исыштас. Тöдмалö — позыö оз сейны. Перечид дзик пыр розяс и веськалö. Таысь көчид лөкысь несйö да юрнас сизьдысьö из вылад. И чергысьö. Сöмын лок сэсся да нопъяд дзумгы.

Анна Ёгор мунöм бöрын ми эг и пукыштöй весиг. Котөрөн гортö. Корсим залавкаысь переч пызь. Кисьтiм гартыштöм кабаляда недыр мысти төвзим нин вөрлань. Дыр корсим көч кок туйтö. Сюри жö медбöрын. Öнi бара ог тöд, мыйся кок туй тайö вöли. Колөкö, пон ризөдлöма да. Но сэки ми збыльысь эским, мый зурасим сийö местаас, кытi көч котралöма. Корсим матiгöгöрысь из. Öти из кажитчис ичөтджыкөн, мөд плавкöс дай. Сэтчö кө көчид юрнас зурасяс, вермас на и не кувны. Колö ёсьджык дорыша. Медбöрын сюрис жö. Пуктiм, кисьтiм сы вылö вель уна переч пызь. Вель дыр на пуяс сайсянь көйгим көчлысь локтöмсö. Но эз лок. Ковмис гортö лэччыны.

Мөд асывнас вель водз, школаö на мунтөдз, котөртлiм видзöд-лывыны. Переч из вылын куйлö, а көч — абу. Матiгöгöрсö на весиг кытшовтiм. Друг юрнас вартiс изъяд да эз пыр чергöдчы. Сяммис бокиö муныштны. Но и сэн — эз вöv. Урокъяс бöрын на ризөдлiм. И бара көчтö эгö адзöй.

Тадзи лун вит. Поводдяыс шондiа вöли. Эз зэр. Ми нимкодясим таысь. Öд зэрмис кө, то ваыс перечтö көтөдiс.

— Гашкö, лөк переч сюри да. Тшыкөм,— майшасигмоз шуи ёртлы.

— Эз жö кө-а. Шыдö тай чепöльөн пуктасны да зэв курыд лоö,— шуö сийö.

— Век жö вай видлам.

— Кыдзи?

— Асьным исыштам. Колөкö, оз шогмы да. Бур кө öд вöли — та мында луннад шедi нин көчид.

Первой ёртöй исыштiс, а сэсся мөдар боксяныыс ме дай. Кыдз тай несъявыны босытчим. Муртса асьным юрнаным изъяс эг сизьдыштöй. Менам юрöй нитш пиö пыравлiс. Ёртöй кутшöмкö пуö плешнас инмис. Вель дыр дугдывтөг несъялiм. Бур на, сiдзкö, перечыс вöлöма. Но мыйла көчыс оз шед? Мед на олыштас, сiдзкö.

Сиктын бара паныдасим Анна Ёгоркөд. Көсйим эськö элясыштны, но эг слöймöй. Сийö ачыс сёрнисö заводитiс.

— Таво ме мөд ногөн нин көчтö кыя. Турипувийөн. Китыр кымын пукта көч кок туй вылас. Ачым пу сайö дзебся. Локтас көчид да вом тырнас сёяс турипувтö. Сэсся шомасьыс сэтшöма чукиртчас, мый синсö весиг куняс. Ме бöрсяныыс локта да пельöдыс и босыта. Нинöм оз адзы сэки да. И сюя мешöкö.

Мөд луннас ми ёрткөд тэрыба котөртлiм нюрö... Турипувла...

Бытшкӧм шонді

Гожӧмтӧ пӧрысь и том радейтӧ. Медсясӧ, кор шондіа ывла вылас да кос. Татшӧм кадад ми гортад эг и пыравлӧй. Ӧніӧдз на тӧд ылӧ ог вермы уськӧдны — сёйлывлім-ӧ коркӧ гожӧмнас? Ог тай помнит-а, медем татшӧм жар кадӧ пызан сайын пукавлі.

Ар квайт меным вӧлі. Зэв на водз, а ёртъяс ӧшинь улын нин шутъялӧны — менӧ ризъявны корӧны. Воккӧд зэв ӧдйӧ уйкнитім асья ывла ылӧ. А верстьӧяс мӧдлапӧлӧ турун пуктыны мунӧны. Ӧтнас Сократ Прокор ӧшинь улас кольӧма. Сійӧ мянлы кажитчис ок нин пӧрысьӧн. Кӧть эськӧ Ваньӧ пиыс мекӧд тшӧтшъя. Прокор талун думыштӧма горт гӧгӧрсьыс ытшкӧм турунсӧ зорӧдӧдз вайӧдны. Ми сылӧн ноксьӧм ылӧ ӧна видзӧдны эг кутӧй. Котӧрӧн вадорӧ ризӧдім. Пажын бӧрын сӧмын бӧрсӧ гортӧ кайны убӧлитім. Сократ Прокор буретш вӧлі сигӧртӧ зорӧдсӧ. Зэв кузь вилаӧн турун ёкмыльяс лэпталӧ. А зорӧд саяс буретш шондіыс. Дзик быттьӧ турун вылас шойччыны пуксьӧма. Суседным тэрмасьтӧг помаліс уджсӧ да пырис.

Ог нин помнит, мый вӧчим рытӧдзыссӧ. Дерт, кӧнкӧ, вадорӧ на уськӧдчылім. А мӧд асывнас садьмим, а ывла вылын лёкысь зэрӧ. Шондіыд некытӧн оз тыдав. Та вӧсна туруныс ва, да ыркнитыштӧма. Гортысь некытчӧ абу окота петны. Пукалам воккӧд, виччысям, мый кодкӧ ёртъяс пӧвстысь смелмӧдчас да мянӧдз зэр улас котӧртас. Пукалам да шензям, мыйла шондіыс вошӧма. Петіс кӧ, то здукӧн став васӧ нюлыштіс. Мый нӧ сыкӧд лоӧма? Вок меысь арӧн ыджыдджык, да вежӧраджык. Сылы и воис юрас, мый тӧрыт турун чӧвтігас Прокор дядь шондісӧ ёсь виланас бытшкис. Доймӧмысла и оз пет талун.

— Ачыд ӧд аддзылін, мый Прокорыс виланас шондіӧдзыс вӧлі судзӧ!— горзӧ вок. Ог тӧд, кодӧс зильӧ эскӧдны? Ме ӧд важӧн нин сы дор.

— А вилаыс сылӧн тӧдан кутшӧм ёсь,— суюся ме.

— Ёсь! Шондіыслы яйӧдзыс пыраліс. Доймӧмысла ӧні петнысӧ оз вермы. Ме тай нӧ кляничаӧн кокӧс бытшкылі да эг жӧ некытчӧ петав-а.

— А менам на кийӧ доймыліс да пежасьтӧдз лолі. Гашкӧ, и шондіыслӧн бытшкӧм местаыс пежасис жӧ.

— А кӧні нӧ сійӧ эськӧ дойсӧ бурдӧдӧ?— босьтчис мӧвпавны вок.

— Колӧкӧ, Прокорыс казяліс дойдӧмсӧ да гидас дзебис, мед йӧзыс эз видны.

— Вермас лоны.

Ми зэр ылӧ видзӧдтӧг котӧртлім суседъяс дорӧ, кыйкнитлім гид ӧшиньӧ. Шондіыс эз вӧв сәні. Вӧлі кӧ ӧд, югыд вӧлі гид пытшкыс. Сідзкӧ, мӧдлаын кӧнкӧ бурдӧдчӧ.

Котӧртім бӧр гортӧ, кильчӧ вылын сулалам. Прокорлысь Ваньӧ писӧ думысь виччысям, медем топӧдны. Петіс ӧд аслыс рӧкыд ылӧ сійӧ кильчӧ вылас.

— Мыйла нӧ папыд шондісӧ бытшкис?— ӧти вомысь горзам воккӧд.

— Кыдзи бытшкис? Кор?— шензьӧ Ваньӧ.

— Тӧрыт. Турун чӧвтігас.

— Мед эз. Шондiыс öд вылын. Эз судз виланас сэтчöдз.

— Судзис!— ог сетчöй ми.

Ваньö забеднöйсла пырис да лунтыр сэсса эз петава. А сылөн батыыс миянлы лои медся мустöм мортнас вöльнöй светас. Лунтыр сы вылö лöгалiм. И мöд асывнас тшöтш и. Ёна, тыдалö, бытшкöма, да шондiыс эз жö вермы петнысö. Быд ногыс видам суседнымöс. Ваньöыс миянö локны оз жö лысьт. Кыдз нö лысьтан, кор баты вылад тадзи лöгалöны. Сöмын лун вит мысти, тыдалö, дзикöдз бурдöма шондiыд. Петiс кымөръяс сайысь. Но висьöдчыштö на да оз на вермы сэтшöма шонтыны. Муртса сöмын муöдзыс югөръясыс воöны. Сэсса тай коркö бурдiс жö. Важ моз пöжны босытчис. Ми Ваньöкöд бөр бурасим. Но кор батыыс бара босытчис лöсьöдчыны турун чöвтны, ми сылөн керкаас пыралiгкостi дзеблалiм став вилаяссö. Вель ёна сэсса Прокор кытшлалiс керка гөгöрсö да сикт пасьталаыс сöткис. Кытчö пö вилаясыс вошисны, код сötанаыс гусялiс. Ми кыйöдчим öшиньöд да радlм. Талун сийö оз нин вермы шондiтö бытшкыны.

Нимлун

Вöли тайö ок нин уна во сайын. Гожöм шöрын, стöчджыка кö, июль кызь витöд лунö, тырис меным дас арöс. Мамö вöли лöсьöдöма чöдлача варенньö. Но жар гожöм вöснаыс сийö шузьöма. Та вöсна варенньöнас миянöс, челядьöс, эз вердны. Эз лысьтны. Гажмасны пö, гашкö, да косьö воасны. Сiдз нин пö быд лун парсасьöм чужöмаöсь да.

Кутшöмкö тай пöрысь пöчъясöс корис мамö менсьым чужан лунöс пасйыны. Чöдлача варенньöтö азыма панялöм бöрын найö горöдiсны сывны. Ог нин помнит, кутшöмъясöс. Весиг рочөн гудралiсны кутшöмкö «Как у Ванюши» сыланкыв. Öнi тай сийöс кöсьян кывзыштны, да некод оз тöд. Ни рочыс, ни комиыс. Колöкö, менам нимлун ради асьныс сэк лöсьöдлiсны да.

Пöчьяслысь сылöмтö кывзыны öдйö дышöдiс, да гусьөн моз петi керкаысь. Кытчö гожöмнад сиктад мунан? Дерт жö, вадорö. Висерыс öд эз на изъяв. Котөрөн уськöдчи сэтчö, кöнi менам ёртъясöй, кöнкö, лöзöдтöдзыс нин ваын бузыкасисны.

Сiдзи и эм. Ставныс танöсь. Джум дорын купайтчöны. Ме öдöбөн на ризöда, а майкаöс пөрчча нин. Мися, ю дорас воа да пыр жö и ваас уськöдча. Но кыр йылö локтöм бöрын джөм сувтi. Талун öд меным дас арöс тыри. Нимлун! Абу öкмыс ни абу дас öти, а стöч дас. Ог пыр ваас. Гөгрöс лыдпас. А вöя кö буретш талун? Чужан луннас? Ог. Ог пыр ваас. Ставөн купайтчöны, а ме берегын пукала. Ставыслы шуала, мый оз позь дас арöснад ваö пырнысö, вöйны верма. Джуджыдысла сьöд ва вылас видзöдiгөн менам мөвпгясöй гартчисны водзö. Со, эсийö вужля улас, дерт жö, Васаыс дзебсьöма. Кыйöдö менсьым пырöмöс. Кок чуньöс кö ваас сюя, öдйö тшапнитас да кыскас. Абу öд ме йöй. Кокöс ваö суюны. Весиг син водзын нин быттьö. Васасö аддза. Кузь тошка кажитчö, гöна кияса. Спир Петь Миш, кодi ваын гудрасьö, сылы оз ков. Даньö Микита Иванлөн ни Коляыс, ни Ваньöыс сылы оз жö ковны. Мед ызöдчöны кö. Сылы тöданныд кодi колö? Дзоля Öлексей (тадзи менö ичöt дырйи шулiсны). Вот кодi. Сылы талун дас ар тыри.

Луныс пуксьома шондіа. Пөжө шогмытөма, лолавны нинөмөн. Но олөмыд тай ок дона. Мөсьяс нин чукөрөн вао пырисны көтөдчыштны, понтьяс купайтчыны. Челядь йылысь и сёрниыс абу. Сөмын өтнам лунтыр пукалі да видзөді. Пыри кө ваас, колөкө, өні абу нин ловъя. Бур, мый эг пыр. Коді эськө тайө казтылөмъяссө өні гижис?

А мөд луннас ме ставсьыс водзджык ю дорас ризөді. Зонпосни локтөдз лөз нин вөлі. Төрытья пыддиыс и быдөн купайтчи.

Пөльтөм гадь

Коймөд классө котралігөн нин миян велөдысь Мария Семёновна босытчис челядь чукөрөс төлк выв вайөдны. Кутіс сөвмөдны миян сьөлөмъясын көнкө ылын олысь капиталистъяс дорө лөглун. Вывті пө озыра жыкруйтөны, гөлясөс дзескөдөны. Торйөн нин ёна пө сюрө тіян кодь арлыда негръяслы. Найөс ми киноэкран вывсьыд аддзылім нин. Сэрапом кодь сьөд чужөмаось. Көть дзимбырөн зырт кучиксө — оз едждөд. Мыссынытө көдзыд төвъяснад эз вөв любө. Ииа ваыс да! Та вөсна весиг вежалыштім налы. Майбыръяслы позьө и не мыссыны. Оз и төдчы няйтыс.

Ноябрся праздник водзвылын Мария Семёновна бара паніс лёк да кыз рушкуа капиталистъяс йывсьыд сёрнитө.

— Найө горшнысла дасьось му шарсө нылыштны. Но виньдасны миянөн. Регыд сиктын лоас демонстрация. Тіянлы колө ставныдлы петны пөльтөм гадьясөн. Медым капиталистъясыд спутникъяс вывсянь аддзыласны миянлысь лыдсө да повзясны.

— Быд гадь мөй пасъялөны? — політыр юалис кодкө.

— Дзик быдөнөс, — чорыда вочавидзис велөдысь. — Та вөсна и ставлы колө петны пөльтөм гадьён. И оз сөмын тіянлысь, а став страна пасъталаысь кутасны пасъявны.

Войнас вөтаси кыз рушкуа капиталистъясөс, кодъяс пуксьомаось спутникъяс вылө да чуныассө куснөдлөмөн лыддьөдлөны пөльтөм гадьяс. Мөд асывнас ёрткөд чукөртім конюшня дорысь югыдөдз вильөдөм лыяс да нуим сельпоө. Нажөвитөм сьөм вылас шедіс быд мортлы өти гадьён.

Ноябрся праздник асывводзын сьөлөмсянь пөльтім гадьяссө да мөдөдчим школадорса йөрө. Абу ёна и ылын сэтчөдз, но мунім час чөж. Быдлаө вөлі сибдывлам да. То ракаясөс аддзам. Он өд найөс чуйдтөг водзө мун. Либө потшөс вылө кань пуксьома. Бара жө кокыд сы дорө кыскө. Сэсся ва гуранъяс на паныдасьялөны. Келалыштны колө, йисө жуглөдлігтыр. Гөрдөдөм да кынмөм пелысьла кавшасигөн менам гадьёй инмис ёсь увйө да горөн потіс. Шогөйла муртса пу йывсянныс кын му вылас эг усь. Лэччи, доршасьясь синмөн видзөда вөвлөм гадь вылө да ог төд, мый и вөчнысө. Мөдөс ньөбны он нин удит. Да и лы чукөртны на колө. Сэсся и праздник лунад лавкаыд оз жө уджав. Ковмис сідзи и довгыны школалань.

А сэні йөзыс! Ставныс пөльтөм гадьясөн сулалөны. Быдөн кисө вылө лэптөма. Капиталистъяслы гадьяссө петкөдлөны.

— Тэнад нө көні? — юалис менсьым велөдысь.

— Поті, — тіралан гөлөсөн вочавидзи сылы.

Велөдысь сэтшөма видзөдліс ме вылө, быттёкө ме капиталистъяслөн шпионөн лои.

— Ставныслөн кö потіс? Сэки мый лоас?— стрöга юалис сійö да ачыс жö и вочавидзис.— Чайтасны, мый миян некод нин и абу.

Сиктсöветлань довгигөн, кöні митингъяссö нуöдлісны, ме пыр виді ачымöс. Спутникъяс вылö пуксьöм кыз рушкуа капиталистъяс öні буретш лыддьöны гадьястö. А менам абу! Öти гадь оз тырмы, медым найöс повзöднысö. Он и тöдлы, война на панны вермасны.

Праздник бöрас сэсса вель дыр на полі. Радио пыр кö гимн кылас, пыр жö и кывзысьны босьтчылі. Эз-ö миян вылö ме понда уськöдчыны?! Но эз тай. Тыдалö, менам гадьтöг на капиталистъясыд повзисны.

Каньпиöс велöдöм

Важөн быд сиктын вөлöма аслас крам праздник. Миян Марсикт грездын гажöдчылісны Прокопейö, а батылөн чужанінас, Джиянын, Иван лун сёйлісны дай. Гожöм шөрнас, турун пуктыны петтöдз на, бать да мам мöдöдчисны Джиянлань. Менö да вокöс тшöтш босьтісны. Агни тьöткаясын гажыс пансис. Гырысьяслөн асланыс гаж, а миян — асланым жö. Аддзим джодж шöрыс каньпиöс да дурмим быттьö. Ворсыштім сыкöд да ас костын нин босьтчим варовитны.

— Вай корам Агни тьöткалысь каньсö,— шуö вок.

— Корам,— зэв зіля сы дор лои ме.

— Кор винасö да сурсö унджык юасны, сэк и дзайгыны босьтчам,— велöдö вок, коді воөн меысь ыджыдджык да олöмсöгырысьяслысь бурджыка нин тöдö.— Сэк найö ставсö дасьöсь сетны.

— Агни тьöтка жö винасö ни сурсö оз ю,— майшася ме.

— Сійö сетас каньписö,— эскöдö вок.— Сöмын мед мамыд да папыд сöгласитчисны босьтнысö-а.

Каньпиөн ворсігмоз ми син бöжъяснымöс чöвтім пызан сайын пукалысьяслань. Ме ог на тöд, кор гажмылöны, да виччыся воклысь шуёмсö. Сійö тöдö, кор позяс дзайгысьнысö. Медбöрын воис жö кадыс. Вок тшöктіс меным босьтчыны лöвтнысö. Тэ пö ичöтджык да оз сэтшöма дöзмыны. Гырысьяс эз пыксьыны. Сöмын мамным дузмуныштіс. Каньтöгыс на пö зэв гажа гортын. Но ми эг лэдзчысьöй.

— Йöктыштанныд да сылыштанныд кö, сетам,— шуис кодкöгырысьяс пöвстысь.— Каньпитö öд нажöвитны на колö.

Ми детсайдйö нин ветлам да кутшöмсюрö йöктöм и сылöм тöдам. Босьтчим öта-мöд вежмөн вежнясьны. Лёкысь горзыны-сьывны батылысь сыланкывсö. Кыдз бöрас нин тöдмалі, «Когда б имел золотые горы» лад вылö лöсьöдывлöма. Кывъяссö öнöдз на помнита.

Кор пызан вылын бутылка спирт,
Сэк вoсьсö менам аппетит.
Синмыд дзоргö пробка вoсьтöм,
Пельыд кывзö троньöдчöм...

Гырысьяслы миян сылöмным зэв кажитчис. Торйөн нин батылы. Ачыс тай и сетіс менам моздорö каньписö-а. Миянлы сэсса сэнні вöчнысö вöлі нинöм. Котөрөн пызйыштім Ыджыдвидзлань.

Каньписё то ме нуышта мездорын, то вок. Ай каньпи пё, шуисны, да нимсё зэв өдйё и пуктім — Васька. Торйён нимкодъ таысь воклы, сійёс Васьён жё шуёны да.

Сьёлём эз на бурмы ськөд ворсёмысь, кызд празднуйтанинысь бать-мам воисны.

— Бөр ог нин мөдөд каньсё, но кытчөкө кө пакөститас, ась-нытё люкөда,— броткөдчыштіс мамным.

— Оз, оз пакөститчы,— эскөдам ми. Көть эськө Васьканым пемыд пельөсё гоз-мөдысь саймовтчыліс нин.

— Велөдөй гөбөчө ветлыны. Розыыс со өдзөсас ыджыд,— век на ропкис мамным.

— Кыдз нө велөднысё колө?— юасям сылысь.

— Пакөститчас кө, каньписё сэтчө юрнас люкөдөй да шыбитөй гөбөчө. Сэн пө тэнад местаыд. Тадзи и велалас.

Мөд луннас бать-мам мунісны удж вылө. Ми каньпикөд ворсны колим. А сійё пыр повтөмджык кутіс лоны. Видзөдам да, джодж шөрө пакөститчис. Ми сійёс люкөдім да гөбөчө шыбитім. Тадзи вежон чөж. Некызди велөдөмсё оз гөгөрво. Гашкө, сёысь нин люкөдім да гөбөчад шыбитлім. Коркө дасөд лунъяс бөрас гөгөрвоис жө, мый морсө ми сылы тшөктам вөчны. Зэв сьёлөмсянныс пуксьыліс джодж шөрө. Сэсся миянлань видзөдігмоз вешйыштіс боклань. Та бөрын өддзөдчис да мый вынсьыс люкыштіс юрнас пакөсьт чукөрсө и кызд тай шыбитчас гөбөчө... Недыр мысти зэв тшапа петө сэтысь. Быттё ошйысьө на. Со пө велөдінныд да велалі.

Кузьяён Васька велаліс жө гөбөчад ветлынытө. Зэв ыджыд каньён лои. Ми сійёс гожөм чөж гуринаөн вердім да. Весиг керка стенөд кавшасьны тшөгысла эз вермы. Гоз-мөд кер кайыштас и шняп усьө муас.

Менам бать — мериканскөй шпион

Өтчыд бать локтіс удж вылысь вель гажа юрөн. Ог төд, кодлөн кутшөм, но сійё менам юыштөм бөрад шаньджык лоліс. Мамө эз на вөв, да чөв керкаын. Зэв лөня, быттё миянысь яндысигмоз, пөрчысис водны. Сэсся кызкө сюся видзөдіс ме вылө. Пызан сайын пукалігмоз син бөжөн кыйөда, мый кутас водзөсө вөчны. Сійө, тыдалө, эз казая менсьым гусьён моз видзөдөмөс ли мый, да зэв өдйө сюйыштіс шкап улө кутшөмкө кабалатор. Сэсся бара сюся видзөдіс мелань да вешйис шкап дорсьыс.

«Кутшөм кабала нө дзебис?— вирдыштіс юрын.— Мый сэтчө гижөма?» Мөвпгяс пыр водзө быгыльтчисны, ва лым моз ёкмыльён тюрисны, ыдждісны. Кытчөдз эз зурасьны весьөпөртанторйө. «Гашкө, тайө гуся гижөд?— сатшис юрө.— Колөкө, менам батьөй мериканскөй шпион да, дзебө гуся юөрсө, коді воөма Мерикасянныд». Кольөм луннас на видзөді шпионгяс йылысь кинотө да эз на өд вун, мый найө со тадзи жө гуся гижөдгяссө бур йөзсьыс дзеблалөны. И Мериканас ми мыйлакө нимтім Америкаөс. Кокныыджжык шунысө да сійөн ли мый.

Мөвпгясөй дзикөдз личкисны. Бать кө шпион, то сійёс колө бытён эрдөны. Ми өд сэк олім Павлик Морозов оласног серти.

А бать некызди водны эз кут и. Вольпасьө кө водіс да унмов-

сис, гусьон эськё босьті сылысь шпион гижёдсё да котёрті сельсөветё либё Милиция Олексейясё. Съолём лёкысь тіпкё. Сэтшём окота аслым шпионтё эрдёдны да. Коркё бать водіс жё. Ме вель дыр на виччыси, медем бурджыка унмовсяс. Шпионтясыд өд, асьныд тёданныд, зэв мудерось. Узьём улё лэдзчысьоны, а асьныс сі-йёс и кыйёдоны, кыдзи эськё кодлыкё пакёсыт вёчны.

— Пап, пап? — ньожмыда босьтчи чуксасыны. Медем тёдмавны, узьё оз нин. Оз шыась. Чукёсті гораджыка. Бара чөв олө.

Сэки кок чунь йылын матыстчи шкап дорад, перйи кабалатё. Зэв өдйё вешйи бокё. Гортын лыддыны ог лысьт. Петі ывлаөдз. Кильчө вылын гусьон моз рази бумагатё да лыдди шпионскёй гижөдтё: «Яков Ёгор — 2, Гриша Ёньё — 1» — со мый гижёма. Но! И найё тшөтш жё шпионтяс али мый? Отлаын мыйкё сөтвөритөмаось. Шипровка кодь тайё гижёдыс, медем прамёй морт оз гөгөрво. Но нинём, Милиция Олексей өдйё ставсё восьтас. Кыдз сөмын вежөрөй тырмис сэки, медем өдөбөн не котёртны сельсөветё батьёс вузавны. Ыджыд воклы кабаласё петкөдлі. Со, мися, видзөд. Миян батьным — мерикаса шпион. Сійё видзөдліс кабала вылад да муртса гөрбё эз сизьдышт. Татшём кабалатё пё и ме верма петкөддыны. Тайё пё пасйёма, кодлы мыйта уджйёза, мед гажа юрнас оз вун, да мамсыным дзебёма.

Но, мися, а ме чайті... А збылысь кё шпион гижөд вөлі, котёрті эськё кытчө колө.

Куш юраяс

Төвнад сиктад сөмын луннас гажа. Недыр кежлө югдылө да. Но и сэки ми школаынось. Уроктяс бёрын тэрмасын гортад, медем вежсыны да уськөдчыны ывлаө. Пемдытөдзыс слөймыны иславны кыр йывсянь. Менам челядь дырйи сиктса ывлатё бинад эз на югзёддыны. Тёлысь кё мыччысяс, то вель нин нимкодь. Позяс дырджык котравны. Абу кё сійё, гортад довгыны лоө. Нинём оз тыдав. Телевизорыд сэки миян эз жё на вөв. Гортса уджтё вёчны дыр кад оз мун. Та вёсна рытын вёчны торъя нинём. Мездысьнас пыр вөлі батьным. Кавшасяс миянкөд паччөр вылө да панас быдсяма пөлөс сёрнисё.

— Вай артыштам, кымын миян Ыджыдвиддзын Вась нима мортыс, — вөзъяс сійё.

И ми воккөд кымөсьясөс чукыртөмөн да балябөжъясөс гыжъялөмөн мөвпалам. Макарсикт помсянь кывтыдса медбөръя керкаөдзыс став мужикуловсё лыддьөдлам. Ёнөдз на шензя, кыдзи ми сэки ставсё төдлім. Карад олігөн орчча патераад олысьясыдлысь нимсё весиг ог төд.

— Тима Ёньё Васьёс вунөдім на, — нимкодя горөдө вокй, кор нин чайтам вөлі, мый ставнысё лыддьөдлім.

Тима Ёньөлөн пиыс весиг яслиө на оз ветлы. А со төдам нин нимсё.

Став Васьяссё лыддьөдлөм бёрын вуджлім Машёяс вылө. Сэсса кадыс воас Ивантясөдз, Ольөксейясөдз, Миштясөдз... Тадзи вель уна рыт. Кытчөдз оз бырны унджык мортлы сетөм нимьясыс. Робертястё да Кимтястё лыддьөддыны абу лөсьыд. Гоз-мөд морт и эм татшём нимаыс да.

— Вай артыштам, кымын миян сиктын куш юра айловыс,— миянлысь майшасьёмөс казялөм бөрын бара нин выльтор вөзий бать.

И ми воккөд бара ыззылам. Медводз, дерт, шуам Сократ Прокорөс. Дзик орччөн олө да. Сэсся Сьпира Петяөс гарыштам. Сылөн юрсиыс ёна жö нин чирссьöма. Закар Степан эськө куш юра жö да. Но оз лыддыссьы: сылөн юрыс шырөм куш. Вель дыр мөвпалім, а торъя уна морт эз и сюр.

— Прокö Семö куш юра!— муртса йирксö эг жугöд юрөн ме. Сэтшöм нимкодä чеччыштлі да.

— Эн сör,— оз эскы вок. Тыдалö, сы вöсна, мый эз сылы юрас во тайö мөвпыс.

— Збыльысь куш юра,— морöсас весиг сылы кутчыси.

— Абу, мися. Ме öд Васыскöд öтлаын велöдчä. Некор на эз висьтавлы.

— Оз öд кут мольд юра батьнас ошйысьны. Сійөн и оз висьтав,— дорйыся ме.

— Вай заклад вартам,— вөзийö вок.

Ог öд нин и помнит, мый вылö ыззылім. Дерт, көнкö, ыджыд-тор вылö. Но мöд луннас нин урокъяс бөрын ми босьтчим кыйöдны Прокö Семö бöрся. Весиг мог корсим да гортас локтім. Но абу вөлöма сійö керкаас. Ог öд кутöй лунтыр виччысьны, кор воас. Петім да веськөдчим кывтыдлань. Гашкö, лавкаын мортыс. Збыльысь, сэнi вөлöма. Но шапкаа. Тöвнад öд кöдзыд сытöг. Сулалам, вишкам, кор Семöыд убöлитлас пеля шапкасö пöрчывны. Но сійö оз и мөвпав.

— Мый нö шапка вылад öшйöма?— збоймöдчи да босьтчи ылöддыны ме. Мися, öнi пырысьтöм-пыр пöрччас да видзöдлас.

Но Семöыд кинас малыштiс шапкасö.

— Нинöм эз усь да,— вашмунiс сійö.

Тыдалö, тöдö миянлысь могнымöс да дэльöдчö. Сэсся мунiс. Ми бöрсяныс петім. Но Прокö Семöыд эз гортланыс тапикты, а мöдарö веськөдчис. Вöтлысьнытö бытьтö абу жö лöсьыд. Ковмис нинöм тöдмавтöг и узьны. Мöд асывнас кыкнанным мунiм Василей писö школаö чукöстны. Дерт, көнкö, шензис. Некор ог корлöй, а мыйлакö талун со нуöдны воим. Прокö Семöтö шапка-тöгыс аддзылім. Абу на куш юра вөлöма. Таысь меным школаас мунны весиг эз вöв окота. Ворсси да. Воклөн вомыс пельöдзыс.

Ог тöд, мый вöсна, но менам юр пыдöсöй öнi бур гумла кодь мольд. Вокöй эськö сэки менö венiс, а со кушмис жö мыйлакö юрыс...

Чача

Кывнад печласьны сяммылі, а вот киөн вöчан уджыд öнiöдз оз артмы. Дзоля дырйи ёна вежавлі налы, кодъяслөн пурт помысь артмывлiсны нагантьяс да весиг автоматъяс. Зонпосниыдлы найö эзв коланабсь. Лавкаад ёнасö эз вузавны. Да и ньöбнытö сьöм колö. Аслыным ковмыліс вöчнысö. Ме эськö пуксьыла жö вöлі наган вöлавны, но чукая гормöдчан кодь артмыліс. Висьталан кö, сöмын сэк гөгөрвоасны, мый наган тайö.

Öтчыд велöдысьным шуис, вежон мысти пö колö вайны ас

киён кутшöмкö вöчöмтор. Сэсса пö став школаыслы петкöдлам. Менам ловгөнöй весиг сувтліс. Яналан дзикöдз, нинöм вöчнытö он сяммы да. Эг жö тай гортö кыз синваöн бöрдігырйи лок-а. Мый и вöчнысö? Рытывбыд мөвпалі да сідзи и воді. Некодзи оз узьсы ни. Кузяөн мөвпышті вöчны паракод. Син водзын нин сі-йö. Зэв мича, шывгö-кывтö.

Мöд асывнас корси пес плака да черөн лöсальшті. Артмис сэтшöмтор, мый и пачад сюйны полан. Ковмис пес чипас улö дзебны, мед оз казавны. Довъялышті да аддзи пöв. Со таысь и вöча. Ог тöд мыйла, но кузяөн артмис жö паракод сямаыд. Быттьö весиг мича и быдсөн. Гөрд дöраторйысь плаг лöсьöді да пысалі. Вомдзалöмысь ли мый, зэв пыдö саймовті. Сьölöм вылын лои кокныыджык.

— Аски ставөн вайöй вöчöмторъястö,— юöртіс велöдысьным вежон мысти кымын.— Сэсса вöчам выставка, и быдөн вермас ньöбны сылы кажитчана чачасö.

Ог нин тöд вылö уськöд, уна-ö сулалісны миян чачаясным? Дерт, вит урысь эз унджык. Мöд асывнас ставным пукталім вöчöмторъяснымöс джаджъяс вылö. Ме полігырйи тшöтш жö ассьым паракодöс мытчöді. Аслым зэв мичаөн кажитчис. Но мукöдыс тшöтш жö зільöмаöсь. Нывкаяс аканьяс вайöмаöсь. Зонкаяс — быдсяма пölös танкъяс да машинаяс.

Но паракодыв некодлөн абу. Ме сулала да дзорга. Артала да муртала, кодлысь и чачасö ньöбны? Но друг казали, мый став зонкаыс быттьöкö менам паракод вылö дзоргöны. Оз-ö сійöс нин ньöбны кöсйыны? Аслым зэв нимкодъ таысь. Мися, косьö воасны, ставныс кö сійöс ньöбны уськöдчасны.

Чачаяс колины джаджъяс вылö, а ми пырим классö. Урок бöрын пö ньöбасяныыд. Мед пö мукöдыс удитасны жö видзöдлыны тиянысь вöчöмторъястö.

— Мукöд классъясö ветлысьясыс вермасны жö найöс ньöбны?— юалис кодкö.

— Мыйла нö озыс,— шуис велöдысь.

Ог тöд кыдзи мукöдыс, но ме весиг эг кывлы, мый висьталісны урок вылын. Арталі, мый и ньöбнысö. Чайта, мый мукöдыс ме моз жö майшасисны. Öта-мöд вылас гоньялöмөн тай пукалісны-а. Но вочасөн вои мөвпö, мый аслам паракодыв мичаыс сэні нинöм абу. Но öд сійöс со мындаөн нин видзöдчöны тшапнитны. Мый и вöчны? Урокыс эз кут помасыны и. Звöнок триньöбтігас ставөн нин вöлі зэвтчöмаöсь. Быдөн партаас пыксöмөн дасьтысисны йöткыштчыны да медводдзаөн слöймыны уйкнитны öдзöсöд. Мед удитны тшапкыны медся мича чачасö. И дерт, менсьым паракодöс. Со öдзöс дорас пукалысь зонкалөн кыдзи синъясыс кодзалöны. Ме вылö и быттьö видзöдывлö. Сійö медводдзаөн слöймас классысь петны. Нинöм. Суöда котöртігас да крукöда.

Сэсса тай кыдзи ризöбтім. Велöдысьным муртса удитіс миян улысь пышйыны. Партаяс пöрласьöны, кокъяс крукасьлöны. Öдзöсöд öтырышгъя ставөн петны ог вермöй. Коркö и ме мыні да босьтчи коридорöд ризöдны. Сьölöм чеччö. Слöйма ог бара-й ассьым паракодöс тшапнитны-а?! Ог кö, то ставыс эштас.

Удиті öд. Некод эз вермы меысь водзджык сійöс кватитны. Морöс бердö топöді, муртса ог малав. Аслым сэтшöм долыд. Видзöда, да мукöдыс тшöтш жö зэв шуда чужöмаöсь сулалöны.

Налы нӧ мыйыс раддынысӧ? Эз ӧд слӧймыны менсьым паракодӧс тшапкыны. Сюсджыка кутӧ дзоргыны да казялӧ, мый быдӧн ассьыс вӧчӧмторсӧ морӧс бердас топӧдӧмӧн мунӧ. Ог ӧд и помнит, мынтысьлӧм-ӧ кодлыкӧ ассьыным вӧчӧмторъяссӧ ньӧбасьомсьыс? Татшӧм шуданас гортӧ некор сӧсся эг воы. Дерт, паракодыс регыд мысти пачӧ жӧ веськалӧс. Дыр ӧд сӧйӧн он ворс. Но сӧкся шудыс ӧнӧдз на сӧлӧмӧс шонтӧ.

Сорсьылӧм

Мукӧддырйиыс кутан мӧвпавны, да уна бур йӧз син водзад сувтлӧ. Сы мында авъя сӧлӧма да мывкыд войтырсӧ лои тӧдлӧма. Босытчан ичӧтдырсянныд казъывны, да татшӧмъясылӧн лыдыс абу. На пӧвстысь ӧти — Вась Максим. Школаӧ ветлан туй бокын овлӧс. Ыджыдвидз сиктын, дерт. Стӧчджыка кӧ — Макарсикт грездын. Миянлы сӧйӧ кажитчис ок нин пӧрысьӧн. Еджыд тошка, юрсиыс вояссьыс быгалӧма жӧ. Ми век полӧгтыр ветлывлӧм сылӧн пес лӧбув дортӧ. Дзик туй бокас сӧйӧ сулалӧс да. Воан вӧлӧ сӧтчӧдз, да сӧлӧмыд чеччӧ. Мый морсӧ талун Вась Максимыс мӧвпыштӧма, мед миян вылын шмонитны. Коркӧ пӧвторйӧн сяркнитас лӧбув керъясас. Весьӧпӧрмӧн пышъян. Мукӧддырйиыс вунлас вӧлӧ да гораа кызӧктӧмысь кокъясыд лигышмунласны. Уйкнитан ӧдйӧджык водзӧ. А Вась Максим мыччысьӧма да мелӧа вашъялӧ.

— Мый нӧ, повзинныд? Эн вунӧдӧй — ме ловъя на.

Потшӧс вылын кӧ пукалӧ, то сувтӧдлӧмӧн век сӧрнитыштас миянкӧд, ставсӧ юасяс. Ошкыштас на кодсюрӧӧс мыйыськӧ и. Вась Максимкӧд аддзысьлытӧдз школаӧ мунан и локтан туйыс эз вӧв туй кодъ. Сӧтшӧма велалӧм, мый сӧйӧ миянӧс виччысьӧ либӧ пес лӧбувӧ саймовтчӧмӧн, либӧ потшӧс вылӧ пуксьӧмӧн.

Но ӧти асылӧ садьми да радио пыр зӧв жугыля ворсӧны. Ньӧжмыд музыка кылӧ.

— Вась Максим кулӧм ради али мый ворсӧны,— шуис бать.

— Кулӧма али мый сӧйӧ?— юасям воккӧд.

— Войнас тай кулӧма,— шыасис мам.— Югыдӧн да паськыдӧн сылы.

Школаӧ веськӧдчим зӧв жугыль сӧлӧмӧн. Код нӧ сӧсся ӧнӧ миянкӧд дурнысӧ кутас? Кодӧ сувтӧдлас да ставторсӧ юасяс? Сылӧн пес лӧбув дортӧ мунӧгӧн весиг сувтыштлим, но некод эз кызӧкты ни керъяс эз тотшнит.

Заводитчис урок. Велӧдысьным пырис классӧ зӧв жӧ жугыль чужӧма. Кӧнкӧ сикт кывтыдланьын олӧс, а Вась Максимтӧ тӧдлӧма жӧ. Жаль жӧ, буракӧ, сылы пӧрысь мортыс.

— Челядь, кодӧ тӧдӧ, кодӧ тавой кулӧма?— юасьны босытчис сӧйӧ.

Макарсиктсаяс кияссӧ вылӧ лӧпталӧсны. Ми ӧд бура тӧдам, кодӧ кулӧма.

— Бур, мый унаӧн тӧдӧны тайӧ ыджыд шог йывсьыс,— нораа шуис велӧдысь. Сӧсся индӧс ме вылӧ.— Висытав ставныслы.

— Вась Максим,— шогаа юӧртӧ класслы.

Велӧдысь мыйлакӧ скӧрысь пыркнитчис да ӧдӧбӧн локтӧс мелань.

— Сӧветскӧй Союза Маршал Малиновский тавой кулӧма.

Странаын сэтшöм шог, а тэ кутшöмкö Вась Максимöс висьталан!

Босьтис шошаöд да петкöдис классысь.

Ывла выlö воöм бöрын весиг некызди эг гөгöрво, мыйысь пузис велöдысьным? Вась Максимыс öд збыльысь жö кувсьöма. И лои сэтшöм забеднö, мый синвай чепöсийс. Малиновскийсö ме весиг эг кывлы, а Вась Максимыс Макарсиктын овлис. Миянкöд дурлис, варовитлис. Кыдз нö сэсся сийöс он висьтав.

Уна во та бöрын исковтис. Малиновскийтö книгаясысь аддзыли жö. Бур морт вöвлöма. Но Вась Максимлөн мелі чужöмыс, долыд нюмыс, дзор юрси-тошкыс öнiöдз син водзын.

Дурöм

Ичöt дырйиыд быд ногыс кимöститчывлим. Торйөн нин арся пемыд войясö. То кодлыкö кузь шатин сюян гөбöч розьö да гуд-ралан пытшö. Керкасясыс сэк ёна повзылöны. Олысясыс пö дурöны гөбöчас. Либö öдзöс каличад шöрт көрталан да ылысянь гольöдчан. Чайтöны, кодкö керкаас пырны көсийö да гольöдчö. Петасны посводзас да гораа юасьöны, но некод оз шыась. Пырасны, а ми бара нин шöрт помöдыс каличсö вөрöдам. Нöшта петаласны, юрнысö ывлаö мыччöдласны — бара некод абу. Ми семдылам серамысь. Ог дышöдчöй да кодлыськö пес чипассö мöдлаö вештам. Дзик жö сiдзи, кызди вöли, тэчам. Асывнас олысьяс петасны да шензьöны. Кока пö али мый чипасыс? Дзик жö сэтшöм сулалö, но мöдлаын. А миянлы таысь вель долыд.

Гожöмнад югыд да, он вермы тадзи дурнытö. Казяласны. Та вöсна зэв жугыльöсь довъялам рытьяснас. Кытчöдз кодкö эз велöд выль дурöмö. Миян вомъяс пельöдз лоины. Колö пö сунис помö көртавны папушник, мед чайтисны, мый сьöмсö кодкö воштöма. Пуктыны сийöс тыдалана местаö да вишкыны, кытчöдз кодкö оз казав. Копыртчас босьтны, а миянлы тайö здукö колö шöрт либö сунис помöдыс öдийö кыскыштны. Босьтчим корсьны важ папушник, но некодлөн эз сюр. Аддзывлим, мый пöчъяс сьöмсö новлöд-лöны ныр чышкан дöраö гартыштöмөн. Сэтшöмыд öдийö сюри. Тöбим сы пытшкö кабалаторъяс. Этша кажитчис да, гортысь вайи шашки моль, мед чайтасны, мый посни сьöм тшöтш эм.

Пуктiм дöраторсö моски пöв выlö. Суниссö нуöдiм моски улöдыс да асьным саймовтчим пес лэбулö. И кутiм виччысьны. Со кык пöч мöдöдчöмаöсь лавкаö. Тэрмасьтöг чушиктöны. Мед эськö казяласны жö. Абу жö дзик синтöмöсь вöлöмаöсь. Ылісянь аддзисны.

— Со кодкö сьöмсö, буракö, воштöма,— шензьö öти пöчыс.

— Лавкаö мунысь, тыдалö, уськöдöма. Нуам да юалам, код-лөн?— шуалö мöдыс.

Сöмын на копыртчисны босьтны, а ми сунисöдыс кыскыштiм. Пöчъяс эз жö тай ойöстöмөн пышйыны-а. Сэсся косавлöмөн көс-йисны босьтны. Ми абу жö йöйöсь! Зэв öдийö кыскыштiм, да дö-раыд пöв улас пырис. Ёна шензисны пöчъяс, но пöвсö тай эз жö разыны-а. Миян нимкодъыд! Гигзям сöмын. Кор пöчъясыд, унаысь бергöдчывлöм бöрын, вошисны синъяс водзысь, петавлим да бара пуктiм дöрасö пöв вылас. И водзö кутiм виччысьны. Со нывбаба писö детсадысь вайöдö. Аддзисны уськöдöмторсö да гөгöрбок видзöдлисны. Сэсся мамыс копыртчис босьтны. Ми кыскыштiм

сунисöдыд, да дöраыд тювкнитіс пöв улас. Пиыс эз шöйöвош, да кисö нин моски улас суюö. Ковмис öдйö водзö кыскыны асланьным. Со нин дöраторйыд турун пöвстö воши. Зонкаыд мамсыыс тэрыбджык да, кутіс вöтчыны.

— Пиук, эн вöрöд! Шева тайö, буракö! Кодкö шевасö лэдзöма! Эн киад босыт!

Мöдыслы веськодь. Вöтчö и вöтчö. Ми нин дöраторсö пес лэбулöдыс кыским, а сійö и сэтчö котöртіс. Ковмис кабыръяснымöс ныр дорöдыс вайöддыны. Сöмын та бöрын зонкаыд зэв öдйö мам дорас пызйыштіс.

Вель унаöс йöйтöдлім рытыбыднад. Но öти зон, дöра дорас воём бöрын, эз кут падъявны да зэв öдйö копытчылöмөн кватитіс сійöс. Эг слöймöй кыскыштны. Сэсся суниссö орöдöм бöрын суюис аддзöмторсö зептас да шудаа вашъялігтыр видзöдліс пес лэбувлань. Тыдалö, коркö миян моз жö тадзи дурлöма.

— Вай бöр дöрасö!— уськөдчим сы бöрся ми.

— Кутшöм дöра! Ме нинöм эг аддзыв,— йöй улö лэдзчысис зонмыд, да сідзи эз и сет.

Вежон кымын дышöдтöдз дурим. Ме гортысь пöшти став шашки мольсö нуи. Арладорыс бать кодкөдкө шашкиөн ворсны пуксис. Вель уна моль, вöлöмкö, оз тырмы. Ми воккөд, дерт, кань вылö ыстысим. Мися, сійö наөн дурö да, гөбöчö, тыдалö, уськөдаліс...



Алексей Вячеславович Попов йылысь кузя висътавны оз нин ков; чайтам, Коми му пасъта сылөн нимыс тöдса: лыддысьны радейтысьяслы — «Войвыв кодзувын» петалöм повесът-висътъяснас, унджык гижöдыс и книгаөн нин петаліс, театр радейтысьяслы — сылөн пьесаяс серти пуктöм спектакльяснас. Нимкодь, мый А.Попов и водзö оз көдзöдчы гижан уджсьыс, көть талун вылö, 55 арöса юбилей кежлас, сыөн вель уна нин вöчöма литератураас.

Редакция да редколлегия чолöмалöны Алексей Вячеславовичöс, миянлысь нималана авторöс, гöгрöс арлыднас, сійоны кузь нэм да бур шуд, выль ыджыд творческой вермöмъяс.



Шойнатыса би киньяс

Көрткерөс районса Шойнаты школаын дыр кад чөж уджалө-велөддө Зоя Васильевна Шиликова, и уна во ноксьö челядькөд, нуөддө литературнөй кружок. «Би киньон» тай нимтөмаёсь. И збыльысь, би кинь кодь челядь ветлөдлөны сэтчө. Колө аддзывны челядьлысь синнысö, кор Зоя Васильевна урок нуөддө. А өд оз сөмын шойнатыса челядь, и матигөгөр сикт-грездгясысь воёны татчө өкмыс класс помалөм бöрын. И быдөн дорө колө кужны сибөдчыны, аддзыны-казявны лов вөрзёмсö. Эм тайö ставыс Зоя Васильевналөн, и аслас зильөмөн нуөддө водзö ныв-зонгясöс.

Öтияс мунöны, мөдгяс локтöны. Со тай, нöшта би киньяс өзтöма. Журналын медводдза кывбургясөн петкөдчöны Наталья Гевейлер да Виктория Тимушева. Наташа да Вика эштөдисны школа, мөвпалöны локны велөдчыны карö. Мед жö Шойнатыын öзйөм би киньыс водзö ышөдас найöс.

Пыралис Зоя Васильевна редакцияö да сымда бур кыв висьталис нывгяс йылысь. Нöшта на некымын мортлысь кывбургяссö петкөдис «Йөлöга» да «Би кинь» редакциясö.

Сöмын öтитор и сямман шуны татчө: «Аттё, Зоя Васильевна!»



Шойнатыса би киньяс карö волігöн. «Би кинь» журнал редакцияын. Шуйгавыс-сянь: Наталья Гевейлер, Зоя Шиликова, Виктория Тимушева, Яша Латкин.

Снимокыс Владимир Ячменевлөн.

Козьнав меным

Козьнав меным асывсö
Би гөрд югыд кыаён,
Енкайыслөн сылöмыс
Тшöтш мед матын шыалö.

Козьнав меным лунсö тэ,
Шоныдöс да мичаöс,
Лышкыд шондi югöрыс
Муслуннымöс видзас мед.

Козьнав меным рытсö тэ
Лöня кусысь кыаён,
Шудсö небыд сывбордйын
Öтув тэкöд кыам ми.

Козьнав меным войсö тэ,
Пемыдöс да юмолöс,
Мелilунтö позяс мед
Ыджыд көшön гумовтны.

Пелысь да жов пу

Пелысь бердö топöдчöма жов пу,
Быттьö сылөн муса дзоля чой.
Öтлаынтö кокныдджыка овсö,
Вильыш төв ныр озджык найöс дойд.

Сöстöм дзоридз козьнавлывлö тулыс
Сымда — весиг лыддыныд он куж.
Едждöдланныд вылісяньныд улöдз,
Жалысла оз кынты весиг пуж.

Би гөрд тусьяс öшалöны арнас,
Öзйысь розйön тырöма быд вож.
Ывла көть оз ышмöд пöсьнас-жарнас,
Кöдзыдысла мичлунныд оз вош.

Небыд шальяс плавганныд ті төвнас,
Дзебыштанныд лым улö быд роз.
Пемыдгөрдöдз тусьныд кисьмис-сöвмис,
Вежны рöмсö вын оз судзсьы, оз.

Тулыс-арнас, гожöмнас и төвнас
Кыпöданныд доймöм-усьöм лов.

Шудыс, шогыс — быдторйыс нин вöвлі,
Натöгыд тай олöмтö он ов.

Тöвся кыдзьяс

Вой тöв эзысьтіс вугралысь кыдзьясöс,
Вöчис пуяссö чуймöдан мичаён.
Шензя, вермаяд тöлыскöд кыдзи нö,
Йиа кöдзыдыс дыркодь оз личав öд.

Еджыд чöв-лөннын кыдзьясыс узыöны,
Найöс гартöма прöшвиа гыөрөн.
Тöлыд войвылад нюжалас кузя на:
Кыдзьяс лым сырйысь кöсаяс кыöны.

Венеч улö ті лöсьöдчад быттöкö,
Ковмас — öні жö вичкоö мунанныд.
Ёна-й гажöдад менсьым ті жытник дор,
Кыдзьяс, мичлунтö некор не вунöдны!

Наталья ГЕВЕЙЛЕР

* * *

Кор ставыс бур, мый нöшта колö...
Тэ ачyd пöшти быд лун волан.
И тэнад мича, мелі нюмыд
Мен дона кампетысь на юмов.

И шулан сьölöм öзтан кывъяс,
И завидьтöны тöдса нывъяс.
Мый нöшта? Радейтчöм эн дугöд,
Мед нэм чöж олöм лоас югyd.

* * *

Ывласö джагöдіс войыс,
Шыбитчис сы вылö ош моз,
Радейтчöм эбöссö воштис,
Сьölöмöс нюкыртö дойыс.

Енэжсянь сералö тöлысь,
Шыблалö видзöдлас муö.
Олөмöй кажитчö руа,
Сьökыд жö, абу кор пöлыд.

Гөрддзасяс, эска ме, муслун,
Сэтшөм, код сьөлөмөс шонтас,
Бытьёкө енэжса шонді,
Өзъяс да нәмсө оз куслы.

Виктория ТИМУШЕВА

* * *

Менам сьөлөмлы тэ дінын көдзыд,
Тэнад муслуныд посьлун оз сет.
Бытьё кын муын нэриник көдза,
Коді тулыснас ставнас оз пет.
Менам муслунөй тэ дінө кусі;
Мөдысь өзъяс-ө, ме, дерт, ог төд.
Гашкө, лоан на коркө тэ муса —
Өні сьөлөмө вөзйысьө мөд.

Медводдза муслун

Мыйла век на ме казътыла тэнө?
Мыйла сьөлөмөй кылө на дой?
Мыйла лөглунсө муслунөй венө?
Мыйла бөрдтөг оз коль ньоти вой?
Мыйла, донаөй, кедзовтін менө,
Муслун бинымөс видзны эн куж?
Мыйла мөд нывка пышйөдіс тэнө?
Мыйла колин мен кынталан пуж?
Көть и синваөй лэччө на чожа,
Көть и муслунлөн курыд на көр,
Но ме эскөмөн виччыся гожөм,
Да и чайта на: локтан тэ бөр.
Төда: бурасям, ладмөдчам бара.
Сідзжө төда: и кола ме тэд.
Вылъысь ыпнитас муслунным яра,
Өтув би дорас шоналім мед.

❖ ❖ ❖

Коми му кузя ме муна...

Коми му кузя ме муна.
Гөгөр сулалё съд вёр.
Вёрыс вывті-вывті уна,
Сыысь унаыс оз тёр...

М.Н.Лебедев.

Мыйкё татшөм сямаёс вермис шуавны и, дерт жö, шуавліс — эз комиён и эз кывбурён дерт-а,— зэв тöдчана роч академик*, путешественник да натуралист Иван Иванович Лепёхин (сійö воліс Комиö тані вайöдöм кывбурсö гижысь М.Н.Лебедев чужтöдз сё да квайт воён водзджык — 1771 вося гожöмын). Муніс кыті вöлөн либö пыжөн, а кыті и подөн, 500 сайö километр (сэки, дерт, верст). Туйыс вöлі татшөм: первой коми-пермякъяслөн му, а сэсся öнія Луз районса Прокопьевка сиктсынь — Летка, Ношуль, Абъячой да Занулье. Тайö сиктъясас да грездъясас олысьяссö путешественник шуö коми-пермякъясөн на. Тайö абу збыль, мед кöть сэні олысьяслөн сёрниын вель уна коми-пермяк кывйыс. Луз районын олысьяссö войдөр шулісны зырянаён. Занулье бöрад водзынсö вöліны öнія Сыктыв районса сиктъяс — сэкся Кибра, Визин да Межадор. Сэсся Сыктывдін район (öнія), а сэні Ыб, Пажга, Ньючим да Вильгорт. Дзик öти лун Усть-Сысольск погостын (öнія Сыктыварын) олöм бöрын — Слöбöда. Сэсянь Эжва кузя некытчö сувтлытöг Аквадöдз. Сэсся путешественник кезалö Серёговö. Емва вожысь бөр петöм бöрын туйыс бара Эжва кузя — Пöлавъя, Айкина да Гам. Тані помасьö Иван Иванович Лепёхинлөн Комиö путешествиыс. Яренскыд абу нин Коми муын.

* * *

Öні дзик быть колö висътавны путешественник йывсьыс. Вись-тала кык энциклопедия серти. Иван Иванович Лепёхин чужлöма 1740 воын вöвлöм салдат семьяын. Кувсьöма 1802 воын. Тадзи висъталöма кыкнан энциклопедияс. Öтиыс — медводдза роч «Большая Энциклопедия». Петіс сё во сайын. Мöдыс — роч «Большая Советская Энциклопедия», мöд выпуск.

Первой энциклопедияыс скупиника гижö, сійö пö вöлі бура тöд-са екатерининскöй экспедициясса членъясысь öти. Экспедиция-ясыс тöдмалісны (1768—74 воясö) Россияса асыввыв да войвыв районъяс, Урал да Белоруссия. Та йылысь И.И. Лепёхин гижис быд лунъя пасйöдъясас. Лепёхинлөн гижöдъясас пö, ёртъясылөн

* Чайтам, колö стöчмöдны: уна публикацияын дорвыв, кöні сёрниыс мунö миянö волöм йылысь, И.И.Лепёхинöс нимтöны академикöн, а збыль вылас сійö кадö Иван Иванович вöлі Наука Академияса адгюнктöн. (Ред.).

серти, ёна унджык тырмытöмторъясыс, а естествознание вoп-
росъяс кузя специальной статьяслөн тöдчанлуныс временной.

* * *

Дзик мöд ногөн гижö «Большая Советская Энциклопедия»: «1751—62 воясö Лепёхин велöдчис гимназияын да Петербург ака-
демиябердса университетын. 1762—67 воясö уджаліс Франция-
ын, Страсбургса университетын. 1768—74 воясö веськöдліс акаде-
мической зкспедициясөн, академической гимназияөн да Ботани-
ческой сацийөн. 1783—1802 воясö И.И. Лепёхин — Россияса ака-
демияын непременной секретарь.

И.И.Лепёхинлөн медся тöдчана уджыс — Россияса провинция-
ясö путешествиeяс йылысь быд лунъя пасйöдъяс. Тайö,— гижö
«Большая Советская Энциклопедия»,— медся тöдчана научной
произведение 18 нэмса Россияын. Прöстой йöзлысь оланогсö
петкöдлöмын тöдчö Лепёхинлөн демократизм, уджалысь войтырöс
радейтöм».

* * *

Коми му йылысь тані йöзöдöм гижöдъяссö вöлі печатайтöма
быд лунъя пасйöдъяслөн коймöд юкöнын (петіс 1780 воын).

Книгаыслөн кузьсыс-кузь тыр нимыс татшöм. Вайöдам рочөн:

продолжение
ДНЕВНЫХ ЗАПИСОК
путешествия
Ивана Лепёхина
академика и медицины доктора Вольного
экономического в С.П. друзей природы
испытателей в Берлине и Гессенгобургского
патриотического обществ члена
по разным провинциям
Российского государства
в 1771 году.

В САНТПЕТЕРБУРГЕ
ПРИ ИМПЕРАТОРСКОЙ Академии наук
1780 ГОДА

* * *

Мый йылысь кöть он мöвпав, а тані быть лоö вайöдны лыд-
дысысыяс дінö И.И. Лепёхинлысь шыöдчöмсö. Сетам бара ро-
чөн. Коминас дзик нинöм оз артмы. Дай сёрнитныыс колö Оте-
честволөн мам йылысь. А сійö — всеавгустейшая наша государы-
ня Екатерина Вторая.

Со сійö шыöдчöмыс:

К БЛАГОСКЛОННОМУ
ЧИТАТЕЛЮ

Неусыпныя попечения о славе, пользе и спокойствии подданных ВСЕАВГУСТЕЙШИЯ НАШЕЯ ГОСУДАРЫНИ матери Отечества, день от дня усугубляют наше блаженство; мудрыя ЕЯ установления обновили вид Отечества нашего: десницею ЕЯ новые насажденные грады и установленныя судилища всякому неотдаленную, разстоянием мест доставляют защиту и довольствие; усугубляют выгоды и удобства торговли; каждой области соразмерныя предписания межи и определенное количество народа уравнивают труд правителей и тем споспешествуют скорому дел течению; сельское благоустройство, вверенное особливо искусившимся в сем знании людям, в большее приводит совершенство сие нужное упражнение великой части обитателей России; словом: Матернее ЕЯ милосердие проникло и оживило всякое вообще состояние. И так, Благосклонный читатель! Сравнивая прошедшее, местами в сих записках замеченное, состояние с настоящим, многия найдешь неудобности отвращенными, и там, где слышны были жалобы, водворяющуюся ныне радость и обилие. Но за все сие должны мы роды родов с благоговением воспоминать неисчетныя к нам благодеяния ЕКАТЕРИНЫ ВТОРЫЯ.

* * *

И.И.Лепёхинлысь гижёдсö неуна чинталыштöма: шуам, сэ-
тшöм местаяс, мый нинöм оз содты миян тöдöмлунтьяс динö. Пу-
тешественник висьталö, гашкö, ветымын ичöтик ю йылысь, а збыль
вылас быд шор шуö юөн. Сидз жö быд сиктысь лыддьöдлö вичко.

Сэсся мыйсюрö стöчмöдöма. Коми кывтö тöдтöм мортыд ёна
торкалöма сиктъяслысь, грездъяслысь да сийö жö юясылысь нимъ-
яс: Нювчим ю да Нювчим посёлоккысь нимъяссö, шуам, гижöма
нёлъ ногөн. Эм Чунаб и Кунаб, Иол и Зинтам да нöшта и Цинтам.

Та йылысь висьталöма гижöд помас примечаниеясын.

* * *

Öнi сэсся путешествие йывсьыс. Кыдзи сийö заводитчис да
мунис. Мый аддзылис да кыдзи гижöдъясас петкöдлö аддзылöмсö
Иван Иванович Лепёхин. И сидз, тöдмасям путешественниклөн
быд лунтьяс пасйöдъясөн.

**«1771. Июль 2 лун. Селище грезд. (Июль 2 луныс важ стиль
серти. 18 нэмлы (1701—1800 вояс) важ стиль динö колö содтыны
11 лун. Сэки луныс лоö öнiя кадлы лöсялана. Сидзкö, тайö июль
13 лун — Г.Т.)**

Селище миянлы вöли медводдза грезд, көнi ми аддзысим сийö
йöзыскöд, кодъясöс нимтöны пермякъясөн. Татчö ми локтим си-
бирса Тюмень карын тöвйöм бöрын, императорской Академиялөн
индöд серти. Меным колö висьтавын, кытысь лоисны Россияс
сёрниын пермяк да Перым Великой кывъяс. Став тöдтöм суседь-
яссö важөн шулисны чудьясөн. Сидз жö шулим и пермякъясöс.
Важ финъяслысь да важ венгръяслысь кывсö ме ог тöд.

Пермякъяс видзисны важ грамота, кодöс сетлöмабсь государь

Иоанн Васильевич царствуйтан кадö. Грамотаыс öнi абу. Сотöмa-öсь. Грамотасö вöли сетöмa öти чудьлы, кодi овлöмa Кама берегын, Гойна сиктсянъ 50 кымын верст сайын.

Пермякъяс висьталöны, Чудиныс пö вöлöмa зэв ён. Тöдмалö-мaöсь сийöс роч тöргöвечöс мездöм бöрын. Тöргöвечыслы Чудин петкöдлас гортас мунны туй да сетас став коланасö. Москваö воом бöрын тöргöвеч зэв уналаын висьтавлас Чудинлөн вывтi ыджыд вын йылысь. Сёрниыс кывсяс царлы. Государь корас сийöс Москваö. Сылы сетасны награда — государсянъ грамота. Государь кийөн индöмa му округ, кöнi Чудин вермас вöравны. Сёрниасын та дiнö содтöны, сылы пö вöли содтöд сетöмa шöвкысь кыём тыв.

Тайö багатырсö шулисны **Перяён**. Та серти позьö гөгöрвоны: Перялысь семьясö кутисны шуны **перякъясөн**. Бöрынджык и суседъяссö тадз кутисны шуны. Мыйкö дыра кад кольöм бöрын перякъясысь лоисны **пермякъяс**. Со татшöм багатыр йылысь мойдыс. Збыль али абу тайö, мед мукöдъяс донъяласны. Век жö ме тöда, асланыс кыв вылын найö оз шуны асьнысö пермякъясөн, а шуöны: **Коми-Утир**. (Дерт, абу утир, а отир — йöз, войтыр). Та бöрын И.И. Лепёхин вайöдö коми-пермяцкöй кыв вылö вуджöдöм 50 роч кыв. Абу ставсö стöча вöчöмa.

Став тайö индöдъяссö сетiс еджыд юрсиа пöрысь дед,— пасйö И.И. Лепёхин,— кодi пöшти дзик öтнас вöли сиктас, а став мукöд олысьясыс уджалiсны — перйисны руда либö мукöд колана удж вöчисны заводын. Эскыны кö налөн висьтасьöмлы, виль вераö пыртöм быд мортлы колö сизим сыв пес дасьтыны, тэчны сийöс да сотны — вöчны заводлы колана шом, а гашкö, нöшта и нуны шомсö заводö.

Заводса көзяин сетö уджалысьясыслы сукман либö дукöс, көм да кепысь. Таысь кындзи, уджалысьяслы быд тöлысь сетöны кык пуд пызь, пуд шыдöс да тырмымөн сов. Но сэк жö оз вунöдны бергöдны удждонсьыс быд пуд пызьысь 22 ур, пуд шыдöсысь 40 ур.

Висьмöм мортлы сьöкыд мунны 325 версттö. И Енлы эскысь заводчик лэдзö висьысьöс заводса больничaö, а кор бурдас — нянь-совсьыс ковмас мынтысьны. Татшöм шудтöм йöзыс тшöкыда кык во дорвыв оз волены гортас. Налөн гöтыръясыс кодзöны ид да рудзöг, нуöны сийöс базарö, мед көть мыйтакö отсавны верöсыслы.

Гöльлуныс сэтчöдз найöс топöдiс,— быть ковмис сёйны ныв кырсь сорөн пöжалöм кыдъя нянь.

Сиктса олысьяслөн гöльлуныс вöтлiс миянöс Селищеысь. И ковмис миянлы рытъя пемыдын петны туйö да верст дас öти кыссьыны Косинскöй сиктöдз.

Июль 5 (14) лунö ми сэтысь нинöм бурсö эг аддзöй и мöдöдчим водзö. (Тадзи Лепёхинлөн экспедицияыс воис Юксеевскöй погостö). Заводса уджлөн став сьöкыдлун вылö видзöдтöг, Селище грездын кодъ гöльлунсö ми сэсся эг аддзылöй некысь,— гижö Лепёхин.— Юксеев сиктысь ми аддзим пермяк врачöс, кодi велöдiс чукöртны да пöткöдчыны-бурдöдчыны öткымын турунъясөн.

(Та бöрын академическöй экспедиция вуджис 90 верста вöлök да петiс Кама ю вылö).

Кама ю и тайö местаясас зэв паськыд да визув,— пасйö И.И. Лепёхин.— Веськыдыв берегас тыдалiс Кайгородок. Ми надейт-

чим сьёкыд туй бёрын сэні бура шойччыны. Но Кайгородокыс Казанскöй губерняын медся голь места. Сійöс стрöйтлöмaöсь сэтшöм местаö, кытчöдз Хлынов карсянь 254 верст, Слободскöй-сянь 230 верст, а Соликамсксянь — 250 верст. (Тайö абу миян республикаса райцентр Койгорт, а Киров обласьтын вöвлöм ичöтик кар Кайгородок).

Кор, кодi да мыйла стрöйтлöма тайö ичöтик карсö, ме ог тöд. Но мöвпыштан кö, позьö шуны: сійöс лöсьöдлöмaöсь Сибирö туй восьтöм бёрын. Но бöрынджык Сибирö туйсö вöли писькöдöма Кунгур да Екатеринбург пыр, и кайгородокса туйсö эновтисны.»

Татшöмöсь И.И.Лепёхинлөн пасйöдъясыс Коми-Пермяцкöй му да сэні олысь пермякъяс йылысь. Сетам гижöдъяссö неуна чин-тышталöмөн. Öнi сэсья Коми му кузя мунöм йылысь.

* * *

«Июль 17 (28) лунö рытгоров ми воим Слободскöй карö. Миянлы сійö кажитчис зэв шань, торйөн нин сійöс кытшалысь видз-муыс да каменнöй вичкоясыс. Кор да кодi стрöйтлöма тайö карсö? Архивъяс дöзьöриттöм вöсна, стöча висьтавны он вермы.

(И.И.Лепёхин зильö висьтавны и Коми крайкöд орчча муясын олысьяс йылысь. Та боксянь аслыссыкас и Слободскöй кар, и ставнас уездыс. Тайöс и петкöдлö экспедицияөн веськöдлыс — Г.Т.).

Öнiя Слободскöй карын 9 каменнöй да öти пу вичко. Пу керкаясыс 600, каменнöйыс — куим. Карын 1017 купеч, на лыдын уна озырыс. Вузасöны няньөн, нуöны и Архангельск портö. Эм сiдзжö майтöг да кучик вöчан заводъяс.

Слободскöй карысь петiм Архангельскö нуöдысь туй вылö. Тайö туй вылас медбөръя грезд — Пöчинок. Сэсянь заводитчö вöлöк — 9 верст. Вöлöкыс помасьö Нестериха ю берегын. Тайö юыс öтлаасьö Летка юкöд. А сэсянь нин заводитчö мöд, 35 верста вöлöк. Сійö помасьö Прокопьевка сиктын.

1771. Июль 20 (31) лун.

Прокопьевкаын пермякъяс нин олiсны*. Нажöткаыс налөн кыскасьöм помысь, медсясö Архангельск губерняö.

Сиктгöгöрса вöрыс сöмын арся да тöвся кадö сетö пермякъяс-лы удж — кыйсьöм, вöралöм. Некутшöм мукöд удж пермякъяс оз тöдны.

Пермячкаяслөн паськöмыс неуна торъялö. Найö новлöны сөстöм сарапанъяс. Юрнысö тупкöны аслыссыкас чышъянөн, кодöс вышивайтöны гарусөн (вурун шöртөн). Гарусөн жö вышивайтöны дöрöм сосъяснысö.

Прокопьевкасянь Слуда сиктöдз 18 верст. Сэсянь Летка сиктöдз 12 верст. Туйыс мунö еджыд ялаа ягтi. Сэни енэжсö пыкöны гырысь пожöмъяс. Леткасянь 10 верст Черёмуховка юöдз, кодöс колö торйөн пасйыны. Сійö торйöдö Хлыновскöй да Устюжскöй муяс. Леткасянь мöдарлань мунiгөн 10 верст сайын жö мöд ю — Перекурьевка. Берег пöлöныс сэни помтöм уна мыльк — найöс колö пасйыны не сöмын мичлун, но и пытшкöсса тэчас вöснаыс.

* Öнiя Луз районын сэкся олысьясöс И.И.Лепёхин шуö пермякъясөн. Сы ногөн, комиыс заводитчö сэкся Кибрасянь (öнiя Куратовсянь).

Мылькъясыс артмөмаось сёй да нюйт слöйясысь. А на костын — известьысь артмөм гырысь из палакъяс.

Тасянь миянлы колö вöлі вуджны зэв кузь вöлök — 65 верст Ношульöдз. Вöлökсö юклісны посныдик юяс: 10 верст мунöм бöрын Гостиловка ю, коді усьö Леткаö. Сэсянь 2 верст мунöм бöрын Осиновка ю — Гостиловкалөн вож. Нöшта 12 верст мунöм бöрын лоö вуджны Сокса ю, коді Луз юö нин усьö.

Нöшта 12 верст мунан, да бара колö ю вуджны — Ловля. Сэся нöшта öти — Кривуша. Туйыс медсясö мунö нюръясті, но паныдасьлöны и паськыд ягъяс. Ягъясыс эськö вермисны сетны сәні олысьяслы ыджыд пöльза, бура кö мынтысьны уджысь. Шуам, кöть нин сир да дьöгöдь перйысь-пуысьяслы. Но ставыс кольö дö-зöртöм. Сирсö да дьöгöдьсö вöчöны сән, кöні и сытöг вöрыс чинö.

Ношуль сикт тайö местаясас медся тöдса. Архангельскöй губерняын, Галицкöй да Вологодскöй провинциясын кындзи, став государственнöй крестьянасö юклöма вöлөсьтъяс вылö. Сәні сик-тыс — медся тöдчана места. Сәні олö вöлөсьтса старöста, коді оз сöмын аслас сикт вöсна тöждысь, но чередитö и матігöгöрса грездъяс. Сәні видлалöны и крестьяна костын посни венъяс.

Ношуль сикт — Луз ю берегын. Тайö сиктсö торйөн нин колö пасйыны. Буретш тані Ношуль пристань, кысянь Вятской провинцияысь став лишкасö мөдöдöны Архангельск портö — нянь, кучик, гос, рөгöза и Хлынов заводысь вина. Тайö пристаньöдзыс тöвся кадö вайöны тöварсö вöлөн, а тулысын ставсö мөдöдöны баркаясөн. Та могысь Ношульын да Луз юпöлөнса мукöд сиктъясын стрöйтöны гырысь и посни баркаяс. Таво гожöмын тайö пристаньсянныс вылö вöлі мөдöдöма 70 барка. Баркаяс стрöйтöм кындзи, налөн эмось жытникъяс. Төвся туй кадö стрöйбаяссö сетöны няньөн тöргуйтысьяслы, та вöсна весиг нянь вöдитöмтö оз ёна пыдди пуктыны. Луз берег пöлöнысь аддзан сöмын видзьяс, а муяс вылас ёг турун быдмö.

Ношуль сиктын зэра поводдя вöсна ковмис виччысьны рытöдз — уличъясыс лоины ветлыны шогмытöмөсь. И тайö сэк, кор быд гожöм локтöны сэтчö помтöм уна йöз и олöны ношульсяс вөр шöрын.

Рытнас ми вуджим Луз ю.

Юсянныс 7 верст Чорныш грездöдз, кöні ми узим, а крестьяна вöчисны пур — вуджöдны миянöс Луз ю вомөн (мöдысь тайö юсö лои вуджны сиктсянныс кык верст мунöм бöрын).

Мунім нöшта квайт верст Шишкин грездöдз. Сәні нель керка и эм. А сэся вит верста туй вылын — Чеусовскöй, Беляевскöй да Лекановскöй грездъяс. А сэсянь неылын — Абъячой, Луз ю берегын жö.

1771. Июль 22 (август 2) лун.

Абъячой сиктын ми веськалім Илля пророкы сиöм пермякъяслөн пир вылö. Миян лои позянлун аддзывны пермякъяслысь öткымын суевернöй обряд. Илля лунö чукöртчöны матігöгöрса став грездъясысь Абъячойö. Быд грезд, мукöддырйиыс и кык грезд, öтувтчöны да вайöны öш либö кукань, начкöны да став обществöөн сёйöны-чöсмасьöны: Илля пророкы кевмысьöны öш, а Прокопейлы — меж сёйöмөн.

Пируйтысьясöс ми колим, а асьным мөдöдчим водзö, гөрöм муяс дорті, кöні рудзöг кöдзаяс виччысисны нин сю вундысьяс-

лысь зіль кияс. Верстён-джыныйн мунём бёрын колё вёлі бара вуджны Луз ю.

(Тыдор грездянь Выльгорт грездö вуджём бёрын экспедиция узымөдчис Березники грездын. — Г.Т.).

Мөд луннас мунім көдзём и көдзтём муяс пөлөн квайт верст Векшор грездөдз, көні квайт олысь сөмын и эм. Рытнас нөшта өтчыд вуджим Луз ю да сувтім войковтны Занулье грездö.

Тайö грездяньыс заводитчö медся дженьыд туй комияслөн оланінтьясөдз. Мед төдмавны найös бурджыка, Архангельскö нуодысь туй вылысь кежим Сыктыв юлань.

Йөзөн овмөдтём местаяс да кузь вөлөкъяс вöсна быть ковмис петны туйö верзёмөн. Комиясыд весиг гожём шöрын ветлöны сөмын верзёмөн да доддьөн.

Тані медводз ми төдмалім Кибра вөлөк. Кибраөдз колё мунны 45 верст. Сэні сэтшөмөсь нюръясыс: унаысь ковмис гезъясөн да зоръясөн перйыны вöвъяснымös кадъя зыбуч нюрысь.

Кибра сиктö матыстчигөн аддзим, кутшём сьöкыда сетчис голь олысьяслы нянь вөдитöмыс, торйөн нин рудзөг көдзаяс дөзёоритём. Öзимыс налөн вөлі помтём-пыдөстём вöрын. Сэні найö кералöны пуяссö, сотöны да пöим вылас и көдзöны. Сотём местасö оз гөрны. Уджъяссö кокньөдём да көдзаяссö видзём могысь мыйтакö пу оз пöрöдны — потшöс модаа. Мед найö эз кыскыны мусьыс васö, пуыслысь кырсьсö кульыштöны аршын кык кымын. Татшём нөвинаыс (выль муыс) сетö бур быдтас сөмын öти во, а мөд во колё вöчны выль нөвина. Төдчö эськö, мый комияс эз вермыны ыджыдджык грек вöчны мукөд йөз серти, но тайö сьöкыдысь-сьöкыд уджсö асьныс ас вылас көвъялісны. Асланыс сиктъяс да грездъяс гөгöрын дай посни юяс пөлөн налөн эмось паськыд кушинъяс, көні позьö мукөд йөз моз вөдитны нянь, но этша скöt видзём вöсна оз тырмы куйöдыс, а сытөг абу позянлун кокньөдны-вынсьөдны гөра-көдза тылаястö. Йөз пөвстысь быдөн видзö скөтсö сөмын сы мында, мыйта колё семьяыслы. Вöвъясөн пöшти оз уджавны. Тöлын ветлöны каръясөдз, а гожöмын сөмын матигөгөрö верзёмөн. Телега йылысь дзик нинём оз төдны, а ковмас кө кыскыны мыйкö сьöкыдös, сы вылö эм додь либö вуж додь.

Ен вераö выльөн пыртём комияс петкөдлöны мукөд серти ыджыдджык зильём христианскöй вераын; кутшём көть гольöсь эз вöвны налөн керкаясыс и став олём-вылöмыс, но православнöй вераыс налөн зумыд медводз сы вöсна, мый югдөдіс найös святöй Стефан Великопермскöй. Сійö ачыс вуджөдіс пермскöй кыв вылö вичколы медся колана книгаыс. Но öні став службаыс мунö славянскöй кыв вылын, кыдзи и миян. Став комиыс өд төдö роч кывтö. Ме, кыз мый верми, зили корсьны налысь важ гижөдъяссö, но эг аддзы. Öткымын төдысь йөзлысь аддзи сөмын торъя шыпасъяслысь нимъяссö да комиөдём молитва, кодös лыддьöны öбедня водзвылын.

Кибра погостсянь мөдөдчим водзö Сыктыв юлань, 15 верста вөлөкö. Сійös куим пельö юкöны кык ю — Ёль да Вепр.

Чукаыбын узыём бёрын, июль 25 (август 5) луно мөдөдчим Визин сиктлань. Сэсянь верстён-джыныйн сайын, Визин юлөн веськыдыв берегын — көрт руда перъян рудник. Рудникыс Ньючм заводса көзяин Походяшинлөн. Рудник гөгöрыс неыджыд

мылькъяс. Найос кытшалоны гырысь пуяс. Мылькъясыс артмө-маось сёйысь, дай рудаыс сёй сора жö. Рудаыс пасьтала, слöйөн-слöйөн артмөма. Кызтаыс весь кымын (өнiя ногөн 18 сантиметр), пасьтаыс аршын кымын (70 сантиметр). Му веркөссянь слöйясö-дзыс — öти сыв (2 метр кымын). Руда слöй гөгöрыс быдлаын лöзоват сёй, а улиас еджыд лыа.

Рудасö перйöны ас вöляысь медасьöм йöз. Перйынысö кокни, и та понда мынтысьöны омöлика. Сыв мында руда перйöмысь мынтöны 20 ур. Рудникыс Сыктылö усьысь Визин юсянь неылын, а Сыктыв юсяныс неылын — Ньючим завод. Та вöсна руда вайöмыс бара жö донтöм. Гожся кадö 1000 пуд руда вайöмысь мынтöны 8 шайт, а тöвся кадö — 10 шайт. А 100 пуд рудаысь петö 45 пуд чугун.

Визин сикт медся ыджыд миön аддзылöм став коми сиктъ-ясысь. Сэни лыддысьсö 201 керка. Перепись серти, сэни олö 641 морт. Визинсянь миян туй нюжалiс 13 верст — Пустöшöдз, а сёсянь кык верст — Кунибöдз, көни дас керка и эм. Сэни ми шуим узыны.

Куниб грезд Визин ю берегын жö. Веськыдыв берегыс вы-лынджык, и тöдчö сёй сора еджыд колчедан — неыджыд торъяс да гөгыльяс.

Тайö грездяныс 10 верст сайын, сьöд вөр шöрын, вöли пась-кыда тöдса ключ, кодöс шуöны Зинтамön — юыслөн ним серти. Висьталöны, сiйö пö петкөдö му улысь нефть.

Сэтчö некутшöм туй эз вöv. Кадъя нюр — сьökыд вуджны и подön. Ачыс Зинтам ключыс ыджыд мыльк вылын, сэтысь дзулькiён пуö-петö ва. Кутшöмкö сiм сора. Абу нефть, а сiдз шусяна «распущенной көрт». Тöдысь йöз шуöны сiйöс нюрывса көрт рудаön.

Кунибсянь Межадор сиктöдз вит верст. Көть сиктыс и ыджыд, но унджык керкаас олысьыс абу. Комияс велалöмаось ветлöдлы-ны, странствуйтны. Тшöкыда овлö сiдз: мунасны кытчöкö ылö, Сибирö ли кытчöкö мöдлаö, да сэтчö и кольчöны, а кольöм йö-зыслы быть лоö мынтыны мунысьяс пыдди вотъяс. Но та йылысь ставсö висьтавны он вермы, а мыйкö вöчны — абу менам мог.

Сыктыв ю танi зэв паськыд да визув. Ю кузяыс ветлöны гы-рысь караванъяс. Сыктыв юйывса заводъясысь вайöны көрт. Соликамск да Кайгородок уездъясысь вайöны и нянь.

Верзьöмön ветлöмысь ми ёна мудзим. Та вöсна шуим кывтны пыжön Ыб погостöдз.

(И.И. Лепёхин висьталö, кызди коми мужикъяс заптöны турун и сэк жö асья да рытья кадö вуграсьöны. Сыктывсьыд пö кыйöны сиг, налим, ком, ёкыш, сир, гыч, мык, ёдi, сын, кельчи... — Г.Т.)

Сыктыв ю вывтi кывтигön уналаысь берег пölöныс аддзылiм трунда — торф. Кыз слöйясön петö быдлаын.

Вит чомкост* кывтöм бöрын сувтiм Ыб погостö. Сэтысь ми аддзим комияслысь ыджыд прöстлун, поп-дякöс пыдди пунктöм да кывзысьöм.

Ыб погостын ми босьтiм пипуысь кодйöм пыж. Көть сiйö и абу ыджыд, но крепыд. Нöшта нель чомкост мунöм бöрын петiм

* Чомкост — коми миля пö тайö, 5 верст бердö.

Нювчим ю вомö. Сэсянь вит верст сайын Верхотурьеса купеч Максим Походяшинлөн көрт да чугу́н сывдан, көрт көлуй вöчан завод. И туйыс заводöдз бур — ягті. Нювчим юыс петö нюрысь, но тшöкыда нювчимсалөн ваныс и оз тырмы. Та вöсна заводыс оз пыр уджав. И буретш тайö кадас, миян волігөн, бара эз уджав. Сэні öти доменнöй (чугун сывдан) пач да көрт доран квайт мөлöt, а сідзжö пилитчан мельнича. Походяшинлөн аслас йöз, мастеръ-ясысь кындзи, абу. Заводыслысь кыз уджсö вöчöны татчöс киөн. Тайö йöзыслөн гöльлуныс вайöдіс гырысь казеннöй уджйöзъясö — миян шуöны недоимкаөн. Походяшин недоимкасö мынтіс казна-лы сы могысь, мед комияс вермисны сійöс босьтны, кызди удждон.

Нювчим заводын вöчöм көрта көлуйсö мөдöдöны Сыктыв, Эжва да Двина кузя Архангельскö. Та могысь и вöчöма Сыктыв ю берегын амбаръяс. Сэн жö лöсьöдöма нянь амбаръяс.

Заводсянь öти чомкост ылнаын, Сыктыв юлөн шуйга берегын, Паджга сикт. Тайö сиктöдзыс мунім подөн, чукöртім да видлалім турунъяс. Вöрысь аддзим пуясö көртавлöм туисъяс да шомöсьяс. Тайö вöрса пöткалы позъяс. Комияс тöдöны пöткалысь поздысян кадсö и чукöртöны колькъяссö, кызди асланыс гортса курöгъ-яслысь. Кадсö колö бура тöдны. Пöткатö кө öтчыд повзьöдлан, сійö сэсся аслас позйö некор нин оз волы.

Висьтала нöшта пöткаясöс кыйöм йылысь. Комияс көть масте-рöсь лыйсыны, но пöткатö некор оз лыйны. Пороксö видзöны тöлын вöралöм вылö. Найö ззв мастерöсь сетны пöтка гөлöс и та-дзи чуксалöны найöс водзвыв пукталöм дзугъясö. Тадзи тулысын кыйöны пöткасö быдса кельöбъясөн. Гожöмын пöтка вежö гөнсö. Сэки вöралысьяс беддён виöны найöс.

Паджгаысь ми, бара пыжөн, мөдöдчим Сёська погостöдз. Сэні сэсся и узим.

Июль 29 (выль стиль серти август 9) лун. Сёськасянь Виль-горт погостöдз мунім нель чомкост. Сэсянь сэсся веськöдчим ылöдз нималысь коми карö, кодöс шуöны Усть-Сысольск погос-төн. И збыль, тайö сиктыс став комилөн торйөн пыдди пуктана. Сійöс стрöйтöма Сыктыв ю вомсянь 3 верст ылнаö. Керкаясыс сэні торйөн тöдчанаöсь. Эм и кык каменнöй вичко.

Но эз вичкоясыс кыпöдны комилысь пыдди пуктöмсö, а нимö-дісны сэні олысь озыр Сухановъяс. Найö и асьныс петісны коми рöдысь. Тöргуйтöмын сюсьлун озырмөдіс найöс и вöчис коми князь-ясөн. Быд коми морт лыддё найöс кызд быттё природнöй крестья-нинөн, и Сухановъяслөн став зільöмъясыс таын. Найö сетöны комилы водзвыв колана сём — нянь вылö и вöралöм вылö. Бö-рынджык кушöдз грабитöны, оз кольны весиг олöм вылö медся коланасö.

Аддзан кө бур муяс Усть-Сысольсксянь неылысь да юалан, кодлөн, вочавидзасны: Сухановъяслөн; көнкö кө йирсьöны мөсь-яс, найö сідзжö Сухановъяслөн. Да и Печораын тöчила вöчан удж öні Сухановъяс киын жö.

Тайö коми господасö көть и гижöма Великöй Устюгса купечъ-яс лыдö, но олöны найö карсянныс ылын, и көть ёна полöны рöз-бойникъясысь, оз вермыны венны комияс ылын ыджыдалöмсö. Тайö полöмыс найöс сэтшöма топöдöма — весиг менам некымын морткөд волöмöй кыпöдіс сэтшöм ноксьöм — ме муртса верми сёрнитчыны, мед менö лэдзисны тайö коми князь дорас. Та мо-

гысь дасьті гижодъяс ме водзё сувтөдөм могъяс да менам должность йылысь. Тайос коми князьд эз гөгөрво: турунъяс чукөртны по некод оз ветлы.

Кутшөм лёк да сёкыд олом вөчоны крестьяналы татшөм бокөвöй помещикъясыс да промышленникъясыс, кодъяс оз асланыс чужан местаын овны. Быд морт бура аддзö ставсö тайос, да и ме уналаын вермылі та йылысь паськыдджыка сёрнитны.

Татшөм ногөн помасис миян Сыктыв ю кузя кывтөм. Сійö, кызди висьталöма нин, Усть-Сысольсксянь куим верст улынджык öтлаасö Эжвакөд.

Көть Эжва ю йыв матысмö Печора ю дорö и 700 верст визувтö нюръясті, но сылөн ваис Сыктывкөд öтлаасигөн тöдчымөн торъялö. Сыктывлөн ваис ёна пемыдджык Эжва ва серти, и тайö торъялöмыс Сыктыв ю серти Эжвалөн ыджыдджык визув вöсна.

Сыктыв вомсянь 10 верст улынджык — Слөбöда сикт. Тайö местаясас гожöмбыд эз вöv некутшөм зэр. Став көдзаис, да и йöзыс тшöтш, вöліны кулан выйын. Слөбöда вöлі медводдза сикт, көні ми аддзим татшөмторсö. Эз позь пырны ни öти керкаö висьсяслөн лёк дук вöсна. Висьöмыс — вир сора мыт. Первой висьмöмаось посни челядь и пöшти ставныс кулöмаось. Сэсся висьмöмаось олöма йöз. Некутшөм отсög некодлы эз вöv. Миян сиктъясын да грездъясын бурдöдысяс абуось, да и каръяссьыс Диоген пöнаръясөн найос он аддзы; отсöгыс налы вермис лоны сöмын Архангельск карсянь.

Тайö виччысьтөм аддзысьлом бöрас колö вöлі кызд позьö регыдджык мунны Комиысь. Рытнас нин ми асланым пыжөн воим Емдінö. Сійос стрöйтöма Эжва да Емва юяслөн веськыдыв берегö. Емдін тыдалö ылісянь. Сійос вермасны öткодя донъявны ичöтик каръяскөд. Сэні ветымын керка, вит вичко. Нёлыс каменнöй. Олысясыс, перепись серти, 360 морт.

Тайö слөбöдасö колö вылö донъявны. Сэсянь паськаліс православие став Перым му вылö. Тані вöлі Стефан Великопермскöйлөн столица, тайö слөбöдаас видзисны Стефан Великопермскöйлысь гижодъяссö. Но буретш Емдінысь епархиясö вöлі нуöма Вяткаö, а став гижодъяссö нуисны Хлыновö. И вöвлөм бур да тöдчана местаис кутіс вочасөн бырны. Сэні олысяс нянь вöдитөм помысь олöны. Но таöдз вöвліны Емдінын и озыр купечьяс.

Емдінсянь 18 верст ылнаын — Серёгов. Сэні лöсьöдöма сов пуан пачьяс. Совсö босьтöны не сöмын Комиын став олысьыс, но и Яренск, Сольвычегодск и Великöй Устюг карьяс. Сов пуысьяс дорö позьö мунны мича ягъясті.

Серёгов — Емва юлөн веськыдыв берегын. Берегыс крут да джуджыд. Сэні кык мыльк. Öтиыс — лыа сора аслыссикас нуйт. Мöдыс — известкаа изъяс.

Сов пуан пачьяссö заводитісны вöчны комияс. Первойсö найö босьтлісны муысь петан совсö. Сэсся уджсö котыртісны серёговса олысяс — Опаринъяс. Мыйкö дыра уджалөм бöрын заводсö вузалісны вөлөгдаса купечьяслы — Рыбниковъяслы. Найö пыдöджык сюйисны трубаяссö сола ва перйөм могысь. Тайö сетö налы ыджыд прибыль.

Став пачыс öкмыс. Көкъямыс пачын совсö пуöны дугдывтög, а öкмысöдыс — запаснöй. Сола васö сетö кык труба. Первой трубаас рöсолыс (сола ваис) 11 лот. Трубалөн джудждаис 93

сыв 10 вершөк (өнія мера серти 198 метр 53 сантиметр). Мөд трубаыс босьтө сола васө 83 сыв 10 вершөк пыднаыс (өнія мера серти 177 метр 23 сантиметр).

Став пачьясас кык сутки чөжөн пуёны совсө 150—180 пуд. Во чөжөн лоө 150000 пуд. Совсө сетёны казнаө. Сійө мынтө быд пудйыс 9 ур. Таыс кындзи, совсө видзыс мынтө казналы жө 10 ур быд шайтыс. Пачьяс дорын уджалёны 257 морт, кодъясө мян шуёны *не помнящий родства*. Найө дзик став уджсө вөчёны, пес заптөмыс кындзи. Пессө заптёны комияс. Песлөн мераыс (чипасьяс): 8 аршын кузя, кык аршын судта, быд пес плакалөн кузьяыс 5 весьт. Öти мераыс (места вылө вайөмөн) мынтёны 25—27 ур.

(Вуджөдны кө ставсө өнія мераө — метръясө, артмас со та-тшөм мича серпас. Пес мера (чипас): кузьяыс 5,7 метр, судтаяс 1,5 метр. Пес плакалөн кузьяыс пөшти метр. И та мында пес-кыс, места вылө вайөмөн и быдсөн — 25 либө 27 ур! — Г.Т.)

Серёговса сов пуан пачьяс дорыс сійө жө туйтыс бөр мөдөд-чим Емдинө. Сэсянь 9 верст сайын — Аквад погост. Сэні ми шуим узыны. Мед ог висьмөй вир сора мытөн, мянлы колө вө-ли видзчысыны йөзкөд аддзысьлөмъясыс. Та вөсна ми узим пы-жын.

Заводитчис нянь идралан кад, и ми вермим мыйсюрө аддзыв-ны да төдмавын. Татчөс коми пөшти оз төдны телега. Сьөкыд-торъяс кыскалөны додьясөн. Додьясөн жө ваялөны му вылыс кольтаяс. Тайө ёна бурджык телегаөн дорыс: доддьөн кыскаси-гад и шепъясыс оз гылавын. Муясыс налөн матын, и кольтаяс вайөмыс абу сьөкыд.

Рочьяскөд орччөн олігад комияс асьныс лөсьөдөмны телегаяс, но ас ногаөс — кык көлесааөс. Сійө абу ыджыд, и абу сьөкыд жебиник коми вөвъясыдлы.

1771. Август 1—2 (12—13) лунъяс. Яренск кар.

Аквад погостсянь Яренск карөдз 83 верст. Сэтчөдз пыжөн кывтім некытчө сувтлытөг. Полім висьөм көвъялөмыс (заразит-чөмыс). Рытнас кыптіс сэтшөм ру, весиг матігөгөрсьыс нинөм оз тыдав. Та вөсна ми эг вермөй мунны карөдз и мөд вой ковмис узыны пыжын.

Коді да мыйла вөлі стрөйтлөма Яренск карсө — абу төдса. Сылы абу сетөма некутшөм герб, а юөртөмъяс серти, стрөйтөма сійөс 7144 воын. (Мед вайөдны тайө лыдпассө өнія стильө, колө төдны Пётр I-өн 1699 воын олөмө пөртөм реформа: 7208 во пыдди лоис 1700 во. Торъялөмыс 5508 во — Г.Т.).

Тулысьясын ойдөм Эжва воыс-во нуис берегъяссө и воис дзик кар бердөдзыс. Карын олысьяслы быть лои вешйыны мөд местаө. И өні Эжвасянь карөдзыс вит верст.

Өнія Яренск кар зэв голь оланін. Карас сөмын öти улица. 171 керкаын олысьыс 231 морт. Вердчөны му уджъяс помыс. Но олысьясөн голь Яренск веськөдлө зэв ыджыд уездөн: муясыс паськалөны Печоралань сюрс километр сайө, та мында жө Удора ковтысьясөдз. Устюг районкөд орчча Кибра вөлөсть; Кайгородок районөдз арталөны 350 верст, Сольвычегодскөйөдз — 130 верст.

Став тайө муяс вылас олөны 23933 морт государственнөй крестьяна да 1028 морт — экономическөй крестьяна. Нывба-баяслөн лыдыс вевтыртө мужичөйяслыс лыдсө. Став нывбабаыс

26706. Торъялөмыс 1747 юр лыд. Тайö сы вöсна, мый коми велалöма ветлыны ылі муясö и унаöн кольччöны сэтöнъяс нэм кежланьс, торйöн нин Сибирö, көні бура быдмö нянь.

Яренск уездлөн помтöм-дортöм ыдждаыс да аслас карыслөн оласногыс ёна отсалö сэтчöс олысьлөн гöльлунлы. Кöть правительство и зільö велöдны нянь вöдитöмö да дугöдö кыйсьöм-вöралöмысь, но меным кажитчö: вöчны наысь тöлка крестьянаöс некор оз артмы. Крестьянин велалö уджавны сэк, кор уджыс вайö пöльза. Гырысь каръяс дорын олiгөн сийö, кыз шуласны, быдторйысь сьöм пычкö. Няньысь кындзи вузалö мöс и ыж, кольк, вый и йöв. Но кодлы вермас ставсö тайöс вузавны вöрын да нюръяс сайын олысь крестьянин? Кор и карас быдөн заптöны танi став индöмасö, тшöтш и нянь. Та вöсна комияс оз зильны стрöитчыны сиктъясад и гортса став сёян-юансö асьныс и сёйöны-юöны.»

Но кад нин и Яренскысь мунны. Лои тайö 1771 вося август 3 (выль стиль серти 14) лунö. Экспедиция мунiс Иртаö... А сесся Эжва да Двина кузя Кардорöдз (Архангельскöдз). Сэтчö воисны август 30 (сентябрь 10) лунö.

Кöть пырмунiгмоз, а колö гарыштны куим кар йылысь, кодъяс кыздикö йитчöмаöсь вöли Коми мукöд, и öнöдз тайö йитöдыс зэв уна ногөн тöдчö. Каръясыс: Великой Устюг, Совдор (Сольвычегодск) да Кардор (Архангельск). Яренск йылысь висьталiм нин. Содтöд пасьям, мый тайö кар улас 1921 воын, Коми обласът котыртöдз, вöлины Емдiн да Удора районъяс ставнас и Сыктивдiн районлөн джынйыс.

Совдорын И.И.Лепёхинлөн экспедиция олöма вит лун — август 5 лунсянь 10 лунöдз (выль стиль серти август 16—21 лунъяс). Карсö пö сэтчö стрöитöма, дерт жö, сола ключьяс вöсна,— гижö путешественник. Сов пуан пачьясыс первойсö вöлины Строгановъяс кийн. Найö и стрöитчисны первой да кыпöдiсны медся мича стрöйбаяссö, медводз, дерт, мича собор. Сэни пö вöли видзöны казна,— пасйö И.И.Лепёхин.— Казнаас важ сьöм видзисны, кодöс шуöны кучик деньгаөн. Öнi сийö «сьöмыс» сiсьмöма, а мый коли, нуисны Москваö. «Кучик сьöмыс» танi эз вöв Москваын кодъ. Найö вöлины быдса зверь кучикъясысь и кучикыслөн юкөнъясысь. Сэсянь и лоины «полушкаясыд».

Путешественник висьталö и сов пуöм йылысь. Сийö пö дзикöдз киссис, нинöмö пöрис. Вöвлöм 50 варничаысь уджалö сöмын öти. Серёговса пачьясын солыс «пуксьö» кык суткиөн, Совдорын нель суткиөн. Совдорса олысьяслы быть ковмис ньöбны ставсö Серёговысь.

Совдорыд сэки нин вöлöма прамöй ыджыд кар. Сэтчö овмöдлöмаöсь государственной черносопной крестьянаöс. И.И.Лепёхин гижö, Сольвычегодскын пö олöны 12354 морт крестьяна, нöшта барон Строгановъяс рöдысь 1532 морт да экономической ведомствоясысь овмöдöм 2968 морт. Купеческой половникъясысь лыддьыссьö 2993 морт, а став олысьыс карас 19847 морт. Тайö уездас пырлiсны Луз да Летка пöлөн олысь комияс.

Устюг кар пö вермас лыддьыссыны медбуръяс лыдын не сöмын Архангельск, но и мукöд губерниясын,— пасйö путешественник.— Вичкоясысь да архиерейлөн керкаысь кындзи, ставыс пу

стройбаяс. Карыс сэтшөм местаын, мый ставыс тан тшөктö тöргуйтны: Сухона, Луз да Ветлуга юяс йитöны Устюг карсö уна сё сикткöд да грездкöд. Сэтысь вайöны нянь и яй, дзик быд сикас тöварсö. Оз этша нуны и Устюг пыр Архангельскö.

Пасъям нöшта, мый Великой Устюгын чужис да быдмис коми йöзöс югдöдысь да велöдысь Стефан Храп (Пермскöй).

И медбöрын, Кардор (Архангельск) йылысь. Тайö нима губерняö пырисны Печора да Изьва бердса сиктъяс да грездъяс.

1771 вося август 30 (выль стиль серти сентябрь 2) лунö И.И.Лепёхин воис Архангельскö.

Двина ю дорын медводдза (первобытнöй) олысьяссö нимтылисны чудьясöн. Найö торъявлісны кык пельö: öтияссö шулісны заволоцкöй чудьöн, мöдъяссö ливонскöй чудьöн. Но кыкнанныс важысянь вöліны Новгород власът улын.

Двина пöлön олысьясöн Новгородлön веськöдлöмыс помасис Иван Грозныйлön дед, Россияса великöй князь Иоанн Васильевич дырйи.

Марфа-посадница мöдöдіс Двина вылö военнöй вын. Двина бердса муяс вöсна чорыд кось Москва да Великой Новгород костын заводитчис 6979 (1471) вося июнь 6 лунö. Москва веніс новгородсаöс, и Двина бердса муяс лои öтлаöдöма Москва улö.

Москваысь воём начальникъяс пуктісны Архангельсклы, выль карлы, подув. Медводдза посадскöй олысьясöс вöлі мездöма вит во кезлö быд сикас вотъясысь.

И.И.Лепёхин висьталö и Печора да Изьва йылысь, но сэтчöс олысьяс йывсьыс весиг оз гарышт. Тадз жö артмö и Усть-Цильма йылысь — висьталö сöмын сьöмга кыйöм йылысь.

Медбöрын путешественник висьталö архангельскса купечество йылысь. Ревизия серти кö, россияса купечествоыс пö Архангельскын лыддысьсö 964 морт. Таысь кындзи пö Архангельскын уджалö мукöд странаысса купечьяслön сизим контора. Роч купечьяс пö ветлöны тöргуйтны Сибирö и уна мукöд каръясö, весиг Англияö, Норвегияö да Бельгияö. Быд во овлö, öнiя ногön кö шуны, кык ярманга. Гожöмын море сайын вузасьöм, а сентябрын Архангельскö локтöны судноясöн Новая Земля дісянь, Шпицбергенсянь, Норвегиясянь да Англиясянь.

Со татшöм пасйöдъяс Иван Иванович Лепёхинлön.

Стöчмöдöмъяс

Вель дыр мöвпалі, мый гижны либö стöчмöдны. Весиг куим ногön гижлі сиктъяс, грездъяс да юяс йылысь. Но нинöм эз артмы. Нимъяссö сэтшöма торкалöма — статьясö лыддысьлы ковмис эськö быд лист бок лыддигön дас—дас витысь корсьны примечаниеясысь колана кыв... И тайö абу дивö. Путешественник эз тöд коми кывтö, весиг эз куж правильнöя шуны коми шыпасъяссö. Та вöсна и артмисны Ньючим пыдди Ньючим, Нюхчим либö Ньючин, Паджга пыдди Пачьги, Вильгорт пыдди Вилегоры либö Вильгары, Чукаыб пыдди Чукан, Куниб пыдди Кунаб, а Чёрныш пыдди Шорнов... Шошка и Шокша, Керас и Сорт да с.в.

Мед эз ковмы корсьысьны, ме став торкöм нимъяссö вежлалі öнiя нимъясöн.

Книгаыс заводитчö сибирса Тюмень кар йылысь висьталöмөн. Сэни И.И.Лепёхин колляліс көдзыд төв, сэсянь заводитчис сылөн путешествиеныс. И оз весьшөрö шу: «Тюменьсö колö сибирса став каръясысь вылөджык донъявны. Сэсянь заводитчис Ермак Тимофеевичлөн мөд походыс». Путешественник сэн жö пасйö, Ермак пö кувсис 7092 воын. Та йылысь уналаын висьталöма. Но кызди да мыйла лоис 7 сюрс 92 воыс? Став выль справочникъясын индöма Ермаклысь кулан восö — 1584.

Пётр I реформаөдз вояслысь лыдсö арталісны «став мирлы подув пуктöмсянь» (рочөн — «от сотворения мира»). Пётр I 1699 во декабрь 15 лунся указөн индіс воыслысь выль заводитчöм: 7208 вося декабрь 15 лун бöрын лои миян эраса 1700 во январь 1 лун.

Но Пётр I эз артышт лун лыдсö дас көкъямысöд да водзö лоан нэмъяслысь. Та вöсна 18 нэмса (1701—1800 вояс) важ стиль дінö колö содтыны 11 лун.

Пример пыдди вайöдам А.С.Пушкинлысь чужан лунсö. Важ стиль серти, сійö чужис 1799 вося май 26 лунö. Выль стиль сертиыс тайö лоö июнь 6 лун. Артмö тайö со кызди: май 26 лун дінö содтам 11 лун. Лоö 37. Сэтысь чинтам май тöлысь лунъяс: $37-31=6$. Тайö июнь 6 лун. Тайö лунсö и пасъям ми, кызди А.С.Пушкинлысь чужан лун.

19 нэмын (1801—1900 вояс) выль стильыд лоö важ стиль дінас 12 лун содтöмөн. Пример пыдди босьтам В.И.Ленинлысь чужан лунсö. Важ стиль серти сійö чужлöма 1870 вося апрель 10 лунö. Содтам та дінö 12 лун и лоö апрель 22 лун. Тайö лунас и пасйöны В.И.Ленинлысь чужан лунсö.

20 нэмын (1901—1917 вояс) вежлавны колö сöмын 17 вося да öти тöлысь датаяс — 1901 вося январь 1 лунсянь 1918 вося февраль 1 лунöдз.

РСФСР-са Народнöй Комиссаръяслөн Сöвет 1918 вося январь 26 лунö аслас декретөн пыртис выль календарь. Важ стиль серти 1918 вося февраль 1 лун пыдди лои февраль 14 лун выль стиль серти.

Календарь серти реальнöй воыд сöмын 26 секунд мындаөн куздьжык. Тайö торъялöмыс чукöртö быдса сутки, григорианскöй календарь серти, 3300 во мысти. Реформасö вöлі нуöдöма 1582 воын. Сутки мында торъялöмөдзыд колö на овны 2882 во. 3300 вöсьыд олім сöмын на 418 восö.

Нöшта öти тырмытöмтор, кодöс колö бурджыка вöсьтны. Сёрниыс коми да коми-пермякъяс йылысь, налөн оланін да кыв йылысь.

И.И.Лепёхин шуö: «Прокопьевкаын нин олісны пермякъяс». Сэсса Леткаö и Ношульö, Абъячойö и Занульö матыстчигөн висьталö пермякъяс йылысь, көть сійö местаясас пермякъяс бөръя вйтсё восö эз нин овлыны. Академик зэв радпырысь гижö, мый сылы мойвиис аддзывны Абъячойын пермякъяслысь Илля пророкы сійм пир.

Занульö воём бöрын путешественник нöшта öтчыд стöчмөдö, тайö грездяныс пö «заводитчö медся дженьыд туй комияслөн оланінъясöдз».

Ставыс тайö абу збыль. Видзöдлам, мый гижисны учөнöйяс И.И.Лепёхинлөн Комиö волөм бöрын 130 во мысти. Мед оз ло

сорласьом, войтырсö кутам нимтыны пермякъясөн да комиясөн. (Комиясыд асьнысö некор эз шулыны «зырянанад»).

«**Пермякъясыд** комияслы матыса племя. Важ роч летопись-ясын найöс шуöны «заволоцкöй чудьöн». Скандинавскöй мойдъясын найö «биармеецъяс». Асьнысö нимтöны: «ками морт». Олöны öнiя Пермскöй губерняса нель неыджыд районын. Но важ кадъясö овмöдлiсны паськыд муяс. Öнi сьöкыд висьтавыны пермякъяслысь лыдсö. Индöм районъясас унджык олысьыс сёрнитöны рочöн. Пермьцкöй кыв вылын сёрнитысь войтырлөн лыдыс воысь-во чинö. Православнöй вераö пермякъясöс пыртiс Стефан Пермскöй 14 нэмын». «Большая Энциклопедия». 1904 во, том 15, 64 л.б.

«**Комияс**. Царскöй власьт дырйи найöс шулiсны «зырянаöн». Тайö кывйыслысь этимологическöй тöдчанлунсö öнöдз абу восьтöма. Асьнысö найö шуöны «ками морт», «ками» и «коми войтур». (Дерт, эз тадзи нимтыны асьнысö комиясыд, а шулiсны: коми морт, комияс, коми войтыр). Налöн рöдвужыс финн войтыр. Öнiя учёнойяс (Попов, Дмитриев, Смирнов) шуöны, комилөн рöдвужыс пö чудьяс.»

«Комиясöс медводз тöдмалiсны новгородса. 11 нэмын нин найö перйисны комилысь дань. 14 нэмын налöн став муыс вöлi великöй князьяс кийн. 14 нэм помын святöй Стефан пыртiс комиясöс православнöй вераö.

Медся уна коми олысьыс Вологодскöй губерняын, торйөн нин Устьысольск, Яренск да Сольвычегодск уездъясын». «Большая Энциклопедия», 1902 во, том 9, 751 л.б.

Буретш Сольвычегодск уездö и пырлiсны Луз да Летка юяс-бердса сиктъясыд. Олiсны сэнi комияс. Пермякъяссыд найöс торйöдiсны Вятка губерняса роч уездъяс.

Луз районын ме олi куим во да джын. Комсомолын уджалiгөн волi дзик быд сиктö да грездö, Поруб да Öнмөсьт грездъясысь кындзи. И тöдлi сöмын кык пермяцкöй кыв. Öтиыс «йöрдös» — дөрöм, мöдсö ог нин помнит. Вермас лоны, «тöрсьы». Сiйö лоö — панаясь, сөй. Ми вöлi чайтам: тшöктöны топöдчыны, матöджык сибöдчыны.

Öнiя коми учёнойяс (филологъяс да историкъяс) абу сöгласöсь И.И.Лепёхинкöд.

Примечаниеясын вайöда сэтшöм кывъяс да нимъяс, кодъясöс, чайта, колö гөгөрвоöдны.

Пётр I Великöй (1672—1725). 1682 восянь роч царь. Россияса первой император. Пöртiс олöмö тöдчана реформаяс. Бура веськöдлiс войскаөн.

Иван Грозный (1530—1584), став Русьын великöй князь, медводдза роч царь (1547 восянь).

Марфа-посадница — Новгородса посадник И.А.Борецкыйлөн дöва. Веськöдлiс Москвалы паныд мунысь бояраясөн. Новгород карсö Московскöй государство дiнö öтлаöдöм бöрын арестуйтiсны.

Посадник — Новгородын 12—15 нэмъясö медвылыс государственнöй должность. Бöрйылiс вече медся тöдчана йöз пöвстысь.

Посадскöй йöз — Роч государствоын карса олысьяс. Вузасьысьяс да промышленникъяс. Мынтiсны тöргöвöй пошлина да вотьяс. 1775 воын купечьясöс торйöдiсны мецанаысь.

Черносошнӱй крестьяна — Роч государствын 14—17 нэмъясӱ личнӱ вольнӱй (свободнӱй) крестьяна, кодлӱн вӱлӱ общиннӱй му. Пӱртӱсны олӱмӱ государственнӱй повинностъяс (уджъяс). 18 нэмын лоисны государственнӱй крестьянаӱн.

Экономическӱй крестьянаӱн 18—19 нэмъясӱ лоисны манастыръяс да вичко бердын уджалысьяс.

* * *

Тайӱн эськӱ и позис помавны 120 восайса путешествие йывсьыд сёрнисӱ. Но быть колӱ бур ногӱн пасйыны Иван Иванович Лепёхинлысь ыджыдысь-ыджыд уджсӱ. Сійӱс и талун донъялӱны зэв вылӱ. Путешественник эз тӱд коми кывтӱ, но бура гӱгӱрвоис прӱстӱй йӱзлысь олӱмсӱ, сьӱкылдунъяс венны зӱльӱмсӱ. Учӱнӱй, путешественник — уджалысь йӱз дор. Тайӱ медся донаыс И.И.Лепёхинлӱн став олӱмас да уджас!

И дзик нин медбӱръя пасйӱд сы йылысь, кыдзи веськаліс тайӱ донасьыс-дона книгаыс менам библиотекаӱ. Та йылысь висьталӱ кык гижӱдтор — автографъяс. Вайӱда найӱс. Гижӱма рочӱн, да рочӱн и сетам.

1948 вося июль 28 луӱ кутшӱмкӱ А.С... козьналӱма книгасӱ:
«Дорогому другу Владимиру Георгиевичу Зыкину на добрую память».

Коми пединститутса доцент, менам бур ёрт да ыджыдджык друг, ачыс книга радейтысь, улӱджык содтӱс:

«Другу, писателю Г.И.Торлопову на добрую память с пожеланием новых успехов в деле собирания книг, рассказывающих о коми народе. В.Зыкин. 22 марта 1974 г.»

Вермӱмыд (успехыд) регыд и лоис. Владимир Георгиевич вузалӱ меным медводдза роч «Ыджыд Энциклопедия», кызь том. 100 шайт сӱмын и корис...

❖ ❖ ❖

Галина Варфоломеевна Поповалён (Макаровалён) челядьдырыс кольёма Кёрткерёс району, Вомын сиктын. Гижёдсё пыртіс редакцияё чойыс, Антонина Варфоломеевна Юркина. Олө пө чойёй өні Краснодарскөй крайын, но оз вунөд, мөдарө на, сибөдчө талань, гижө. Чужан муыд, тыдалө, век кыскө. Гижөдас Галина Варфоломеевна висьталө, мый чуйдөдөма сійөс кольны казътылөмъяссө. Чайтам, уналы воас сьөлөм вылас сьлөн сьөкыд, но медся шуда кад йылысь висьтыс.

Редакция.

Галина ПОПОВА

А кыдзи нө эскытөгыс

КАЗЪТЫЛӨМЪЯС

Тыдалө, олөмсө донъялөмыс өнія том йөзлөн сэтшөм, мый унаөн бать-мам да пөль-пөч йывсьыныс төдөны ылөсас. Да и лоас кө төдны көсйөмыс, чайта, кызвыныслы висьталысьыс оз нин сюр.

Та вөсна и чужис мөвп юксьыны өткымын медся төдчана, сьөлөмө йиджөм казътылөмъясөн. Гижыштны баб (Прасковья Максимовна), бать-мам (Варфоломей Петрович да Анна Митрофановна), чой-вок йылысь. Эска, пасйөдъясөс лыддьөм бөрын кодсюрө көсъясны жө кольны казътылөмъяссө. И тадзи водзө: пөль-пөчъяссянь ныв-пиянлы да внукъяслы...

Выль керкаө, көні коли челядьдырөй, пөль ордысь вуджлөмны 1930 воын. Сідзкө, ыджыдджык воклы, Иванлы, 11 арөс вөлөма, Ольөксейлы — 9, Борислы — 6, Тонялы — 3, а Раялы и воыс на абу. Мам висьтавліс, керкаас пө пырим пос кузя, кильчөыс пө стрөйттөм на вөлі. Бать кыпөдліс ён, нель жыръя, гожъян-төвъян юкөнъяса керка. Ошиньяс ыджыдөсь, югыдөсь. Гожъян юкөнас гартчысь пос нүөдіс балкона жырйө. Төвъянас — ыджыд пач да паськыд пөлатыс — ставсө артыштөма уна челядя семья вылө. Уліас нөшта өти жыр, кытчө сувтөдісны мамлысь кысян стансө. Но кадыс вөлі сьөкыд, стрөйтчөм вылө сьөмыс пыр эз тырмы, и төвъян юкөнсө мам медалөмөн эштөдіс сөмын 1960 воясө.

1931 вося сентябрын чужи ме.

Медводдза казътылөм... Вөлі меным ар куим. Петкөдісны ывлаө, сувтөдісны лым вылас. Лөзов пушыд лым толаыс чуймөдіс менө. Босьті лымсө да зэв тэрыба куті сюявны вомө. Видісны, дерт, а ме ассьым... Одва и пыртөдісны гортө. Сэки, тыдалө, и чужис сьөлөмын вөр-ва дінө муслуныс, а еджыд лымйыд, збыльысь кө, и өнөдз на шемөсмөдө.

Ичөт дырйи миян бөрся ёнджыкасө видзөдіс баб, и, дерт, Тоня,

ыджыдджык чойй. Быдмим съорсьон-бёрсьон, отсасим бать-мам-лы. Гожомнас уна кад коллялім Эжва дорын. Тэрмасьомон вочлім мамон тшөктөмсө, да ыджыд чукөрөн котөртлім купайтчыны.

Ытва дырйи өтчид пукалам ю дорын. Вөлі көдзыд, да пестім бипур. Ми Веня Иякөд заклад вартім: коді дас өтиысь вермас пыравны көдзыд ваас. Ия өтчыдысь и пыраліс, да дугөдчис. А ме эг. Шонтысьышта бипур дорас, и бара ваё. Кымынысь удиті пыравны, ог төд, локтісны Тоня да Иялөн ыджыдджык чойыс, Настя, и кузь ньөрьясөн вөтлісны миянөс гортө. Көдзыд ваад купайтчөм бөрын дыр тупляси ты өдөмон. Весиг өнөдз казытыла сьёкыда висян лунъяссө. Бурдөдісны, дерт, турун-зелляөн. А сэсся карысь воис Максим дядь (ог төд, корисны сійөс, ачыс локтіс ли) да мый-такө кад юктөдіс кутшөмкө таблеткаясөн. Лунтырьясөн паччөр вылын куйлі да буквар листалі. Коркө сэсся кокньөдіс жө...

Лыддысьнытө школаөдз на велавлі. Чой-воклысь юаси шыпасьяссө да сэтшөма росмөді сідз нин важиник букварсө, мый школаө мунны ковмис сытөг.

Но менө сійө пөрийө эз босьтны. Думысь велөдчыны муні, а Юлия Васильевна шуис, мый прөст партаыс абу нин да и арлыдыд пө озджык судзсьы. Доршасян синваён петі классыс, кайи мөд жырийын сулалысь ыджыд пач вылө, сы бердын переменяс дырйи шонтысисны велөдчысьяс, да гораа бөрддзи. Петіс Юлия Васильевна, скөракодь шуис, он пө лэдз нуөдны уроксө, да вөтліс ывла вылө. Со и велөдчыссис...

А мөд вонас сюсьджыка нин вөчи: чеччи квайт час асылын да котөрті тётя Лиза ордө, көні патеруйтіс велөдысьным. Юлия Васильевна узис на. Ковмис виччысьлыны. Орчча керкасьыс петіс тшөтшьяй, Микит Опонь Миля. Ме пө аддзылі, шуө, велөдысьыд петаліс нин ывла вылад. Кутім вензыны. А веныд тай тышөдз волө. Милялысь чуньсө весиг курччи... Дерт, таысь видісны сэсся. Но школаө босьтісны.

Куим класс төрөдчис өти жырийө: быдөн аслас радын, пукалісны медводдза, мөд да коймөд классьяс. Велөдысь уджаліс съорсьон-бёрсьон. Меным тайө өдйө дөнзис. Миян сөмын «мы-а-мы-а, пы-а-пы-а» лыддьоны да нөшта мөвпалөны на, мый сійө сэтшөмыс, а ме став лист боксө нин эштөда да босьтча вильшасьны. Юлия Васильевна тшөктө гижны бедьяс, а ме гига шыпасьяс; тшөктө шыпасьяс, ме кывьяс нин гига. Весиг сёйыштны вевьяла: чепөльта нянь тор, сюя вомө да чөскыдпырысь нёняла ёкмыльсө. Унатор эз кажитчыв велөдысьлы: ме и шуйгач, и пыр бергала, видзөда, мый вөчөны мөд да коймөд классаяс. Та вөсна тшөкыда вөтлывліс өдзөс сайө. И со кытчөдз вайөдіс вильшасьомй: поведениеысь — «кол»! Шогалі, дерт, но сідзсө велөдчи бура, көть выль буквар эз и вичмыв.

Гортын рытьяснас чой-вок чукөр өзтылім карасин лампа да дасьтысим урокьяс кезлө. Төвнас лөсьөдчывлім паччөр вылө. Микөд, пыр кутшөмкө ки уджөн, ноксис и бабным. Лыддысьны ни гижны сійө эз куж. А миян кындзи кө некод гортын эз вөв, уджаланмозыс нюркйөдлөмон лыддьөдліс нимкывьяс. Вежөр-тассө, гашкө, гөгөрвоис жө, көть рочнас ньөти кыв эз төд. Бать-мам асывсянь сёр рытөдз уджалісны, а баб — миянкөд.

Мамкөд найө олісны бура. Некор эг кывлы, мед өта-мөд вылас кыпөдлісны гөлөснысө, көть ёна и сьөкыд вөлі олөмыс, дай,

чайта, видчан помкаыс тырмыліс жӧ. Ставсӧ ӧд ковмыліс шӧрипӧв юкны: и сьӧкыд уджсӧ, и тшыглунсӧ, и тӧвся кӧдзыдъяссӧ.

Быд ар бабным нуӧдліс аслыссяма агитационнӧй удж: «Анна,— шуліс сійӧ мамлы,— бара став нывтӧ школаӧ мӧдӧдан? Мед кодкӧ гортӧ кольччӧ, паськӧмыс ставныслы оз жӧ тырмы-а». Ӧтсӧгласӧ оз воны, да баб сьӧрсӧн-бӧрсӧн сӧрнитліс и миянкӧд. Медводз видлас вӧйпӧдны Тоняӧс да Раяӧс, а сӧсся нин менӧ:

— Тэ, Галя, кымын класс помалін?

— Нельӧдӧ муна.

— Тырмас нин велӧдчынытӧ, гортӧ таво кольччы. Гын сапӧгыд абу, пальтоыд — дӧмас вылын дӧмас, да и чышъяныс ставныдлы оз тырмы. Абу мӧй дыш быд лун кӧдзыдтыс куим верст сайӧ ветлыны. Гортын со мыйта уджыс!

— Ог!— вочавидза лӧня.— Муна!

— А кынмӧдчан кӧ да кулан?..

Но и тайӧ оз мӧрччы: ме ӧд виччысьны нин ог вермы велӧдчан во заводитчӧмсӧ. Баб ышловзъӧ да сетчӧ. Но веськыда колӧ шуны: бур отсасысьыд меыс эскӧ эз ло... Сямлунӧй серти ӧнджыка зонлань мунлі. Нывбаба уджтӧ эг радейт, торйӧн нин, шуам, пӧтка куштыны. Гӧныс оз нетшкыссы, кучикыскӧд кульсӧ да чуньяс бердад лясалӧ. Менӧ вӧвъяс дорын ноксьӧм, вӧралӧм да чери кыйӧм кыскисджык. Медводдзаыс вӧв вылад вит арӧсӧн пуксьылі, да сӧсся быд гожӧм нин вӧв вылын коллялі. Тувсов каникулъяс дырйи йӧзкӧд радыс петкӧді куйӧд, агсасьлі, ветлі йирсьӧдчыны, гожӧмнас турун юръяс кыскалі, а арнас вартан машина дорын вӧвнас веськӧдлі. Но войся йирсьӧдчӧмъяс вылӧ мам лӧдзліс неокотапырыс. Тшыг нисӧ пӧт ужын бӧрын гежӧда лишавліс некымын картупельыд — войся бипур дорын медчӧскыдторйыс! Тшӧкыда гусьӧн мудйылім быдмыс картупельсӧ колхоз му вылыс. Пӧжалам, чуньяс сотавмӧн кулям да чӧсмасям руалыс, рыс кодь рӧшкыд пытшкӧснас...

Кор видз вылын либӧ гортӧ воигӧн ордйысьлім, ми Катша вӧвкӧд пыр кольлім бӧрӧ. Катша вӧлі пӧрыс нин, омӧль. Забеднӧ, кӧть и нывкалы, окота лои чожджык вӧв вылӧ пуксьыны, и регыд вуджи неыджыд тушаа, перкаль рӧма том вӧв вылӧ. Зеленеч нима сійӧ вӧлі. Но коліс быд асыв тышкасьӧмӧн мырддыны тшӧтшъяслыс. И некутшӧм зон нин эз вермы вӧтӧдны миянӧс ордйысигъясӧ. Но коръяскӧ и аслам пӧрыс Катша вылӧ пуксьыны ковмыліс.

Ӧтчыд мам воис лысьтысянінсьыс да шуис, Катшаыд пӧ кувсӧ шор дорын. Котӧртӧ сӧтчӧ. Катша педзӧ места вылас: кынӧмыс дундӧма, кокъясыс оз нин кывзысьны. Мыйӧкӧ крукасис да сьӧкыда лолыштӧмӧн пӧрис. Ыджыд, сьӧд синъяссьыс чепӧсйис синва. Видліс на сувтны, но эз нин вермы...

Веськыда градъяс вывтӧ котӧртӧ гортӧ. Мам, тыдалӧ, гӧгӧрвоис менӧ да бурӧдӧмӧн моз кайтіс: «Мый сӧсся вӧчан, зӧв нин пӧрыс Катшаыд вӧлі. Сюрліс коньӧрлы сьӧкыд уджыс».

Катша уна во уджаліс миянкӧд. Ог тӧд, ветлісны-ӧ сійӧн ыджыдджык вокъяс, Иван да Ӧльӧксей, но меӧдз дыркодь уджалісны Борис да Рая. Ӧнӧдз на казътывсӧ ӧти лоӧмтор: Ӗжва мӧдлапӧлын, Уръӧль ты дорын, пуктім турун. Рытнас Раякӧд Катша вылад мӧдӧдчим гортлань. Лов выланым гажа — турун пуктӧм помасис.

Надзёник рёмдіс. Катша рөдтіс векньыдик ордымті. Друг кру-касис пу вужляё, и ми чойкөд юр вывтійс да му вылө. Окота вөлі бөрддзыны, а видзөдлім өта-мөд вылө да серамным петіс.

— Тэ доймин?— юалө Рая.

— Эг, сөмын нырөй көрсьыліс.

— Менам тшөтш...

И нөшта на гажаджыка сералам. А Катша вөрзөдчывтөг су-лалө да виччысьö, кор нин пуксям да водзö мунам.

Дерт, вөліны ичөт дырйи и мукөд, мичаджык да чожджык вөвъяс, но медся донаөн да радейтанаөн колис Катша!

Бабным некор эз пукавлы уджтөг. Косіник, мышкыртчөма, пыр мыйкө нокис. Төвнад өтпөлөсөн сёйсь луннас то ывлаё, то посводзö, то сарайö петавліс, да пыр насмукаасис. Гожөмнас ра-дейтіс ветлыны вөрö: тшакла да вотөсла. Позьö шуны, быдмис вöрас, а кык пу костö кө — вошліс нин. Нөшта и омөля кыліс, да пыр кодөскö аскөдыс босьтіс. Отчыд пырим вöрас, а чөдйис — тальччыны некытчö. Öкта-өкта, и друг кыла баблысь повзьөм гөлөссö:

— Галя, тэ көні?

— Тані,— горөді.

Видзөда: босьтіс көрзинасö и мөдіс. Но эз мелань, а дзик мө-дарö. Нөшта горөді, но эз кыв. Ковмис котөрөн вөтчыны бөрсьыс, мед не воштыны. Весиг лолөй тырліс, өдва и вөтөді. Öтнас, дерт, ылөтö эз ветлы, вотчис вөр бокъясас.

...Төвся кузь рытъясö ставөн, Боря, Тоня, Рая, ме да Люда, пукалам бабкөд паччөр вылын, виччысям бать-мамөс. Со и кок шыяс: тэрыбыс — мамлөн, а ньөжмыдыс да лабутнөйыс — бать-лөн. Кылас перво йизьөм гын сапөгъясөн кильчö помö тотшөд-чөм, посводзын джодж плака дзуркнитөм — и еджыд ру сорнас пырасны керкаö. Гортын пыр жö лоас гажаджык. Регыд сэсся и ужнайтам ставөн өтвыв. Пызан вылын шома шыд тасьті либö, мый овлө тшөкыджыка, тшак ва. Кор няньөн сёям, а кор и сы-төг. Шыд бөрын йөв либö ляз. Абу ёна пөтөс, но быть өд сөй. Сэсся и унмыд нин локтö. Челядь водалам пөлатьö, баб — паччө-рö. Меным кажитчыліс жö паччөр вылыд: баб палгас важ пась, мыччас ассьыс нэмөвөйся юрлөссö:

— Босьт, небыдджык лоас, а ме лук мешөк юр улө пукта.

Ме ог босьт, көть дыр сэсся ог вермы унмовсьны: быттьö ув-лань юра куйла.

— Бабö,— шөпка,— мойдышт мыйкө.

— Ог өд төд нинөм.

— Но, көть олөм йывсьыд.

— А мый олөмыс? Уджалі да челядьөс быдті — со и ставыс. Бурджык, тэ висьталышт мыйкө.

И ме висьтавлі баблы ставсö, мый лыддьылі. Вөлі чорыда эска: кызди небөгас гижөма, олөмас збыльысь сідзи и эм. Баб, тыдалö, сідз жö чайтіс. И öти рытö öтлаын бөрдім, кор висьталі Мальчиш-Кибальчиш йылысь. Баб чуймалö на вөлі:

— Кытысь тэ ставсö тайөс төдан?

— А нигаясыс нө мый вылө?

— Но тэ өд видзөдан сөмын, он лыддьы?!

Сідзи, тыдалö, и колис баблы гөгөрвотөмөн, кызди лыддьы-сьöны. А оліс сійö дыр, көкъямысдас өкмыс арөсөдз. Быд во

тулыссӧ ӕна виччысис. Тӧвнас кувны полӓс, гусӧ пӧ кодйыны сьӧкыд лоас. А стӧч медся веж кӧдзыдъяснас и кувсис, 1949 воӧ. Чеччас мам асывнас, ломтас пач, сӕян пуас. Баб пырджык сьӧкӧд чеччывлӓс, отсасис мый вермис. А сӕки оз чеччы. «Мед узьыштас на», — думыштас мам. Сӕйны садьмӧдас, а баб кулӧма. Ме сӕки карын олӓ, Тоня ордын, дасӧд классын велӧдчи. Мамсянӧ письмӧыс воис бабӧс дзебӧм бӧрын нин. Дыр бӧрдӓм Тонякӧд. Казьтылӓм бабӧс да тшӧтш и батьӧс. Ӧд кык во сайын на и кув-сьылӓс сӓйӧ.

Батьным, Варфоломей Петрович, эз куритчы и некор эз юлы. Но праздникяс дырйи эз жӧ пельӧсын пукав, мӧдарӧ на, гажаа да окотапырысь висътасьлӓс. Ӗна радейтлӓс лыддьысьны, век судзӧдлӓс быдсяма газет-журналтӧ. Шулӓс кӧ мамлы: «Ветла правлениеӧ газет судзӧдны», син водзӧ сувтлӓс серпас — правление дорын сулалӧ ыджыд сюръя, и сӕтчӧ бать газетла кайӧ... Лыддьӧ-масӧ некор эз шыблав, ӧшлӓс кӧрт тув йылӧ. Торъявлӓс мукӧ-дысь киподнас и идӧрлуннас. Первой Мирӧвӧй вывсьыс на вайлӧ-ма трофейнӧй винтовка, да, кӧть и патронъясыс сы дорӧ эз вӧв-ны, вӧралан ружьясыс моз жӧ видзис да пелькӧдӓс.

Ӧтчӧд бать ветлӓс ударникъяслӧн слӧт вылӧ, вайис выль вося чачаяс. Грездын козтӧ этшаӧн сувтӧдлӓсны, а ми — важысянӧ. Чачаяссӧ, дерт, асьным вӧчавлӓм-а. А танӓ — збыльнӧй чачаяс: кольяс, морковъяс, кӧчъяс... Стеклӧысь югъялан дивӧ! Сӓйӧ жӧ луннас сувтӧдӓм ыджыд коз да мичмӧдӓм.

Выль воӧдз некымын лун на вӧлӓ. Чой-вок велӧдчисны, баб гортын эз жӧ вӧв. Ме пукала паччӧрын да рисуйтча. Мам ломтӓс галанка пач да мунӓс. Миянлы Людмилакӧд стрӧга тшӧктӓс, мед пач дорас ӧгӧ матыстчӧй. Но сӓйӧ сӕтшӧм ышӧдана жувгис, мый эгӧ вермӧй кутчысьны да сибӧдчим. Матыстам пач вом дорас кабалатор, а сӓйӧ лӧбӧ горъяс и ломзӧ. Воис бать да, дерт, видӓс миянӧс тадзи ворсӧмысь. Ме бӧр кайи паччӧрӧ, водзӧ рисуйтча. А Людмила, сылы нӧль арӧс на и вӧлӓ, бӧрддзис да некыдз эз кӧсйи вешйыны пач вом дорсьыд. Бать сӧмын кӧсйис керка-ысь петны, Людмила кыдзи тай равӧстӓс. Бать ӧдзӧс дорсянӧ уськӧдчис сы дорӧ. Ме чеччышті жӧ паччӧрсянӧ: Людмила сись моз сотчис, а бать нетшкис сы вылысь паськӧмсӧ, горзӓс меным, мед ва вая. Кор локті ва тыра кӧшӧн, Людмила сулалӓс пасьтӧг нин.

Нуисны сӓйӧс Пӧддельнӧй больничӧ, ӧкмыс верст сайӧ. Бать кыдзи вермӧ тӧрмӧдлӧ вӧвсӧ, а мам туйбыдыс бӧрдӧма. Джын туяс Людмила бӧр воӧма ас садяс. Сотчӧма ӕна: кынӧмыс, сьылӓ-ыс, юрсиыс чишкасьӧма. Бать эз удит ӧдйӧсӧ пӧрччӧдны: Людмила вылын куим платтӧ вӧлӧма.

Выль во водзас мам вурис миянлы выль паськӧм, а колясъяс-сьыс Людмилалы лӧсьӧдӓс куим платтӧ. Сӓйӧ куимнансӧ ӧтпыр-йӧн и пасьталӧма. Дыркодъ коньӧрлы ковмис бурдӧдчыны. Бур кӧть, бать сӕки локтӓс аслас могъясӧн. Ӧтнам кӧ вӧлӓ, нинӧм эсь-кӧ эг сяммы вӧчны.

Тӧвнад бать ӕна вӧралӓс, сӓдзжӧ дасьтӓс чери кыян кӧлуй... Ми отсасим и. Ӧд вӧравны да вуграсьны бать велӧдлӓс эз сӧмын пиянсӧ, но и миянӧс, нывъяссӧ. Помнита, пывсян ӧдзӧсӧ гижтӓс мишень, и ми сьӧрсӧн-бӧрсӧн лыйлӓм сӕтчӧ. Менӧ эськӧ эз кӧсйыны сибӧдны, дзоля на пӧ, ружьесӧ пӧ он вермы кутны,

но ме бѳрдѳмѳн сорѳн кори. Сѳки батъ вѳчис вожа пыкѳд, и лыйси мукѳдсьѳс ѳг лѳкджыка.

Тоня да Рая весиг асьныс нин вѳравлісны. А Борисѳс чери кыйѳм вывтѳ ѳна кыскыліс. Сѳмын юыс воссяс, сѳйѳ вошлѳ ва вылас. Лун и вой кѳтъ пукалас ю дорад. Да кутшѳм гажаа вайѳ кыйдѳссѳ, бура кѳ шедѳма, и сѳк жѳ пырѳмсѳ он казаяв, нинѳм кѳ абу кыйѳма... Весиг узигас ѳз дугдыв вуграсьны: «Кут! Мынас!» — горзѳ.

Водз тулыссянъ батъ вѳйтавлѳс висьясѳ гымгаяс да ветельяс. Тыясыд косьмѳны, чериыс висьясѳдыс петны зѳльѳ, сѳдзи и шедѳ. Быд лун мыйтакѳыс шедліс. Но гымгаяссѳ ковліс видзны: быдсяма войтырыс ѳм, перьясны черитѳ либѳ помѳдсѳ жугѳдасны. Кыйѳдчыны пырджык ковмыліс Борислы либѳ меным. Чойяс полѳсны кольчыны вой кежлад, а ме мыйлакѳ ѳг.

Сѳдзсѳ бытѳтѳ немторйыс ѳгѳ полѳй. Но кызди гожѳм, пышъялысьяс йылыс сѳрни паськалѳ. Пѳшти быд гожѳм сиктѳ волѳс милиция: юасисны, ѳз-ѳ аддзыв кодкѳ тѳдтѳм йѳзѳс. Дерт, пышъялысьяс пыравлісны сиктъясад, но йѳзѳс виѳм йылыс ѳз кывсьыв, сѳмын ѳтчид, коркѳ 1930 воясѳ... Том милиционер колльѳдѳма кык пукалысьѳс карѳ. Сикт помѳ, миян керкасянъ неылѳ, сувтласны да ва юасны ѳшмѳсыс. Но Шойнатѳ абу воѳмны. Чом ва яг нѳрысын пѳ пукалысьясыд корасны куритчыны да табак судзѳдѳгкостыс и усъкѳдчасны милиционер вылад да виасны, а шойсѳ шыбитасны туй бокас, гуранѳ. Тайѳ вѳлі нин тырмымѳн, медым сиктсаяс полѳсны вѳрад ветлыны. Корьяскѳ и сѳдз повзьѳдчылісны. Кодкѳ аддзас, шуам, вотѳсаин и паськѳдас сѳрни, мый аддзыліс сѳйѳтѳ местасьѳс пышъялысьясѳс. Унаѳн сѳтчѳсѳ оз нин мунны. А сѳйѳ гуран боктыс, кѳні виѳмны милиционертѳ, ветлім пыр полѳмѳн. Мичлуныс Чом ва яг нѳрысылѳн чуймѳдана, а сьѳлѳм вылад — шуштѳм.

ѳтчид батъ мѳдѳдчѳ ветельяс видлавны, шуѳ босьтны аскѳд Раяѳс, мед вой улас кольны. Но Рая бѳрддзис, некыз оз кѳйы мунны. Бѳрас нин тѳдмалѳ, мыйла. Вѳлѳмкѳ, тыыс дзик матын сѳйѳ шуштѳм яг дорас. Сѳки ме та йылыс ѳг на тѳд, да кѳйыси Рая пыдди мунны.

Батъ ныв пу лапьясыс вѳчис неыджыд чом, пыртліс сѳтчѳ кос турун, бипур пестѳс. Видлалѳс гымгаяссѳ и мунѳс. Пукала бипур дорын, видзѳда, кызди чериыс ворсѳ. Сынъяс да гычьяс тѳрмасьтѳг кытшовтѳны помѳдсѳ, корсьѳны петанѳн, васѳ гудыртѳны. А сирьясыд — дзик мѳд вежѳраѳсь. Найѳ тѳрыба, скѳрыс зутшьясьѳны косѳ либѳ помѳд вывтѳыс чеччыштны зѳльѳны. Унджыкыс, дерт, бѳр бузгысьѳны, а овлѳ и — кодлыкѳ удайтчѳ чеччыштны. Сирыдлы — долыд, а меным — шог. Сѳйны кѳсья. Вѳлі-ѳ аскѳд сѳянтѳрйыс, ѳг помнит. Гашкѳ, и ѳз. Гортын ѳд нинѳм жѳ ѳз вѳв. Тулыснад пыр тадзи. Картупельсѳ, мый ѳм, пуктѳм, сѳйѳм вылѳ ѳз коль. А збыль нянъ йывсьыд и сѳрнитны нинѳм. Мам пѳжавліс мый сюрѳсьѳс дзик сьѳд сѳчѳнъяс. Быдторсѳ видлім: кырсь, пѳттурун, петшѳр, жуг, му вылын тѳвйѳм сѳсь картупельтѳ и. Но медся чѳскыдтѳмыс — идзаса сѳчѳнъяс. Тшѳтшьяяс, чайта, гѳгѳрвоасны менѳ.

Видзяс вылад да вѳрад водз тулыснад нинѳм жѳ абу: тшак-вотѳс ни вужьяс. Гумовтѳ рачѳ ва да босьтчи юква пуны. Чери-

ыд — тырыс, а солыд — чир абу. Тшыгнад и картупельтӧ, и яйтӧ — быдтор дубыдӧн позьӧ сӕйны. Но черитӧ?

Пукті черисӧ рачӧ, чӧскыд дуксьыс нӧшта на ӕнджыка кынӧ-мӧй сьомавны кутіс. Кӧть и, збыльыс кӧ шуны, сӕйны сӕки ковліс пыр. Пуи да совтӧг и сӕйи. Регыд сэтшӧма пондіс восӧдны, ӧдва чомйӧ пыри. Шебраси важ пасьӧн да чорыда унмовси. Садь-ми, кор шондӧйс вылын нин вӧлі. Петі чомйыс: бипур важӧн нин кусӧма. Колӧ пес вӧчыштны, а чер некӧн оз тыдав. Видзӧдлі гӧгӧр — пыжӧй мӧдар берекас. Думышти, мися, бать локтӧма, да долыджык лои. Гашкӧ, мися, сійӧ и босьтіс черсӧ. Виччыся-виччыся, а оз лок. Друг аддза: бать сиктладорсянь котӧртӧ, повзьӧм чужӧма. Коді пӧ пыжсӧ мӧдарас вуджӧдіс, юалӧ. Мися узигкості и черным вошӧма кытчӧкӧ. Ӧдйӧ кыялім гымгаяс да мунім гортӧ. Бать сӕки нинӧм эз висьтав, а вӧлӧмкӧ, некымын морт пышйӧмны лагерсьыс. Та вӧсна и локтӧма мела. Ӧтнамӧс сӕсса эз нин кольлы вӧрад.

Миян керка кильчӧсянь тыдаліс лыа ӧзын. Ӧні эськӧ турунӧн да баддӧн тырӧма, а ичӧт дырйи син водзаным ворсӧдчис зарниасьыс лыанас. Ытва дырйи саявліс ва улас, а кор ваыс усьліс, ӧзыныс йитчыліс вадоркӧд, ӧтар-мӧдар помас кольлісны курьяяс. Сәні век жуис посныд чери. Жар лунъясӧ баб юрнуӧдӧм улын ми ветлывлім сэтчӧ ас кыӧм кӧвтымӧн. Ӧтчид — сӧмын лӧччим ю дорас, кыптіс ӕн тӧв. Войвывсянь локтіс ыджыд сьӧд кымӧр. Повзьӧмӧн бӧр котӧртім гортӧ. Сӧмын град йӧр потшӧс дорӧ воим, сярӧбтіс шер. Да сэтшӧм гырыс! Мыйӧн позьӧ, вевттим юръяснымӧс, но йӧгьястӧг эгӧ жӧ кольӧй. Пырим, а гортын абу жӧ бурджык — став ӧшиньсӧ пылльӧма, джоджын быгласьӧны ӧрек ыджда йи гӧгыльяс. Шерыс пӧшти быд гожӧм жугліс войвылӧ видзӧдыс ӧшиньяснымӧс. Делӧйс сыын, мый керка водзын сулаліс жытник... Шерыс кучкыяс пӧката вевтас да чеччыштӧ веськыда ӧшиньӧ и жуӧдӧ стеклӧсӧ. Тайӧ пӧлыньтчӧм жытныкыс, миян керкакӧд дзик сиб, эз миян вӧв, а Микей Ёгорлӧн. Мам эз нин ӧтчыдыс шулы вуджӧдны жытниксӧ мӧдлаӧ, но на-йӧ пыкисны мыйлакӧ.

Жулльӧм ӧшиньястӧ аддзӧм бӧрын мам бӧрддзис — ӧд стеклӧ-тӧ зӧв сьӧкыд судзӧдны вӧлі. Ме эг нин вермы кутчысьны, петі ывлаӧ, кайи жытник вылас да ӧклупеньсӧ лӧкыс чӧвті туй вылас. Мам видчӧ, тшӧктӧ лӧччыны, но ме ог кывзы, вевтсӧ нин косяла. Чукӧртчисны сиктсаяс, сералӧны:

— Давай, давай, Галя! Кисьты, морыс ськӧд!

А Микей Ёгорлӧн рӧдвужыс видчӧ, Феня нывныс горзӧ:

— Мед эськӧ усян да сьылдзиртӧ песовтан!

Ме чӧв ланьтӧмӧн «уджалі» водзӧ: шыблалі вевтсӧ, стрӧпилӧсӧ, стенсӧ косявны нин кутчыси. Лӧптышта венеч помсӧ ӧти помсяныс, сӕсса мӧд помас вуджа, чужйышта, и керйыд туй вывтӧйс нин гӧгыльтчӧ. Йӧзыс чилзӧны, сералӧны. Но, скӧрйывсьыд кӧть, ставнас жытниксӧ эг вермы разыны. А некымын лун мысти кӧзяеваыс косялісны помӧдз да вештісны.

Матыстчис страдна. Турун пуктігӧн видзьяс вылӧ петавлім ставным. Бригадираліс Еве Вась Ӧгре. Сійӧ век пыдди пуктыліс миянӧс уджачлунсьыным. Бать зорӧд чӧвтіс, мам куртіс, Тоня юръяссӧ домавліс, ми Раякӧд новлім вӧвьясӧн, а Боря зорӧд

вылын талаясис. Батълөн артмылісны мича, джуджыд зорөдъяс. Туруныд эз тшыклы.

Мукөддырйи водз асывнас бать кытшовтліс джынвыйё кось-мём тыяс, колис-ө сәні чериыс. Рытнас ставөн муналасны горта-ныс, а ми кольччам. Мунам тыяс вылө да кыскалам ыджыд көвтым. Берегъяссө кадъялөма, көсйытөг няйтас вөйлан пидзө-сөдзыд. Нөшта и номйыс шонді пуксьём бөрас вильөдны босьтчө. Но вөчны нинөм, юкватө окота сөйны. Ме сәки медічөт вөлі. Мудзлі, дерт. Дай ыркыд, шонді пуксьём бөрад. Кор көвтымсө кыскөны, сулала берег вылас, тірала. Паськөмөй ва, няйт. А мам тәрмөдлө на:

— Энө сулалө, кынманныд! Галя, лег, ведрасө вай!

Көмтөг, ойкйөдлөмөн котөрта ведрала ытшкөм, бытшкасьыс видз вывті. Чериыс кө уна, пыр и долыдджык лоө. А кыскөны кө некымын посни чериа, турун да нюйт тыра көвтым — дөзман. Боря гөгөрвоө миянөс да пыр зільө серам петкөдлыны: вежньөдлө чужөмсө, өшлө пель вылас нюзьсө либө туруныс бөж вөчас. Ми сэтчө семдам серамнымла. Матысса тыяс видлөм бөрын көв-тымсө пожйыштам, өшөдам кустъяс вылө, вежсям и — гортө. Туйыс кузь, нель-ө-вит верст колө мунны. Кок улад — рытъя лысванас топалөм небыдик бус. Рөмыд. Сөмын туйыс и тыдалө.

Война пансян воас велөдчи коймөд классын. Верстьөяс пыр и гажтөммисны, кор репродукторыс кылім Левитанлыс гөлөссө. Радиотө сөмын на и нюжөдісны та водзын. Верстьө и том, ставөн майшасьоны. Медся нин 1941 вося төвнас, кор немеч матыстчис Москва дорө. Но ми эским: Сталин кө сәні — оз сетчыны.

Школаын вөлі көдзыд, пес эз тырмы. Урокъяс вылын пукав-лім пальтоясөн, а переменяс дырйи петавлім коридорө да ляс-кысьлім пач дорас, шонтысьлім мый вермим. Зонъясөс эгө сибөд-лөй, но найө мырдысьөн сюйсисны. Зык-шумсө пырджык дугөд-ліс звонок.

Өтчид «Пионерская зорька» радиопередачаын юөртісны: «До-на ёртъяс, гижөй, кутшөм сыланкывъяс эськө ті көсйинныд кывзыны». А меным ёна кажитчис прокурорлөн пи йылыс сыланкыв, коді пагөдіс батьсө, виис чойсө, а мамыс шогысла кувсис. Пукси, гижи письмө, нөшта и став куплетсө гижи, гашкө, мися, кывъяссө оз төдны да. А өти лунө школаын ме дорө матыстчис пошта новлөдлыс, мыччис письмө. Москваыс воөма. Ставөн чуймим. Восьті конвертсө, а сәні кабалатор вылын гижөма: «Дона Галя Макарова! Письмөыд воис, но тәнсьыд сыланкывтө эфирө сетны огө вермөй. Сы пыдди кывзы «Наш паровоз, вперёд лети». Та бөрын ме пыр и кыпалі ёртъяс син водзын.

Коймөд да нельөд классъяс помалі мөд школаын нин, горт-сянь куим километра сэтчөдз вөлі. Бура помнита медводдза велөдчан лунсө. Көсйисны сетапны учебникъяс, а гортын — көпей-ка абу. Мам петкөдіс жытныкыс некымын тыртөм сулея:

— Мыськы да сдайт лавкаө, сійө сьом вылас и ньөбан нигаястө.

Мыйсө сөмын, тыдалө, эз и видзлыны тайө бутылкаясад: и дьөгөдтьө, и карасинтө... Лунтыр нирті лыаөн да дзимбырөн. Асывнас тэчи сумкаө, школаө мунігмоз пыралі лавкаө, но бутылкаястө эз босьтны. Вои школаө, а урокыд заводитчөма нин. Тотшкөдчи, гия-голя пыри классө. Видзөда да, став пар-

таыс, бӧръя кындзиыс, займитӧма нин. Катя Вась Юрий бокын, кодкӧд пукавлі таӧдз, шлапвидзӧ тӧдтӧм ныв. Матыстчи, кыв шутӧг тойышті нывкатӧ да пукси, сумкаӧс парта улӧ дзумги. Ставӧн сералӧны...

А нӧльӧд классын менам местаӧ некод нин эз пуксыыв.

Война заводитчӧм бӧрас регыд и тетрадьяс эз лоны. Перӧ да чернила тшӧтш эз тырмыв. Гижлім газетъяс да важ нигаяс вылӧ. Кор кувсис тӧтя Феня, верӧсыс челядьыскӧд муніс Комиыс чужанінас и колис миянлы уна нига. Художествоа гижӧдыс вӧлі этша, кызвыныс — политическӧй. Вӧліны и мичаа гижӧм конспектъяс. Ӧні ме тшӧкыда казътывла сійӧ нигаяссӧ: видзны эськӧ колӧма. Первой гижим конспектъяс вылас. Бур, волялан бумага вывтӧ перӧыд зэв кокныда ветліс, он нин ӧткодяв газетыдкӧд. Нигаяссӧ, кыті позьӧ, ӧдйӧ жӧ тыртӧм.

Бура помнита В.Савинлыс латинскӧй шыпасъясӧн лӧдзлӧм «Сыктывкар» поэмасӧ. Тыдалӧ, сійӧ алфавитнас эз дыр вӧдитчыны, сы вӧсна мый ми роч алфавит серти нин велӧдчим. Уна вӧлі и вуджӧдӧм художествоа небӧг: Пушкин, Лермонтов, Горький, Гайдар — ставнысӧ медводз лыддылі комиӧн. Сӧмын жаль, эгӧ вермӧ, а гашкӧ, эгӧ кужӧ видзны нигаяссӧ.

Школа вӧлі ылын, паськӧм ӧнасӧ эз шонты, но весиг веж кодзыдъяс дырйи велӧдчыны ветлім окотапырыс. Ӧтчид, чорыд кодзыдъясӧ жӧ, котӧртӧм Мальвинакӧд школаӧ. Ме эськӧ нинӧм, а сійӧ — дзик турдіс. А шойна бокті мунігӧн сувтіс да нинӧмыс эз кӧсйы водзӧ мунны. Пукалыштіс да и шуӧ:

— Вай ӧти гачтӧ, а ме тӧныд нянь сета.

Ме вылын сӧки кык гач вӧлі, да дзик пыр и вежсим. Мальвина быттӧ ловзис, котӧртӧм водзӧ. Школаӧ, дерт, сӧрмим, пырим первой урок шӧрас нин. Виччысьны переменасӧ эг вермы да гусьӧн сӧйи рудзӧг нянь торсӧ. Чӧскыд! Гортын миян татшӧмыд эз вӧв, а Мальвиналӧн мамыс — пӧжасъыс. Но ми пасътасылім бурджыка, мам пыр мыйкӧ вурліс. Ассьыс да батылыс бурджык паськӧмсӧ важӧн нин вежлісны пызь да картупель вылӧ дай. А ӧтчид мам юалис:

— Кӧні нӧ турунвиж лӧскуптъяссьыс вурӧм гачыд? Пожйыштны нин, пӧди, колӧ?

Полі эськӧ, мый видас, но висьталі ставсӧ, кыдзи эм. А сійӧ кыв эз шу, бергӧдчис пач дорлань да бӧрддзис.

Да, сьӧкыд вӧлі минлы, челядьлы, но нӧшта сьӧкыджык мамыаслы аддзыны тшыг челядьсӧ.

Ӧтчид велӧдысьяс шуисны пуктыны клуб сцена вылын А.С.Пушкинлыс «Русалка». Ворсны русалкалыс ичӧтджык нывсӧ бӧрйисны менӧ. Спектакль лунас тӧтя Дуня, школаса стӧрӧж и мыськасьыс, матыстчис да шуӧ:

— Кӧдзыд, да тӧ, Галя, гортад эн мун. Рытӧдзыс тані олышт, а сьпектак бӧрад ме ордӧ лок узынытӧ.

Ӧнӧдз на казътывла сылыс шань, мелі видзӧдлассӧ. Радейтліс да жалитліс менӧ. Ӧтка, да школаас и оліс, ичӧтик жыръя пельӧсын.

Пыри, пукси мышкӧн шоныд пач дорас. Тӧтя Дуня видзӧдліс ме вылӧ, видліс плешкӧс:

— Пӧсь тай нӧ?! Вай шоныд васӧ юышт да вод паччӧр вылас. А сьпектак кежад чуксала.

Рытнас садьмөдіс и шуо:

— Да тэсянь сідз и өвтө пөсьнас. Кынмөмөд, тыдалө! Эн мун клубад, Ен ськөд, сьпектакьдкөд.

Эг кывзысь. Пасьталі кузь сарапан, лэдзали көсаяс, плавги пальтоос и муні русалкаавны...

Миянлы сэки дыр клопайтісны. А меным шуисны, мый ворсі зэв бура. Дерт, быттьө вөтын вөлі да. Күті чукөртчыны гортө, а туй ёрт Кывтыдөдз эз ло. Гартышти көлуйөс тубрасторйө да мөдөдчи өтнам. Муні-муні, но Шөрсикт помас сувті, педзышти места вылын — водзө мунны пола. Керкаясыс водзө абуось, а гортөдз — кык верст тыртөм вөлок: өтар боксянныс — вөр, мө-дарсянныс — ю, видзьяс да шойна. Некымын лун сайын на тани көинтьяс косявлөмны кодлыськө понсө. Но вөчны нинөм, котөрти. Друг кыла, быттьө кодкө лолалө мышкын. Бергөдчи — кодкө сьөд збыль котөртө бөрысь, синъясыс ломалөны... Кыдзи веськалі сиктө, ог помнит. Кватитчи, а тубрасторйөй абу сьөрысь. Көсийи нин ветлыны сикт помөдзыс да корсьыштны, а видзөда да — паныд Булька котөртө. Тыдалө, сійө и повзьөдіс, сөтанайд. Кытысь сөмын петіс сійө? Бур, ылө бергөдчыны эз ковмы, паныдасис вөла. Нывбаба сувтөдіс вөвсө да юалис, кытчө татшөм сёрнас муна. Висьталі, мися, тубрасөс вошти. «Со,— шуис нывбабаид,— туй вывсьяс лэпти». Гортөдз өтлаын сәсся и локтім. Узис на миянын, сы вөсна мый Шойнатыөдз, кытчө сылы колө, дас кык верст на вөлі.

Кутшөмкө рытө керка дорө сувтіс вөла-доддя. Пырисны кыкөн. Том, веж юрсиа нывбаба кокньыдик пальтонас сэтчөдз кынмөма, мый өдва кутчысис кок вылас. Пырис да бөрддзис весиг. Мыйкө висьталіс на роч да немеч кывъяс сорлалөмөн. Вөлөмкө, туяс воштөма сумкасө став документнас да сьөмнас. Мам отсаліс сылы пөрччысьны, зырالیс ки-коксө, юктөдіс пөсь тшайөн. Нывбабаид висьтасис, ме пө немка, нуоны пө Поволжьеысь Аныбө овмөдөм ылө, и документъястөгыс меным пө некыдз оз позь. Рая пасьтасис да муніс корсьны сумкасө. Пемдіс нин, а век абу. Шогсьыны кутім: өд война кадас уна көин рөдмыліс тани. Но воис жө. Киас — воштөм сумкаид. И аддзөма өд медся повзьөдчанаинсьыс, Чом ва яг горулысь, кытчөдз нель кымын верст лоө. Нывбабаид радысла бара бөрддзис, сәсся корсьысис чемодансьыс, мый эськө козынавны Раялы, и сетіс шөвк матерье тор. Кывлі, нывбабаыс сәсся дыркодь велөдөма немеч кыв аныбса школаас.

Нельөд классын миянөс велөдіс воча вок, Нафанаил Павлович. Велөдчылі эськө бура, но ёна жө и вильшасьлі. Вокөй тшөкыда воylvліс миянө, но некор эз норась батъ-мамлы. Ог кө вөлі сет нуөдны уроксө, босьтас менө шошаөд, плачнитас некымынысь бекйө, и өдзөс сайө. Кор урок, а кор и лунтыр кежлө. А өтчид весиг куим лун кежлө вөтліс, но өдзөс дорсьыс эг вешйив, кывзі уроксө. Төтя Дуня ас ногыс век жалитліс: «Бара пакөститчин?.. Эн сулав сәні, лок тшайөн юктөда».

Челядьдыр миян помасис водз. Уджыд сиктад ставнымлы вобыд тырмө. Водз тулыссө, ном петтөдз, заптылім пес. Чинталім, поткөдлім да тэчим чипасө. А сёр арнас, медводдза лым усьөм бөрын, вайлім горт дорө. Тулыснас колхоз му ылө өтвылысь и картофель пуктылім. Весалім да мудйим сөмын ми, че-

лядь. Ордйысим на, кодӱ унджык да бурджыка вӧчас. Некутшӧм ышӧдан козин, дерт, эз сетлыны, но век зӱлим сӧмын сы вӧсна, медым рытнас бригадир висьталас, кодӱ лои медводзын. Регыд сӧсся и турун пуктӧм заводитчылис. Ӧтчӱд юӧртӱсны: кодӱ ӧти лунӧн ытшкас гектар — сетасны ӧкмыссӧ грамм пызь. Нывбабаяс рытнас нин мунӱсны видз ыылӧ, мед покос панны водз асывсянь. Ме да Микит Миш Надьӧ кӧсйим жӧ видлыны, но гортын ӧлӧдӱсны, нинӧм пӧ тӱян оз артмы. Бабаяс туйбыдыс жӧ видчисны, а ми вензим да бӧрдӧм сорӧн мунӱм. Но Ягувлӧс дорын вермисны жӧ вӧтлыны.

Котырӧн ытшкыны некод эз кӧсйы, быдӧнлы юклӱсны торйӧн. Ӧдӧлитӱсны гектартӧ сӧмын куим нывбаба да миян Рая. А ӧд сылы дас нӧль арӧс на и вӧлӱ.

Гожӧмнас видзлӱм колхозлысь скӧт: порсьясӧс, мӧсьясӧс, ыжтьясӧс. Медся мустӧмыс да асныраыс — порсьяс. Мунӧны кодӱ кытчӧ. Ыжтьясыдкӧд эськӧ пӧттӧдз жӧ котралан да. Мунӧны, мунӧны — быттьӧ бузган шор визувтӧ. Сӧмын на бокад йирсисны, а бергӧдчылан, и дукныс абу. Тӧдмав сӧсся, кытчӧ сайӧдчисны. Ни бипур дорын пукалыштны, ни небӧг лыддыштны. А вот мӧскыд — тӧлка пемӧс. Тӧрмасьтӧг йирсьӧ, сӧсся водас да шойчӧ. Сӧки и ачыд бӧръян бурджык места, водан мыш вылад да видзӧдан шлывгысь кымӧръяссӧ. А думъясад кӧ сетчан, и быттьӧ абу нин кымӧр, а еджыд вӧв либӧ кывтысь корабль. Мича, весиг орӧдчынытӧ он вермы!

Но овлӧ, и мӧскыд мудеритӧ. Видзӧдан, а кутшӧмкӧ Сюрук, шуам, сиктӧ лӧсйӧ. Танӱ нин петкӧдлы тӧрыблунтӧ. Казялас кӧ, мый вӧтӧдӧны, скачӧн мӧдӧдчӧ да вӧрас пырӧ. Мудзтӧдзыд жӧ лӧӧ котравны.

1943 воын помалӱ нӧльӧд класс. Витӧдын кӧ велӧдчыны, колӧ мунны Шойнатыӧ, дас кык верст сайӧ, да нӧшта Висер ю вуджны быд пӧрйӧ. Тоня да Рая сӧнӱ нин велӧдчисны. Аскӧдныс унасӧ эз и босьтлыны: вежон кежлӧ туис йӧв, дас кымын сӧчӧн да некымын картофель. Паськӧмыд — абу жӧ. Сӧмын Раялы и вермисны ньӧбны гын сапӧг. Мукӧдлӧн — дӧмас вылын дӧмас. Бать-мам шуисны, таво пӧ тӧныд ковмас гортын овны, а мӧд во пӧ витӧд классӧ миян сиктын восьтасны. Бӧрдӱ, но эз кӧсйысьны лӧдзны. Вӧскресенньӧ асывнас водз чеччи, некодлы нинӧм эг шу и подӧн мӧдӧдчи Шойнатыӧ. Локтӱ ю дорӧдзыс, а шондӧдлӱс, да ва йи вылыс. Кыдзкӧ тай вуджи жӧ, но гын сапӧгъяс кӧтасисны, туктӱсны, ӧдва восьлала кынмӧм кокъясӧн. Локтӱ Шойнатыад, корси керкасӧ, кӧнӱ чойяс олӧны. Гортын, дерт, гӧгӧрвоӧмны жӧ, кытчӧ мунӱ. Аскинас локтӱс бать да иналӱс менӧ витӧд классӧ.

Ок и дона сувтӱс асныралӧмӧй! Уна шог тӧдлӱ тайӧ онас. Ме ӧд сӧмын во бокинсӧ и велӧдчи. А кутшӧмджык вӧлӱ Борялы, Тонялы да Раялы. Найӧ войнабыдыс велӧдчисны гортсянь ылын.

Но помасис и тайӧ сьӧкыд велӧдчан воыс. Стӧч гӧра-кӧдза кад кежлӧ. Ог тӧд кыдзи, но кӧйдыс ыылӧ картофельсӧ видзим, а гӧрны — дзык нинӧмӧн. Колхозса эбӧстӧм мӧсьяссӧ сӱдз нин кок йылань сувтӧдлӱсны гез отсӧгӧн да ки помысь. Асьныс эз нин вермыны. Вӧвъяс эз жӧ бурджыка овны. Бать локтӱс колхозсалӧн чукӧртчӧм вылысь да шуис, мый ас овмӧсьясӧ вӧв оз сетны. Йӧзыс пӧ тай мӧсьяснас гӧрӧны... Видлӱс вӧйпӧдны мамӧс, но мӧдыс бӧрддзис: «Кӧсьян кӧ, менӧ доддяв, а мӧс ог сет. Сӱдзи

кок йылас өдва сулалө». Мыйон сэки гөрим, ог помнит, но мөснымөс эгө доддялөй.

Мөд вонас асланым сиктын восьтисны витөд класс, а во мысти пө и квайтөд, и сизимөд лоас. Ковмис өти восө виччысьны, но прөстө эг жө ов. Бать слабмис, кутис омөля кивны, да вобыдсө отсасысь пыдди и вөлі сылы.

Кызди сөмын воис пув, некымын лун кезлө муним Эжва мөдлапөлө, Урьель ягө. Кутшөм сәні вөрыс! Югид, кыпид, ён пуяса! Джуджыдысь-джуджыд пожөмъяс. Кок улад быгзьө еджыд яла: вуджөраинъясас небыдика лайкъялө кок улад, а шондi водзас чажакылө. Мича, лөнь! Кажитчө, быттьө важөн-важөн овлі нин тані, но казтыштны нинөм ог вермы. И та вөсна өттшөтш и кыпид, и неуна шог. А пувйис — сәтшөмыс сәсся некөн абу: сьөдгөрд, гырысь, шома-юмов сьөмөса. Пув розъясыс сярвидзөны пасьтала, ылөдз тыдалөны еджыд яла вылад. Сөмын эн дышөдчы, чукөрт.

А өні... Öнi нинөм нин абу сәні. Некымын во сайын ветлі, да бурджык, эг кө аддзыв, мый колис мича пожөма яг пыддиыс... Сөмын рокөс кодь му да мыръяс чурвидзөны.

Сәки бать колис менө пув дорас, а ачыс мунис капканъяс, пекляяс да ләчъяс видлавны. Бөрсө локтис рөмдандор нин. Сувтөдіс пув тыра пестерөс пожөм улө, өшөдіс ружьесө. Бипур вылө кос увъяс чукөртим, пестысим, сәсся бать керыштіс ньыв пу лапъяс, вольсалис гөгөр. Пукалыштим, сөйыштим. Узьны окота лои. Войнас тай садьми мыйлакө, видзөда: бать бипурас бедьөн лукйысьө. Вөлөмкө, вугыртөма бипур дорад, шапкаыс юр вывсьыс усьөма дай сотчөма. А сылөн сәні суниса ем вөлөма. Сійөс и корсис пөимсьыд. Аддзис жө тай.

Асъявылыс ёна көдздөдіс, мөдіс гырыся лымъявны. Тэрмасим гортө. Бур, менам кык чышъян вөлі, да өтисө батьлы сеті. Тешкодь вөлі, но кутчыси, эг видзөд сы вылө. Друг кыліс кос увъясөн трачкөдчөм, и миянсянь неылө петіс мича йөра. Здук кезлө быттьө кынмыліс места вылас, нырнас нуөдіс да бөр лыйыштіс вөрас: сөмын муыс резсьө кокъяс улас. Бать весиг ружьесө эз лэдзлы пельпом вывсьыс — дрөб зарада пө да нинөмла зверсө дойдавны.

Кор лымйис лоис джуджыд нин, батькөд муним вөравны. Öти вөр керкасянь мөдө вуджам. Урыс кө шедліс уна, керкаас дырджык кольччывлім. Медся шуда лунъясө комын урөдз кыйлім. Вөрас лөнь, төлыс көнкө выліас, пожөм да коз туганъясас сөмын шувгө. Бать аслас паськыд лямпаөн мунө водзын. Мыш саяс — мышноп да ружье. Сы бөрысь кысся ме. Лямпаөй паськыд жө, но дженъыд. Бульканым кытчөкө водзө нин котөртис-а. Со и шыасис. Көть абу матын, но увтчөм сертиыс пыр позьө гөгөрвоны, кодөс туялөма. Тшөкыда кө, скөрысь да тяззөмөн увтышталө — көчөс вөтөдө. А кыз гөлөсөн кө да эргөмөн — сідзкө, ыджыд зверкөд паныдасис. Öнi, тыдалө, урөс кыйөдөма — кокныбыдика увтчалө, лөня. Петкөдла батьлы, кытчө колө мунны. А матысяньыд сәсся ачыс нин кылө.

Сюрліс дозмөр и сьөдбөж, тшөтш и туланьд. Локтам рытнас вөр керкаө, ломтам пач, пусям. Сөйөм бөрын ме пырджык унмовсьылі. А бать куяс на кульліс, пелькөдіс ружьесө да патронъяс зарадитліс.

Ӧтчӱд сэтшӧма мудзсьӧма лунтырнад, асывнас некыдз ог вермы садьмыны. Шуа: «Чечча, чечча», а синмӧй оз воссьы. «Талун шойччы либӧ, ӧтнам ветла» — шуис бать, корис Булькаӧс и муніс. Пӧттӧдз узи, сӧсся дыр видзӧді ичӧт ӧшиняс, батьӧс виччыси. Гажтӧмтчыны куті да петі ывла вылас пес чукӧртыштны. Гӧгӧр лӧнь, сӧмын пожӧмъяс дзуртышталӧны. Чӧлаліс лым, да бательӧн кок туйясыс эз нин тыдавны. Пукси мыр вылӧ, видзӧда, оз-ӧ мыччысь кӧнкӧ. Друг аддза: кык мужичӧй лызьӧн локтӧны. Медводз мӧвпышті пырны керкаӧ. Но ӧдзӧсас эз вӧв каличыс. А найӧ матынӧсь нин. Думышті мудеритны, горӧді: «Батьӧ, Ваня, Ӧльӧксей, локтӧй ӧдйӧджык!» Казялісны менӧ, бергӧдчисны да тӧрыба пырисны вӧрас. Нӧшта ӧнджыка повзи, мися, паныдасясны кӧ батькӧд да виасны. Пукси да бӧрддзи. А тӧвся луныд дженъыд, рӧмдӧ нин. Но бать тыдовтчис жӧ, да сэтшӧм ӧдйӧ локтӧ лызь туй кузяыс, кыті мунісны кыкӧныс. Повзьӧма, мый бокӧвӧйяс вермисны веськавны вӧр керкааным. Висьталі аслам мудеритӧм йылысь да ошкыштіс, но вой кежлас ӧдзӧснымӧс вугъяс кыз бедь суйӧмӧн тасаліс да тасманас гартіс.

Воис кад и гортӧ бергӧдчыны. Бӧр мунігӧн понным кыкысь шедліс неминучаӧ. Мунам, а кӧнкӧ ылын Булька кызкӧ аслыс-нога увтӧ. Увтыштас, ланьтӧ, сӧсся бара. Матыстчам: пукалӧ пу дорын, нор синмӧн видзӧдӧ миян вылӧ. Корим Булькаӧс, а сійӧ оз мун, пукалӧ да никсӧ. Гӧгӧрвоим жӧ сӧсся — пекляӧ шедӧма. Да ӧд тӧлка на, оз нетшкысь, пеклясӧ оз зӧвт. Мездім, мунам водзӧ. Видлалім лӧчыяс да пекляяс. Гортланьыд тай гажаджыка и мунсьӧ. Со и тӧдса, сиктгӧгӧрса вӧръясӧ нин воим, вуджим вой керӧс шор. Регыд гортын лоам! Друг кыла: Булька увтчӧ. Да сэтшӧм ылын, ӧдва кылӧ. А гортӧдз дзик матын, да и рӧмдыны нин кутіс. Кӧть бӧрд. Бать сувтіс, кывзысьыштіс: «Кылан? Оз-ӧ Булькаыд увтчы?» «Нинӧм ог кыв», — пӧръялі, а ачым мӧвпала: «Сы ылнаӧсӧ ӧд бӧр огӧ мунӧй. Оз вош, воас...»

Со ми и гортынӧсь! А Булька сідзи эз и лок. Бур, Тоня да Рая гортын вӧліны, локтӧмаӧсь Шойнатыысь шойччан лунъяс кежлӧ. Асывнас найӧ ветлісны мездыны Булькаӧс. Войбыд пекляын пукалӧма, сӧтанаыд.

Унаысь на тайӧ вонас батькӧд гӧгӧртлім вӧрсӧ. Лунтыръясӧн кок йылын. Ёна и мудзлім, торйӧн нин тулыснас, кор сылыштӧм лымйыс кутіс лясавны лызь пыдӧсас. Но вӧлі ёна гажаджык шойччигъясӧ: вӧчлі лымйысь лыммортъясӧс, быдсяма пемӧсь-яссӧ. Тшӧкыда шойччывлім Эжва мӧдлапӧлын, кӧні сулалӧ ыджыд, кык вожа ныв пу. Сы улын куйлӧ кыз кер. Чойяс тӧдӧны жӧ тайӧ местасӧ. И бӧрынджык, кор бать эз нин ло, ветлывлім сэтчӧ пукалыштны да казътыштны кольӧм кадсӧ да батьӧс.

1945 восӧ велӧдчи аслам сиктын нин. Тоня велӧдчӧмсӧ ӧновтіс, муніс уджавны карӧ, Рая сэн жӧ велӧдчис, библиотечной техникумын, Борис — медучилищеын. Ваня уджаліс драмтеатрын. Людмила мӧд классӧ на вуджис. А Алексей вӧлі фронт ылын.

Ӧтчӱд ӧртъяскӧд мӧвпыштім Кывтыд школаын спектакль пуктыны. Ме босьтчи дасьтыны сценарий. Бӧрйи «Мёртвые души» поэмаыс юкӧн, кӧні Чичиков локтӧ Коробочка ордӧ. Вурим костюмъяс, ӧшӧдім ӧбъявление, дасьтысям. Видзӧдысьыс чукӧр-мис уна, класс тыр лои. Чичиковӧс ворсіс Микулай Катя, Селифанӧс — Микит Опонь Миля, а Коробочкасӧ — ме. Но ӧти мы-

тшөд вөлі: Коробочкалы колө гөститөдны Чичиковөс шаньгаясөн, блинъясөн — быдсяма пөжасөн. А миянлөн шома капуста кындзи нинөм абу. Миля шуө, мам пө кыськө судзөдөма еджыд пызь да пөжасьома. Ми Катякөд вөйпөдім Миляөс вайны некымын шаньга, мед спектакль дырйи пуктивны пызан вылас.

И со, пызан вылын сулалө пось самовар, чашкаяс, шома капуста тасьті да пөжас. Чичиковтө паныдалі кыдзи колө, кори пуксыны пызан сайө. Тшай юам, сёрнитам. Гөсьтыд юасьо:

— Мый нө тэнад, Наталья Петровна, тасьті вылад куйлө?

— Тайө,— шуа,— пөжас. Миян чөскыда пөжасьоны, сөй, батюшко, пөттөдзыд!

Катя дыр эз думайт, босьтіс өти шаньга и давай азыма сөйны. Меным забеднө лоис да тшөтш босьті. А Миля оз төд, мый вөчны. Мыччис юрсө өдзөсөдыс да шөпкөдө: «Пуктөй пөжассө!» Да кысь нин: быттьө пельтөммим, сёрнитам и сөям. Сэки Миля кадысь водз пырис да горөдіс: «Барин, вөвъясыд дасьөсь!» Чичиков воча: «Селифан! Öнi жө пет татысь! Мөмөт!» Миля кватитіс пөжаса тасьтісө и петіс. Видзөдысьяс ставөн сералісны, кажитчөма спектакльыд, но элясисны, вывтi пө өдйө помалід.

Тадзи олөмад и гудыртчө ставыс: сьөдыс и еджыдыс, гажаыс и шогыс — быдтор сьөлөм пырыд лоө нуны.

Өтитор ме өнөдз ог вермы гөгөрвоны: мыйла бать-мам, кутшөм көть сьөкыд да тшыг эз вөв кадыс, ньөти омөль кыв эз шулыны Совет власьт йылысь. Кор дзикөдз нин топөдліс, бать ышөдіс мамөс: «Нинөм, Аннушка, кыдзкө олам. Видзөд, кутшөм бур челядь миян. Пөрысьмам, да өткөн огө нин кольөй. Пасьтала шляпа, босьта бедь, и мөдөдчам кутчысьөмөн өти ныв-писянь мөд ордө». Но эз артмы сылөн гөститөмыд. Кынөм висьөм пондаыс дзик эз кут вермыны сөйны...

Куліс бать 1947 вося юль 6 лунө. Градъяс сайын миян рудзөг быдмис. Дзевси сэтчө да дыр и бөрдi. Весиг понным, Булька, лунтыр сарайын куйліс: никсө, синваыс визувтө надзөник. Батьөс дзевтөдз удитіс на локны карсянь Тоня. Телеграммаыс пө воис, да подөн и мөдөдчи. Лун и вой мунөма, став сө дас вертсө...

Сьөкыд гижны та йылысь... Шуөны, мортыс пө шуд вылө чужлө. А уна-ө бательөн шудыс вөлі. Уджач, шань, авъя — став олөмсө сетіс семьялы да уджлы. Дерт, көнкө, эскыліс жө бур олөмад. А кыдзи эскытөгыд? Жаль сөмын, оз быдтор збыльмыв.

Тыдалө, олөмыс сэтшөм...



«Малтём кёлдум гөлбөч вылын»

Мөдлапöлын куранъяса нывъяс,
На пиыс сэн öти — пыскыль кывъя.

Эдуард Тимушевöн кывбурысь.

Сёрнитыслөн кө оз артмы кыв шуöмыс, сійöс пыр и дзерö-дыштасны, пыскыля пö. Татшöм мортсö **улыс эжваса** шуöны «пышкыль кылаөн», удораса — «доділь кылаөн», **вылыс сык-тывса** — «чукля кывъяөн», одыбса — «крука кывъяөн», а сёсь-каса — «гöна кывъяөн». Тыдалö, пыскыляөн шуöны сы понда, мый мортислөн сёрнитигас пысасьлö кывйис. Газет-небöг лыддигөн синным пыр и крукасьö, кор казялам тöдтöм кыв либö шыпасъяслысь вывтi нин аслыснога орччөн сулалöмсö. Сидзжö и сёрнитигөн: кывным гөрддзасьлö, паныдасьö кө орччөн некымын «сьöкыд» шы. Сидз нин артмö, мый миян кывным оз вермы сэтшöма бергöдчынысö, медем мичаа да сöстöма шуны найöс!

Шензылам ми и сэк, кор кывлам орчча сиктын либö мөд ю вожын олысьяслысь сёрнитан öдсö да ногсö. Шуам, мукöд изьвасаыс сэтшöм тэрыба сёрнитöны, мый, буракö, сöмын асьныс и гөгөрвоöны, ыштö көсйисны висьтавыны. Сэни, гашкö, и пыскыль кыла йöзыс этшаджык, сэтшöм öдйö кө кужöны кывнас вөрöдны? Дерт, эм-ö кутшöмкö йитöд тэрыба сёрнитöм да пыскыльтысь йöз лыд костын — висьтавыны сьöкыд: татшöм туялöмъясыс меным тöдтöмөсь и некутшöм лыдпас та серти абу.

А кутшöм тешкодьöн кажитчö орчча сиктсалөн шыяссö нюж-йöдлöм, мөд ногаджык шуöм либö ливкйöдлөм! Эм мый вылын шмонитыштны. Со и артмис, мый керчомсаясöс кыв помъясын «в» пыдди «л» шуöм понда кутисны нерны «малтём кёлдум гөлбөч вылын сёя». Тайö эськö оз йитчы пыскыля морткөд, но сёрниыс мөд нога и артмö тешитчöм.

Тшөкыдакодь шмонитысьяслөн «емыс» бытшкалö да дойдалö пыскыльтысьясöс. Вермас весиг мынлытöм ним көвъясьны, да нöшта и ныв-пиыдлы да налөн челядыслы на кольö. Гашкö, та понда йöзкост традицияын и вöли лöсьöдöма сэтшöм текстъяс, код отсöгөн позьö бырöдны пыскыльтöм. Коми фольклор туялысьяс нимтöны найöс кывбертласьясөн либö кывбертланъясөн.

Коми йöзкост кывбертлас абу ёна уна. А öнi найöс нöшта и этшаөн нин тöдöны. Та понда и чужис мөвп гижыштны на йылысь. Пасъям, мый тэчас серти найö ёна торъялöны роч кывбертласьясысь («скороговорки», «чистоговорки»): вывтi нин ичötöсь мукöдыс — кык кывъяöсь весиг. Но век жö, татшöмөн найöс вöли гижöма йöзкост сёрниысь. Коми фольклористикаын кывберт-

ласъяс туявліс Юрий Герасимович Рочев. Мед кӧть и некымын кывйӧн вӧлі казътыштӧма, но сійӧ медводдзаӧн казяліс да индіс налыс аслыспӧлӧслунсӧ. Сы бӧрын некод нин сӧсса прамӧясӧ эз шыӧдчывлы на дінӧ.

Мукӧд фольклорнӧй текстъс кывбертлас позьӧ кокниа тор-йӧдны ӧткодь шыясӧн ворсӧдчӧм серти. Коми кывбертласъясын тшӧкыда паныдасьлӧны взрывнӧй шыяс. Ӑти текстын вермас ӧтпырйӧ лоны уна гортӧм взрывнӧй согласнӧй: «кык вок», «кык поп»; «кык шкап», «кок пӧк», «кык кок», «кык вок поп бок топ-керӧмась», «бать кок пӧв» и с.в. Коми гижыс Василий Юхнин 1936 воын, Коми педтехникумын велӧдчигас на, чужан сиктсьыс, Занульсьыс, гижис со татшӧм кывтӧчас: «кык поп — кык ноп».

Артмӧны кывбертласъяс шыяссӧ аслыснога гартӧмӧн, гортӧм да гора взрывнӧй согласнӧйяс ӧтувтӧмӧн: «гӧрд гоб кок пом» (Кулӧмдін), «кык гӧрд гоб кок пом» (Абъячой, Нӧбдін). Татшӧм шы тӧчасыс, педагогъяс серти, медся сьӧкыда артмӧ челядьлӧн. А важ йӧзыд, збыльыс, вежӧра вӧлӧмаӧсь, сяммӧмаӧсь кӧ казявны тайӧс да лӧсьӧдны пыскыльтӧм эрдӧдӧм могыс кывбертласъяс.

Уналы тӧдса, мый мукӧд челядьыслӧн оз артмы «р» шуӧм. Нюмдылан, кор кывлан «Рома» пыдди «ёма», а «рака» пыдди — «ляка». Буракӧ, та понда некымын кывбертласын и вевтыртӧ тайӧ «пышъялыс» шыыс: «кырӧм гӧрд кыр» (Тентюков), «кык зыр тыр вӧл зӧр», «кык зыр тыр вӧл зӧр тӧл бӧр» (Поруб), «кык зыр тыр вӧлі зӧр тӧл бӧр (бӧж)» (Занулье). Такӧд йитӧдын, пыр жӧ тӧд вылӧ уси Виктор Напалковлӧн «Утка туй» романсьыс Ӗльӧксан Попвасев. Сійӧ казътылӧ челядьдырся кадсӧ. Валера Попов нима ёртыслӧн оз вӧлӧм артмы «р» шы шуӧм: Валера пыдди шулӧма Валела. Ӗльӧксан тшӧктӧма сылы шуавны «трактор» кыв, тадзи ёртыс и мынтӧдчӧма пыскыльтӧмыс. (Войвыв кодзув, 2004. 12 №. 12 л.б.). Мукӧд сонорнӧй шы гежӧда паныдасьлӧ кывбертласын. Абу сьӧкыд шуны: «кык вӧв кок» (Абъячой), «кык шом комок».

Сӧрнитігӧн сьӧкыд овлӧ, кор орчӧн сулалӧны небыд да чорыд шыяс: «небыд нямӧд, шоньд нямӧд» (Сыктивкар); «Небид сӧй мач», «Лӧне, на пӧсь мач сӧй» (Куж с.). Торйӧн нин, оз век артмы некымын небыд «с» шы шуӧм: «Кыксӧ сю сусек» (Грива сиктсӧветыс Вадор гр.). Тешкодья юргыс кывтӧчасъяс дорӧ ёнджыка, дерт, кыскӧ томуловӧс. Татшӧм «шушкӧмыс» ӧтпырйӧ гажӧдӧ и асьсӧ мортсӧ, и ёртъяссӧ.

Шыльӧдӧм, мичаа юргыс да сюрӧса (сюжета) кывбертласыс коми фольклорын абу уна. Шуам, мича серпас сувтӧ син водзад «Прилук увті ва муркъялӧ» кывбертлас шуигӧн (гижлӧма сыктивкарбердса грездъясыс). Серамыд петас, кор кывлан, мый «ӧдзӧс дорын дяк чеччалӧ» (Вомын с.). Кыдзи нӧ он нюмды, кывлан кӧ татшӧм кывбертласъяс: «кык гӧрд кос чунь пом» (Чуклӧм с.); «кык пос пом» (Сыктивдін район, Проньдор с.); «Тима пурт кеслӧ» (Кӧрткерӧс район, М.-Керӧс); «коз пу — кыз пу» (Ужга с.) да «лӧчыд бона чер» (Печора). Тані окота вайӧдны нӧшта ӧти кывбертлас. Кӧть сійӧ вӧлі гижӧма перымса комияслыс, но гӧ-гӧрвоана быд коми мортлы. Аффрикатаяслӧн да сонорнӧй согласнӧйяслӧн веласьӧмыс артмӧ пуяслӧн дзуртӧм шы: «дзор вӧр дзорӧ, дзуртӧ дзур».

Кывбертласъяс видлалігӧн казялам тшӧтш, мый унджыкыс

на пиысь өткодъ тэчаса, шуам: «выль гыр, важ гыр» (Пөрүб), «выль шлия, важ шлия», «выль алипа пань, важ алипа пань», «выль шы зыр, важ шы зыр» (Пыисдін), «выль Малань, важ Малань». Но, буракө, медсясө кывным гөррдзасьлө «выль лөз рот, важ лөз рот» кывбертлас шуигөн (Пыисдін).

Мукөддырйи текстъяссө абу кокни нимтыны кывбертласъясөн, сы вöсна мый сьöкыд шы тэчасыс оз паныдасьлы, көть эськө шыөн ворсөдчöмыс эм жö. Петкөдлөм могысь индам некымын татшөм кывтэчас: «кузь пила», «зепа пила», «кык дяк», «кыз поп»; «кык гөр», «кузь сос», «дур поп», «гөрд гоб», «додъ розь» (Сыктывдін район, Проньдор с.); «кык шкап», «кык друг», «каш рок», «кос кор», «чöж рысь». Татшөм кывбертласъясыс зэв дженъидось, та вöсна найöс колö унаысь шуны.

Выльгорт сиктын сюрöма со кутшөм кывбертлас: «Рытнас төрыт тыра йөрö пыралöма тыра порсь». Неуна мөд ногаджыка тайö кывтэчасыс паныдасьö и Кулөмдінын: «Төрыт рытнас Тара Вера йөрö пыралöма тыра йөра».

Дженъид, шмонитан кывбертласъяс өдйö шуалігөн тшöкыда тыдовтчö мөд, дзөбөм вежөртас. «Өдя, вöлыд пышйис» тэрыба да унаысь шуөм бöрын чужö некымын вежөртас: «Ө, дявöлыд пышйис!» либö «Өддялаыд пышйис!»

Йөз пөвстысь кывлан и мисьтөм вежөртаса шмонь артмөдысь кывбертласъяс. Колö пасйыны, мый и тайö — йөзкостса культу-ралөн юкөн, мый йылысь некыдз оз позь вунөдны.

Челядь костын и öнiя кадö ветлöны тэчасъяс, кодъясöс асьныс найö «кывбертласъясөн» жö нимтöны. Татшөм текстъяссө өдйö шуалігөн вежсьö вежөртасыс. «Камаз» унаысь шуигөн кутас кывны «маска», «кабан» пыдди — «банка», «моё» — «ёма», «по ра-не» — «не пора».

Шыясөн ворсны окотитөм төдчö оз сöмын кывбертласъясын, но и челядь фольклорлөн мукөд жанрын. Гашкө, та понда Ко-миын водзынсö вöлі паськалöма пудъясянкыв, көні тшөтш төдчö шыясөн ворсөдчөм.

Атам, батам, чумба, чум,
Чум, чиречи, атам, бум.
Бумба, перö, арантас,
На горе вечерний час. (Сыктывкар)

Сөрни шыясыс пудъясянкывъяс артмөдöны сьöкыд шуанног. Пöшти быд строкаын паныдасьлө аллитерация (согласнöй шыяс чукөр — б; м, р, т, ч) да ассонанс (гласнöй шыяс чукөр — а, у). Найö оз сöмын мичмөдны шуөмсö, но и артмөдöны индөм ритм.

Кывбертлас да пудъясянкыв (либö лыддысянкыв) кындзи, шыясөн ворсөм тыдовтчö и мукөд фольклор жанрын. Позьö ин-дыны нöшта нимтысянкывъяс («Оля-боля, орөм голя»), зверь-пöтка да гортса пемöс шыяс эльтөм («Ветли-ветли, вит во ветлі, няр гач коли»). Шыөн ворсөдчöмыс вынсьөдö сөрнисö.

Коми да роч йөзкост кывбертласъяс вöлө видзөдөмөн коми гижысьяс сідзжö видлісны асьыныс вынсö татшөм текстъяс лөсьö-дöмын. Некымынöс лөсьөдліс В.И.Лыткин. «Дзордзав жö, Коми му» небöгын нель неыджыд кывбур Илля Вась нимтöма «кыв-песанөн»:

Потшӧс пӧлӧн петшӧр ытшка,
Кутш да катша петшӧр пытшкын.

Татшӧм сяма жӧ кывбуртор казялам Геннадий Юшковлысь.
«Тӧла додь» (2000 во) небӧгын сылысь йӧзӧдӧма 37 текст. Авторыс тшӧтш шуӧма найӧс «кывпесанъясӧн». Мукӧд кывпесаныс зэв бура тӧдса велӧдчысьяслы. Унаысь кывлі нималана гижысь-лысь лӧсьӧдӧмторъяссӧ челядьянь, кодъяс вунӧдӧмаӧсь нин кывбертласьяслысь авторсӧ да чайтӧны найӧс йӧзкостсаӧн. Ныв-зон костын медъяна паськалӧмны Геннадий Юшковлӧн со татшӧм кывпесанъяс:

Перыд Педӧр
Ветліс недыр,
Вайис Педӧр
Китыр сэтӧр.

Потшӧс вылын катша,
Потшӧс улын Катшӧс.
Йирӧ Катшӧс лы,
Оз сет катшалы.

Кывпесан кодъ жӧ Александра Мишариналӧн «Каня-пӧча» кывбур. «Выльышпоз» небӧгын (1993 во) Петыр Саньӧ нимтӧма сійӧс «кывбертласӧн»:

Пывсян йӧрӧ шыдӧс кодзӧ
Менам пӧчӧ.
Васька каньным сэн жӧ жӧдзӧ...
Кодлы стӧча,
Лэбачлы-ӧ, каньлы пӧчӧ
Сёян вӧчӧ?

Кывбертласьяс лӧсьӧдігӧн коми гижысьяс гартӧны кывъясӧн ворсӧдчӧмсӧ ичӧтик сюрӧс гӧгӧр, дорӧны найӧс рифмаӧн. А ритм да рифма подула гижӧдъясыд кокниджыка нин усьӧны тӧд вылӧ. Сӧмын тай татшӧм кывбуръясас ззв гежӧда аддзан сьӧкыда шуӧм вылӧ шыяс чукӧр.

Мый важӧнсӧ вӧлі йӧз костын быд лунъяӧн, ӧні пӧшти вунӧма нин. Мыйкӧ, дерт, и чукӧртӧма учёнӧйясӧн да чужан кыв радейтысьясӧн. Но став чукӧртӧмыс, позьӧ шуны, весь куйлӧ архивъясын. Колӧ эськӧ туявны материалсӧ да бӧр «лэдзны» олӧмас, мед выльысь вужъяс да пондас велӧдны сыӧ, мый вылӧ и чужлӧма.



Шарик-Тузик

В И С Ъ Т

Тайё аслыссяма понйыс сиктö веськаліс ыджыдөн нин. Тыдалö, лёка видзлöмаöсь. Гашкö, лёка вердісны, гашкö и, нöйтлісны. Но став сертиыс — кыськö бокысь, весиг абу матысса грездысь понйыс. Буретш видз-му овмöслөн порсь гид дорö и ылалöма. Абу, дерт, сöмын сы вöсна, мый скöтöс начкöм бöрын шыбитлісны колясьяссö, тшöтш и котельнöйын уджалысьяс сибöдлісны, вердыштлісны да кöдзыд пöраö лэдзлісны шонтысьны, нигыльтчöмөн узыліс ыджыд пач дорас. А öти асылö Михайлö, сэтчöс кочегар, нуöдіс гортöдыс.

Сідзи и кольчис öшйöм ыджыд льöбъяса, лапъя пеля пон неыджыд сиктö. Сёян чуктыліс эз сöмын выль кöзяин-кöзяйкасянь, но и орчöн олысьясянь. Водз асывсянь вöляникись ваткылясьöмөн вöчліс кытш орчча керкаяс дорöд. А мый нöшта колö? Ас йөрö тöдтöмöс эз лэдз, увтышталіс, мукöддырйи и вöтлывліс на кода-кодöс. Пыр нин шылькнитліс таысь выль кöзяиныс, корсюрö содтöд номсасыны на сетліс.

Колö содтыны: понйыс вöлі пöрыськодъ нин и аслыспölöс вежöра. Стöч нимсö некод эз тöд. Выль кöзяиныс Шарикөн нимтіс, а коркö и Тузикөн горöдліс. Öтар боксянь кö, понлы вöлі веськодъ, мыйөн нимтасны. Медым сöмын кынöмыс пöt вöлі-а. И век жö ас-лас сöстöм вежөрнас да лазмунöм синъяснас туяліс матігöгöрса олöмсö.

Пон куйліс кöзяинлөн кильчö бокас да синъяссö куньтыралöмөн мыйкö мөвпаліс ассыыс. Вöльнöй светсö аддзöмсянь быдторсö нин тöдліс. Тшыгыялöмсö и кынмалöмсö, пинялöмсö и чужьялöмсö.

Керкаас кыліс кöзяйкаыслөн лёкысь горзöм, быттьö увтчис код вылö кö. «Тыдалö, мыйкö абу юкöмаöсь выль кöзяинкöд,— мөвпыштіс пон.— Либö мыйкö лёктор сёйöма-юöма». Сэсся недыр мысти, öдзöс дзуркнитöм бöрын, сылы бокас веськаліс сапöг ныр да кыліс лёкысь горöдöм:

— Тэ нöшта кок улын дöсадитчы, Тузик!

«Абу тöрытъя руа. Бара нин — Тузик. Шарикөн нимтыліс-а. Вежöрыс гудыртчылö жö»,— лöня югнитіс понлөн вежöрас, сэсся ойöстöмөн чечыштіс бокö.— «Кор тайö крукасьлö да лёкысь горзö, сідзкö, нинöм бурсö виччысьны...».

Шарик-Тузик колльöдіс лазмунöм синъяснас öтарö-мöдарö шатлалысь кöзяйкасö. Сэсся увтыштіс ылöсас, сідзи, куш сынöдас, да вуджис туй вомөн сулалысь керка дорö. Мөвпас, дерт, кутіс сэтысь мыйкö аддзыны номсасыштны. Асьявылыд тай пыр мыйкö шыбитöны. И збылысь, поспом бокысь аддзис неыджыд лы чукөр. Сэсся кыліс горöдöм:

— Шарик! Шарик, на...

«Бара нин Шарик, муртса на Тузик вöлі-а,— мөвпыштіс пон.— Но мед, ветла. Тайö гожöм кежлö волысьясыс пыр мыйöнкö да чöсмöддöны». Бöжсö легöдöмөн Шарик-Тузик варгыльтіс ытшкытöм бор вомөн орчча потшöс сайö. И эз сорсьы: поспом дорас

сулаліс шома дука нин шыд тыра тасьті, а керка пытшкас кыліс сьылём. Пон, дерт, пон вежөрнад кыліс омляём.

Тасьті нюлём бёрын лажгөдчис небыд турун вылө. Но другысьён кыліс туй вылын шаргём шы, и лэптис юрсө. Төдіс, дерт. Локтіс орччөн олысь мужичёй: абу поводдя серти шоньд паськөма, юрсө өшөдөма, муртса кыскө кокъяссө.

«Тайө бара на абу ас вежөрас, бара на висьө, тыдалө. Час, ме моз жö кытшовтас матысса керкаяссө»,— мөвпаліс пон. Сэсся кыпөдчис да водзö легөдіс кокъяснас водзын сулалысь керка дорö.

Колис нöшта öти гожа вой. Шарик-Тузик паляліс йöз сёрни улö. Варгөмыс кыліс туйбокса пес сарай сайысь. Пон төдіс көзяиныслысь гөлөссө. Кынөмыс сьомаліс и горшыс косьмис жö, да думьштіс петкөдчивны... Пес сарай бокын пукалісны вель уна мужичёй, вомсьыныс лэдзисны тшын да варгисны ас костаныс. Сералісны на и. «Кытысь тайöяс сёянсö босьтöны, быд раз асылөдз тані пукалöны да?»— мыйлакö мөвпыштіс пон да водіс көзяиныслөн кок улö.

Тадзи, керкаысь керкаö ветлөмөн, «омляёмъяс» кывзөмөн колисны шоньд лунъяс. Коръяскö кутіс нин лымъявны. И öти асылö Шарик-Тузик сьөлөмнас кыліс, мый регыдъя кадö сюрас пөттөдзыс сёйны.

Öтчыд көзяиныс петкөдіс карта бокö чер-пурт, лэдзис неыджыд йөрö баксөмөн дөзмөдчысь сюра öшписö. Кор көзяиныс, киас черөн, пырис йөрас, пон лыбөдчис места вывсьыс: «Гашкö, и меным мыйкö пайдас»,— татшөм мөвпгясөн Шарик-Тузик ойкнитіс потшөс вомөн да курччис бөжөдыс сюра баксысьсö. А мөдыс чепөсйис котөртны, да потшөс гөгөр, потшөс гөгөр... Пон, дерт, думсьыс көсйис отсыштны, но муртса эз артмы мөдарö. Буретш öд көзяиныс лэптыліс черсö пемөсöс пагөдөм вылө, а со мый артмис... Дядьö сэсся дыр котраліс, черөн öвтчиг, потшөс пөлөн. То öшлы öвтыштас, то понлы, но некодыслы эз веськав.

Шарик-Тузик век жö колис ловйөн. И пөттөдзыс на сёйны сюрліс. Сэсся некымын лун куйліс кильчö бокас синъяссö куньтыралөмөн: тапиктылас неыджыд йөр дорö, көні неважөн на муніс ыджыд кось, нювсьыштас да бөр кыссяс аслас шонтөм местаö.

Сёр арнас öтчыд көзяиныс босьтіс сійөс вөрö. Муніс Шарик-Тузик неокотапырысь — гөгөрвоис, бара жö пытшкөснас кыліс, мый тайö пөрийö вермас лоны лектор. Кывліс öд мужичөйяссиян: «Мый нö тайö пөрысь понсö видзан? Вай катөдам вөрö туланлы сам вылө». Дядьöяс, дерт, чайтісны, мый понйыд кыв оз гөгөрво, но Шарик-Тузиклы тайö эз и ков. Сійö морт сёрнисö гөгөрвоис пытшкөснас жö.

«Катөдй»,— вочавидзліс көзяиныс.

Сідзи и лоис. Но эз дзик сідзи.

Кор көзяиныскөд öтвыв вөралысь дядьöяс, кружкаясөн клөндчөм бёрын, ланьтісны ноддя бокö, Шарик-Тузик кыліс вөр-пу сайысь төдтөм, повзьөдчана дук... Бипурлань матыстчис гөрд гөрба ыджыд ош. Понйыдлы Енсянь сетöма, медем чуйдыны көзяиныслы бокөвöй локтысьсö. Но тайö пөрийö сійö шыбитчис ошлы веськыда ныр-вомас, да здук-мөд и лои кык пемөс костын тышыс. И эз нин кывлы Шарик-Тузик ружьясысь лыйсьөмсö...



Вөр-ва вöсна тöждөн

Алексей Каневлөн нимыс паськыда тöдса Изьва районын. Ве-жöра синмыс быттьö кыскö ас дiнас, нюмыс оз и бырлы чужöм вывсьыс. Он висьтав, мый сийö вывтi варов, но сёрнисö кывзигөн казялан мортислысь вежöрсö: быд кыв лöсяланаинö тэчö. Олöмас унатор сылысь сёлöмсö вөрзёдö, но медся нин ёна песö — Изь-ва районлөн, Коми мулөн историяыс, вөр-ва видзöм вöсна тöждыс, войтырыслөн оласногыс.

2005 вося апрельын Алексей Семёновичлы тырис 55 арöс. Мужичöйлы тайö шöр арлыд — тырвийö сöвмöма, вужсяныс тöдö олöмсö. Но видзöднысö сийö ёна томджык.

— Олöм чöж вина румка эг юлы, öти папирос эг куритлы. Лым усьöм бöрын быд лун котрала лызьöн, вичмас прöст кад — ветла вöравны, гожöмъяснас радейта пукалыштны вугыр шатьöн визув Сэбысь ю берегын (Изьвалөн вож). Сэтысь и дзоньвидзалу-нöй. Вөр-ваыд öд томмöдö мортö.

Аслас олöм йылысь висьталö зэв дженъыдика. Помавлöма Мокчойса шöр школа. Армияс служитöма Китай граница бер-дын. Демобилизуйтчöм бöрас кык во уджалöма монтажникöн Эж-васа лесопромышленнöй комплекс стрöитанінын. Уджыс ёна ка-житчылöма, вöчöмторсьыс мынтысьöмаöсь бура. Мöд воас брига-дирöн көсьöмаöсь индины — абу босьтчöма, ыстысьöма тöдöм-лун тырмытöм вылö. Колö на пö велöдчыны. И велöдчöма. Рыть-яссö колльöдлöма Эжваса библиотекаын, книгаысысла ветлывлöма и Сыктывкарö, Ленин нима библиотекаö, чукöртöма Изьва му история да сэтчöс йöз йылысь уна материал. Торйöн нин на йылысь, кодъяс пуктисны уна вын да тöдöмлун, мед сöвмöдны овмöс, кыпöдны сиктъясын культура.

И водзö вылö, көні көть Алексей Канев эз уджавлы, тайö де-лöсьыс эз эновтчыв. Меным чайтсьö, воас кад, кор Алексей Се-мёновичлөн петас Изьва му, сэтчöс войтырлөн важся да талунъя олöм йылысь небöг. А висьтавны, гижны сылы эм мый йылысь.

Медым босьтны ыджыдджык тöдöмлунъяс, Алексей Канев пы-рис велöдчыны Коми государственнöй педагогическöй институтса физика да математика факультетö. Велöдчис окотапырысь, көсьö-мөн-зильöмөн. Куим гожöм каникулъяс дырйиыс уджаліс сту-дентъяслөн стрöительнöй отрядын. Мöд гожöмнас Алексей Кане-вöс индiсны нин «Сириус» отрядö командирöн, а коймöд гожöм-нас веськөдліс Усинск карын öтувтöм стрöительнöй отрядъясөн. Студент котыръяс Усинскын кыпöдiсны оланінъяс. Республикаын чужис выль кар. Алексей Семёнович пыр на видзö Благодарствен-нöй письмö, көні Усинск администрацияса юралысь студентъяс-лысь босьтчöмсö да торйöн нин öтувтöм отрядъясса командир А.С.Каневлысь том йöзкөд уджалан сямсö вылö донъялö. Öд стрöитчан уджысь кындзи студентъяс сöвмөдiсны спорт — тшö-

кыда котыртлөмәөсь том йөзкөд ордйысьомъяс, ворсөмъяс, КВН-яс, кыпөдөмәөсь культура — Культура керкаясын вөчлөмәөсь докладъяс, лыддьөмәөсь лекцияяс.

Институтсö помалөм бöрын Алексей Семёнович некымын во велөдiс Печора карса мөд номера школаын физика да военной делö. Нуөдiс вөр-ва радейтысьяслысь да математика кружокъяс. Бур йитөд кутiс Печора карса музейкөд, тшөкыда аддзөдчывлiс войнаса да уджыввса ветеранъяскөд, речникъяскөд, көрт туйыввса уджалысьяскөд, гижалiс налысь казтылөмъяс. Кажитчис сылы уджыс, весиг бурджык оланiн көсйисны сетны. Но гөтырыс эз окотит локны Печораö. Ковмис мунны: семьяыд кө корö, колö сйöс пыдди пуктыны.



Та бöрын Алексей Семёнович öкмыс во помся велөдiс физика да труд Съөдкыркөтш посёлокса школаын. Сыөн котыртөм технической творчество кружокыс öдйö кутiс нимажны республика пасьта. Кружокса зонкаясөн вөчөм приборъясыс уна во дорыв вбсьтiсны первой места республикаса выставкаяс вылын. Таысь кындзи, гожөмъясын Канев некымынысь ветлiс челядькөд Урал из вылö. Школаса музейö вайисны уна пөлöс изъяс, минералъяс, шоча паныдасьлысь быдмөгъяс, мукөдтор. Алексей Каневлысь ветлан-мунан гижөдъяссö войдөр йөзөдлiсны республикаса газетъясын.

1989 воö Визин сиктын вбсьтiсны профтехучилище, көнi Алексей Семёнович уна во велөдiс физика да информатика. Ме тöдмасы характеристикаяснас, кыдзи донъявлөмәөсь мортсö уджаланiнъясас. Урок нуөдан сямысь кындзи пасйөмәөсь вөр-ва вылö челядькөд быд гожөм петавлөмсö, кружокъясын уджсö. И быдөн, быттьö сёрнитчөмөн, тöдчөдөмәөсь: «А.С.Канев, челядьлы джуджыд төдöмлунъяс сетөмысь кындзи, велөдö ныв-зонмөс лоны сөстөм оласнога веськыд мортөн, чуксалö радейтны чужан му». Алексей Семёнович и урок вылас тшөкыда кыпөдлiс сёрни сы йылысь, кутшөмөн колö лоны мортлы, медым сйö войтырыслы пыр вöлi зэв коланаөн, вермис вайны йөзлы унджык пöльза.

Алексей Семёновичлысь ёна дойдiс сьөлөмсö олөмыслөн ковтөм ногөн крута вежсьөмыс, кор öтияс вывтi öдйö озырмөны, мөдъяс — ёна унджыкыс — öдйö гөльмөны, да нöшта на ставыс кутiс кыссыны, чинны-бырны и некод нинөмысь оз кывкут. Татшөм мөвпъясыс эз кутны сетны спокой:

«Мыйла татшөмыс вермис лоны?»

«Мыйла ми дугдiм тöждысьны ёрта-ёртным вöсна?»

«Эм-ö петан туйыс татшөм олөмсьыс?»

Водзтi и семьяын, и школаын, и йөзын челядьöс бур вылö велөдлiсны: пöшти эз вöv гусясьөм, йөз вылö лөкалөм и став мукөд лекторйыс, мый öнi йөзөдöны газетъясын, висьталöны радио пыр, петкөдлöны телевизорын. Кывзан — юрсиыд сувтлö. Кöин котырын быттьö бур войтырыс олөны, аския лунсьыс полöны.

Көть көнi А.С.Канев эз уджав, көнi көть эз ов, сйöс пыр

кыскис чужан муас. Отпускъяссö эз шоньд море берегывьвса санаторийясын колльöдлы, а воливлис чужан грездас, «вердлис» номъясöс Сэбысь ю дорын. Юквайд вугыр шатинөн кыйöм черисьыд сэнi чöскыд.

Ласта, Алексейлөн чужан грездыс, важысянь нимавлis уджач да бур сьöлöма йöзөн. Эз кольччыв гожöмъясын уджач йöзсьыс и Алексей Семёнович, видз вылын жö коллялис унджык кадсö. Сэтчöс вöвлöм колхоз, а бöрынджык совхоз юкөн, йöв-ййөн пыр вöли районын медся буръяс лыдын. И тайö сьöкыд кадас ластасаяс оз кöсйыны кольччыны мукöдысь, кöть и сэнi олöмыс ёнакодъ дзугсис, том йöз пöвстысь унаöн юсисны. И не сöмын том йöз пöвстысь. Курыдторсö грездын позьö ньöбны лунын кöть войын, верстьö войтырлы и том йöзлы.

Чужан грездö воём бöрас А.С.Канев крепыда босьтчис нуöдны тыш вина юёмлы да олöм дзугысьяслы паньд. Сылөн водзмöстчöм серти унаысь чукöртлисны сходъяс, кöни öлöдисны винаöн вузасьысьясöс. Неöтчид панлис сийö сёрни та йылысь зонъяскöд, кыскис асладорас олöма и том йöзöс. Ог шу, мый дзикöдз öвсисны вина юысьяс да öтувъя овмöсын пöрадок торкалысьяс, но налөн лыдыс тöдчымөн чинис. Панли сёрни уна сэтчöс нывбабакöд, и на пöвстысь быдөн ошкис Алексей Каневöс тайö бурторсö вöчöмысь. Дерт, эмöсь и сэтшöмъяс, кодъяслы оз лöсъяв Алексей Семёновичлөн бур вылö йöзсö туйдöмыс: öтияс воштöны кокныйд нажöтка, мöдъяслы яндзим лои войтыр син улö петкöдчывны. Но уналөн горт гөгöр овмöсыс быттьö ловзис, кыптыны кутис... Öтчид-мöдысь шуан — йöзыд и думыштчöны.

Кольöм нэмся öкмысдасöд воясын районса олысьясöс ёна шызьöдис «Сэбысь» заказник йылысь кыпöдöм сёрни-гижöд. Алексей Семёновичлы Сэбысь юыс, сы гөгöрса вөръясыс, тыясыс, шоръясыс донаöсь да матысöсь. Но абу сы вöсна сöмын, мый сэнi сылөн дедъясөн на лöсьöдлöм вöралан угоддьöясыс, му-виддзыс. Тайö юыскöд унаторийөн йитчöма олöмыс Ласта, Изьва, Мокчой, Гам да мукöд сиктса олысьяслөн. Тайö юыс вердö йöзöс чериён, сэтчöс ягъясас рöдмö уна зверь-пöтка, тöвнас сэтчö пыртöдлöны тундраысь воём көр стадаяс. Яла ягъяс вылас кисьмö гырысь, чöскыд чöд-пув, ёна петö дона гоб. Увтасинъясас — нюрын быдөнлы тырмö турипув.

1994 воын Коми Республикаса Министръяс Сöвет торъя индöдөн Сэбысь ю ковтыс вынсьöдис заказникөн. Сэнi дугдис позьны нуöдны геолого-разведочной уджъяс, перйыны мупытшкöсса озырлун, пöрöдны вөр. Но ставыс тайö колис эськö бумага вылын. Олöмас артмис мöд ног.

1999 во помланьыс Россия, Британия да Америка «Печорнефтегаз» пöдса акционер котыр вузъысис заказник му вылö, босьтчис сувтöдавны сэтчöс яг вылас мувий да биару корсян бурöвöйяс. Регыдъя кадөн республикаса выль власьтлысь фирма шедöдис лицензия. Районса администрация эз жö сувт республикаса власьтлы да акционер котырлы паньд, кöть Изьва районса войтыр — көр видзысьяс, вöралысьяс, вотчысьяс, чери кыйысьяс — эз кöсйыны воштыны Сэбысь юбокса гулыд ягсö, вотöса нюръяссö. Öд мупытшкöсса озырлун корсьысь варягъяс во-мöдөн и пагöдасны тайö енвевтувса мича местаяссö, да сэтчö ни зверь-пöткалы, ни мортлы овны-волыны оз кут позьны. Пер-

войон гөлөссө кыпөдіс Печораос мездан комитет (веськөдлө Валентина Семяшкина). «Сэбысь» заказник дорйомас медводдзаяс лыдын жө зїля кутчысис и Алексей Канев. Сылон водзмөстчөмөн зэв дженьыд кадон котыртсис вөр-ва дорйысь Изьва района общественной комитет, сїйө отувтїс, вөр-ва дорйысьясысь отдор, района быд грездысь-сиктьясысь медся пыдди пуктана йөзсө. Комитет водзмөстчөмөн Ласта грездын, району медводз нуөдісны социально-экологической конференция, кытчө волїсны Сыктывкарс, Москваса, Санкт-Петербуркса да мукөд гырысь карьясса учёнойяс. Вөр-ва дорйысь района комитет суд пыр бөр вермис вежны Республикаса Юралысьон кырымалом индөдсө.

«Сэбысь» заказник фирмаон пузувтөмысь лои мездөма. Та бөрын Печора ковтыс дорйысь комитетос кутїсны єна пыдди пуктыны. Торйон нин төдчис тайө сїдз шусяна независимой общественной референдум нуөдїгөн, көнї делегатяс сетїсны уна бур индөд, мед позис син улад кутны геологьяслысь да нефть перйысьяслысь уджсө. И збыль, вочасон тайө контролыс кутїс нуөдсыны быдторйын. И ыджыд пай тайө уджас пуктоны Изьва сиктысь Василий Костин да Тамара Новикова, Мошъягаысь Андрей Истомин, Ластаысь Константин Канев, мукөд. Комитетлөн водзмөстчана босытчөм йылысь не отчыдысь телевидение да радио пыр висьтавлїс Алексей Канев. Сылысь гижөдьяссө йөзөдлїсны республикаса газетяс. Уна материал та йылысь печатайтлїс «Веськыд сёрни» газет. Кадысь кадө сїйө петавлө району.

Сэбысь юлөн эм «Кутш позья» ичөтик вож. Олөма йөз казътывлөны, мый сэтчөс пашкыр коз вылын уна во дорвыв позьясьлөма-быдтысьлөма кутш. Тайө ичөтик, но зэв номъя полыйыс вөвлөма Алексей Каневлөн рөдөвой угоддьө. Кутш позья ю вомсяныыс неуна улөджык, Сэбысь ю бокас, мича пожөма яг нөрыс вөлө Канев вокьяс лэптоны кык судта ыджыдкодь керка. Вевт улын нин.

Алексей Каневлөн висьталөм серти, сәні лоас гостиница, а стөчдыка кө — вөр-ва дорйысьяслөн Изьва района шөрин. Сәні жө кутасны овны и мукөд муясысь локтысь туристяс, кодьяс көсйөны төдмасьны Изьваса вөр-ваон, сэтчөс войтырлөн историяон, аддзывны, кыдзи коми йөз вөравлїсны, кыйисны чери, пасьтасьлїсны. Танї лоө позянлун синвидза аддзывны изьватаслысь став оласногсө, обичасө, йөзкост культура. Онї нин вөзйысьоны волыны Канадаысь, Эстонияысь вөр-ва радейтысьяс.

Алексей Канев көсйө лөсьөдны йитөдьяс венгрияскөд, финнъяскөд. Сылон мөвп серти, танї вермасны шойччыштны и республикаса карьясын олысьяс, кодьяс єна мудзөмаось быд лунъя зыкшумсьяс, да весиг и бурдөдчыны сөстөм сынөда пармаас шойччигөн, вугыр шатинөн чери кыйигөн. Сэбысь юысь отдор танї зэв чериаось и матысса тыясыс да вадьясыс. Сэтчөдз подон часөнджынйөнөн позьө воөдчыны. Эм Кутш позья ю бердас некымын вөр керка да сьөд горья пывсянъяс. Окотитас кө кодкө, и вөр керкаас лун-мөд-коймөд вермас олыштны, пывсьыны.

— Гостиницаас жө, неыджыд жырьө, осьтам музей,— висьталө Канев.— Важся вөралан да чери кыян көлуй, паськөм, дозмукьяс да уна мукөдтор чукөртөма нин. Гостиница бердас лөсьөдам из горья пывсян, неыджыд спортивной площадка, мукөдтор.

2002 вося сентябрын, Алексей Семёнович корöмөн, Изьваö волісны Сыктывкарысь, Печораысь, Ухтаысь, Москваысь, Санкт-Петербургысь нималана уна йöз. Найö кыпöдчылісны Сэбысь кузя, волісны районса некымын сиктö. Изьва сиктын чукöртлісны уна йöза собранньö, көні вöлісны тшöтш и гöсьтьяс. Сёрни муніс изьваса войтырлөн талунъя олöм да тöждъяс, вөр-ва дорйöм, вина юöмкöд да куритчöмкöд тыш нуöдöм йылысь. Öтсöгласөн шуисны лöсьöдны «Буртас» котыр. Председательнас сэтчö öтсöгласөн жö бөрйисны Алексей Каневöс. Обществоса членъяс тöдмöдöны чукöртчылысьясöс Коми муын олысь изьватаслөн история-ён, Изьва юбокса сиктъясын важся да öнiя олöмөн.

Вылён котыртöм «Буртас» общество правленньö бөрйöм йöз волывлöны школаясö, сетöны колана öтсöг районса краеведческой да школаясса музейяслы.

Неважөн ме лыдди Каневлысь ыджыдкoдь гижöд, сійöс сiöма вөр-ва видзöмлы, Изьва крайлысь экономика да культура сöвмöдöмлы, öнiя йöзлөн олöмлы. Меным кажитчö тайö тöлкөн гижöм научно-философской статьяыс.

— Уджалыштны на неуна колö, мыйсюрö содтыштны, а сэсся, гашкö, позяс и йöзлы лыддьöм вылö петкöдлыны.

— И тані нин мöвпъясыс чукийөн! Ставсö кө инö-артö вайöдны!

— Олöмыс öд пыр водзö мунö, виль могъяс миян водзö сувтöдö... Сидзкö, и мöвпалöмсьыс дугöдчыны оз позь. Олöмыс тадз тшöктö,— ас кыв вылас сулалö А.С.Канев.

Валентина Канева, Алексей Семёновичлөн гöтырыс, уна во нин чукöртö да гижалö мойдъяс да дженъыдик ворсанторъяс, медсясö вöралан, чери кыян да көр видзан темаяс вылö. Öткымын ворсантор Алексей да Валентина петкöдлісны весиг Сыктывкарын. Налысь ворсöмсö вылö донъялісны «Молодёжь Севера» газет пыр. Валентиналөн висьталöм серти, налөн кык морта театральнöй труппа ветлас районса школаясö, көні, дерт, быть ковмас и спектакльсö петкöдлыны.

Алексей Семёнович некымын во нин веськöдлö Коми Республикаса Юралысьлөн Изьва районса общественной приёмнöйөн, тшöкыда ветлывлö сиктъясö, вöчö ставсö, медым некод эз торкав сиктса мортлысь гражданской правояссö, тöдчана удж нуöдö и «Изьватас» котырын. Тадзи, дженъыдика, лoи висьталöма Алексей Каневлөн ыджыд удж йывсьыс.

Снимок вылын: Алексей Канев.



Олөмас петкөдісны... и вөвъяс

Сиа Өртьөм правнуклы

Айму вөсна ыджыд тыш дырйи и ичөт челядь, коді мый вер-
мим, отсасим гырысьяслы. Зонкаяслы, дерт, медсясө вичмыліс
вөла удж. Миян колхозын, көть и нимыс «Индустрия», став
сьөкыд уджсө вөчисны вөвъясөн. Чаньяссө доддьөн-верзьөмөн
ветлыны зэв кужөмөн велөдлывлөма батьой. Чибөясыс рамось,
кывзысьясось.

Артмөма сідзи, мый вөлыскөд «төдмасы» ...чужан лунө. Ма-
мөс абу удитөмны вайөдны больничаөдзыс. Чужтөма менө вөлөк
вылас, рөзваль доддьын. Сідзкө, аддзылысьяснас да отсөг сетясь-
яснас вөлөмаось сөмын мамөс колльөдысьяс да вөлыс.

Кор пансис Айму вөсна ыджыд тыш, меным тырис сизим арөс.
Батьөс нуисны дорйыны Москва, но чорыд косьясын сійө регыд
и усьөма. Мамөс висьөмыс топөдөма, да врачьяс шуөмны: «Көсьян
кө водзө овны, мун чужанінад».

Төвланыс нин, батьөн велөдөм чибөөс доддялөмөн, мамкөд
мөдөдчим Коми муө. Чужан сиктсянь Кировөдз вөлөкыс сө кызь
километр.

Көнкө джын туяс, узигөн, менам турбыльтчыссьөма додсьяс
туй юж вылас, но некутшөм гөлөс абу сетсьөма, весиг эг и садь-
мы. Чорыда узысьсөн вөвлі.

Висьтавлісны: нель арөсөн усьлі пө джуджыд паччөр вывсянь,
но абу жө садьмыссьөма. Аддзөмаось асывнас джоджын узысьсөс
да сэки и чуксалөмаось. А доддьыс усьөмыс лоөма лымъя туй
дырйи нин. Видзөдлас мам додь бөрланыс, а мортыд и абу. Бер-
гөдчасны вөвнас бөр. Аддзасны туй вылас узысьсөн.

Коркө и воөдчим сэсся Сыктив юбокса Ыб сиктө, ыджыд мам
керкаөдз. Овмөдчим. Вуджим төвсө, а локтан гожөмнас менө
нарадитісны вөлөн турун юр кыскавны, а сэсся арнас, сю да ид
вөла машинаөн вундан кадө, көрөнной вылас веськөдлысьсөн пук-
сьөдісны. Сэки нин верстьөяс казялөмны: менсьым, ичөт морт-
лысь, вөвъясыс кывзысьөны.

Дерт, паныдасьлісны и кывзысьтөм вөвъяс. Өтчыд пемыд рытө
вөрсә туй вылын вөв мыйыськө повзис да шыбитіс менө мыш
вывсьяс, а ачыс эз и сувтлы весиг. Дыр ковмис вөтчыны сы
бөрсә, кытчөдз эг кут.

Өти пөраө, зэра рытьясө, тшөктісны верзьөмөн новлөдлы-
ны колхозыс сиктөветө лунын вөчөм уджъяс арталана сводка.
Но вөвъясыд, кыдзи и йөз, эмось и ыкшаяс. Оз на быдөн зонка-
ыдлысь кывзысь, оз пет шоныд конюшнясьяс зэр улө. Мукөдсө
дыркодь ковмыліс тракйыны сермөд поводөдыс, кытчөдз оз ось-
ковт конюшня порог вомөныс.

Овлывліс: дыгыд Карко либө Лысан туй джынсө рөдтас, а сәс-

ся сувтас да он на вѳтлы — воськов оз вѳч! Шоньд конюшняыс дум вылас усьѳма, дась бѳр косны.

Ѳтчьд колхозса вѳвьяс вылын миянѳс, зонпосниѳс, вѳтѳдїсны гырысьджык зонъяс. Ёртъясѳй пышйисны, а меным эз мойви, кѳть и чепѳсйылі. Верзьѳма зон вильшасьѳмѳн нетшыштїс юрысь шапкаѳс да куш юрѳн и лои мунны школаѳ. Велѳдысь ни велѳдчысьяс эз казьявны, мый ме шапкатѳм, а ачым эг жѳ норась. А мам гортын казьявтѳг эз ов. Висьтасьны лои. Мам ветліс колхоз правлениѳ да сѳтысь аддзѳма шапкаѳс. Стен бокас кѳрт тув вылѳ ѳшѳдѳмаѳсь. Кодї вайѳма, бухгалтерыс ни тшѳтѳводыс абу аддзылѳмаѳсь, да оз пѳ и сетны мамлы шапкаѳс.

«Кодкѳ ѳшѳдїс да вунѳдїс, а тѳ нуан? Локтас мортыс да мый сылы висьталам?»

«Бѳрдѳмѳн кори шапкатѳ, ѳдва и сетїсны», — бура дыр пиняліс менѳ.

Кадыс сѳки вѳлі сьѳкыд и йѳз эз чеченитчыны ѳта-мѳдныскѳд татшѳм лоѳмторъяс дырйиыс.

Вѳвьяс... Найѳ отсалїсны меным нажѳвитны трудоденьяс. Кѳть урожайтѳм воясѳ трудодень вылас, кыдз шуласны, кыд сора китыр бѳж сю и сетлісны, но ми, зонпосни, зїлим, ордйїсим, мед пановтны ёртъяснымѳс трудодень лыднас.


Сизимѳд классѳ вуджѳм бѳрын Ыб сиктысь вуджим мамкѳд Мѳдлапѳвса сплав рейдѳ. Сидѳрполойѳ каникулъяс дырйи ветлывлї нажѳвитчыны тшѳтш и ме.

Нѳм кежлѳ колис вѳвьяс йылысь бур казътылѳм. Найѳ отсалїсны вуджны тшыг, сьѳкыд война кад, петкѳдїсны менѳ ыджыд олѳмас.



Выль небөгъяс

Неважён Коми небөг лэдзанинын петіс кык выль небөг. На йылысь, чайтам, колö шуны торйөн:



М63 Доронин П.Г. Мойд небөг. Книга сказок. / Составители О.И.Уляшев, В.М.Кудряшева, И.А.Плосков.— Сыктывкар: Коми книжное издательство, 2004.— 464 с.: ил.

Павел Доронинён чукöртöм мойдгъяс небөгсö урчитöма учёной-историк, гижысь, литературной критик да фольклористлөн 100 во тыриг кежлö. Текстгъяссö сетöма комиён и рочён. Эм комментарийяс. Серпасгъяс В.Б.Осиповлөн.

Л58 Му пуксьöм — Сотворение мира. / Автор-составитель П.Ф.Лимеров.— Сыктывкар: Коми книжное издательство, 2005.— 624 с.: ил.

Тайö небөгас пыртöма уникальной материал: мифологической проза да духовной стихгъяс — коми йöзлөн вежöрыс — ылö колöм нэмгъяссянь талунгъя лунöдз. Текстгъяссö сідз жö сетöма комиён и рочён. Содтöд уна серпас — найöс вöчис А.В.Мошев.



Чайтам, тайö небөггъяс — збыльысь ыджыд козин лыд-дысьны радейтысьяслы.



ПЫДДИ ПУКТАНА АВТОРГЪЯС!

Редакцияö гижöдгъяснытö ыстігөн быть колö юöртны:

1. Ассыныд ним, вич, ов; кор да көні чужлöмныд (лун, тöлысь, во).
2. Паспорт юöргъяс: номер, серия, кор да көні сетісны, гортса адрес (прописка серти).
3. Индивидуальной налогöвой номер — ИНН (кодлөн эм).
4. Страховой свидетельство номер.

Тайöс юöрттöг редакция гонорар оз вешты.

*Журналын йöзöдтöм гижöдгъяс
редакция оз рецензируют и авторыслы найöс оз мöдöд.
Редакция оз век во öти кывйö авторгъяскöд.*

Комп. набор и верстка **Н.Кузнецова.** Корректор **Н.Габова.**

Адрес редакции: 167982. ГСП-2, г. Сыктывкар, Дом печати, каб. 26.

Телефоны редакции: 24-47-52 (гл. редактор), 24-51-52 (общ. отд./факс).

E-mail: nordstar@kominet.ru Некоторые материалы размещаются также по адресу www.komi.com

Подписано к печати 11.07.2005. Формат 70x108¹/₁₆. Печать офсетная. Усл. печ. л. 7; усл. кр.-отт. 8,4; учетно-изд. л. 7,54. Тираж 976. Заказ № . Регистр. ПИ № 3-6843.

КОГУП «Кировская областная типография», 610000, г. Киров, проезд Динамо, 4.